



Republic of Zambia
Ministry of Education

KIKAONDE
BUUKU WAKUTANGIJILA MUFUNJISHI
FOMU 1 -TEMU 1



Developed by the Curriculum Development Centre

Lusaka

2025

© Curriculum Development Centre 2025

Luusa lonsetu lwa panyiwa ku bene bena buuku. Nanchi kafwako muntu nangwatu umo waswishiwa kufyatulula uno buuku, kibese kyauno buuku, kumulama mujishinda jiji jonse, kwingijisha malaiti, kukopolola nangwa kulama mawi kwakubula luusa lwa ba Curriculum Development Centre ne.

Ñambilo ne Nembelo

Banembi

Rose Kipepe: Specialist – Curriculum Development

(Kikaonde), Curriculum Development Centre,
Lusaka.

Matson Kawanda: District Education Standards Officer, Kasempa

Felix Kasongo: Teacher, Mutanda Boarding Secondary School,
Kalumbila.

Remmy Kibalabala: Deputy Headteacher, Kimakolwe Day Secondary,
Solwezi.

Ireen Lukonda: Deputy Headteacher, Mukinge Day Secondary School,
Kasempa.

Agness Kashimanga: HOD, Dengwe Day Secondary School, Kasempa.

Menny Mukonga: Teacher, Mufumbwe Day Secondary School, Mufumbwe.

Annie Mangi: Teacher, Nyumba Yanga Secondary School, Lusaka

BYAMBO BITANSI

Ntendekelo ya mfunjishilo ya katataka yaimena pa kwingijisha byaketekelwa kubiwa (competence-based curriculum) amo bafunda mobafwainwa kufunda kuuba ne kulenga bintu kwingijisha maana akatataka ne buyuke. Nanchi kwingijisha competence based (CBC) kwaleta lupimpu ne kuwamishako mfunjilo ya bafunda. Kipamo kitala pa lufunjisho kyayukishatu bulongo makatazho eya na mambo aluno lupimpu lwa **mfujilo yakatataka**. Onkao mambo, kipamo kitala pa kufunda kyanengezha ne kupana byakwingijisha pa kufunjisha pa kuuba amba kufunda kulumbulukenga bulongo.

Ino ntendekelo ya mfunjishilo ya mu Kikaonde ya shikamana pa mizhilo ya buyuke (competence based) ayo itundaika kufunda pabyo tupitamo mu moba abumi bwetu. Nanchi byaketekelwa kubiwa nobe kumvwañana, ndangulukilo yazhika, maana akupwisha makatazho, kulanguluka na kusabaula, kwilangulukilako, kuyuka kwingijisha makopyunta ne intaneti ne busulu byo byaingijishiwa mu buuku wa Curriculum Framework. Kabiji ino mitwe-kache, yaketekelwa kubiwa bulongo mukweseka kukwasha kufikizha mfunjilo ya buyuke nangwa amba CBC. Abino byaimena pa kuteshako muchima ne kwimika bipimo byawama byaketekelwa kubiwa. Onkao mambo, naketekela namba kuno kufunda kwa kwingijisha CBC mu Kikaonde mu Fomu 1, kusa kukwashako kuwamisha, kwatanchikiwa mu mabuuku a mizhilo ya kyalo aavula nobe, mu bintu bikwasha ku lufunjisho kutwajijila (Education for sustainable development), kwa 2023 ne kwa Zambia Education Curriculum Framework kwesekana na lutangijilo lwa 2016, alo lubena kwamba pa byakonsheka kufikizhiwa lufunjisho kubena Zambia.

Kunungapotu, uno buuku ubena kumwasha kwibikishako kwa kipamo kitala pa kufunda mu kupeezhezhako bafunjishi mu mfujishilo, kupana lutangijilo kupichila mu mingilo yapanyiwa ne lweseko lwa bafunda alo lwaimena pa kuuba byaketekelwa bulongo. Bino nangwa byonkabyo, bafunjishi batundaikwa kufikizha ino mfunjishilo kupichila mu kupesapesa ne kwingijisha maana akusomba kabiji ne kubikilapo maana akwabo pa byobya byashalapo pa kimye kyo babena kufunjisha.

Joel Kamoko (Mr)

Permanent Secretary- Education Services

Ministry of Education

LUSANCHILO

Uno buuku wa Fomu 1 mu Kikaonde walupulwa na bukwasho bwa bangikazhi baji mu kipamo kitala pa kufunda kabiji ne babuula kwingila mukino kipamo. Nanchi bantu umo umo ne bipamo biimena bevwangilemo ne kubika milanguluko pamo pa byakwingijisha buyuke (Competence Based Curriculum). Onkao mambo, kipamo kitala pa lufunjisho kyapana lusanchilo ku bonsetu bevwangilemo mukupana milangwe yabo ayo yakwashishe mu kunemba uno buuku wa Fomu 1 mu Kikaonde.

Mukupeezhako nasanchila bonse bamingilo ba ku Curriculum Development Centre, abo baingijile na ngovu mukumona amba ma syllabi anembewa ne kupwishiwa bulongo.

Charles K. Ndkala, (Dr)

Director of Curriculum Development

Ministry of Education

Bijimo	Peji
1. Ntendekelo.....	viii
2. Kwingijisha Bizhima Kutama	01
3. Baanabalume ne Baanabakazhi	10
4. Luusa lwa panyiwa ku Bantu	30
5. Buneme bwa Bisho	48
6. Mazhikakanwa	66
7. Mashimikila	82
8. Lupimpu lwa Lubesha	96

NTENDEKELO

Uno buuku wa Fomu 1 mu Kikaonde wanengezhiwa mujishinda ja kukumya, mukukebesha kukwasha bafunjishi kufikizha mfunjishilo bulongo mu ino mfunjilo (Curriculum) ya katataka. Auno buuku wa lutangijilo wanengezhiwa kwesekana na buyuke bwa 2023 Competence Based Curriculum Syllabus. Uno buuku wanembewa mukweseka kukwasha bafunjishi kukonsha kufunjisha nangwa kwa kubuula mabuuku. Kabiji mu uno buuku babikamo byakwingijisha, mingilo, lweseko lwa bafunda kwesekana na kipimo ne nkebelo ya bafunda.

Kipamo kitala pa kufunda kyayukishatu bulongo makatazho ajipo pa lupimpu lwa kutendeka kufunda kwingijisha buyuke bwa (Curriculum wa Competence Baesd). Nkebelo ya kwingijisha Competence Based Curriculum yaleta lupimpu mukuwamishako mfunjishilo. Kabiji uno buuku wamweshwa patooka kwipana kwa kipimo kitala pa lufunjisho mukweseka kukwasha bafunjishi kukonsha kufunjisha bulongo, kupichila mu lutangijilo, mingilo yapanyiswa ne lweseko lwaimena pa biketekelo bya buyuke (Competence Based Curriculum). Nangwa byonkabyo, bafunjishi batundaikwa kupesapesa ne kusomba pa kuuba amba bapwishe lukatazho pa kimye kyo bena kufunjisha.

Onkao mambo, mingilo ne lweseko lwapanyiswa mukweseka kutundaika kwingila ne kulangluka kwazhika mu bafunda kabiji ne kukwatankanya mfunjilo ya bintu byapusana-pusana pa sukuulu. Bafunjishi batundaikwa kufunjisha kwesekana na nkebelo ya bafunda, kupesapesa, kwingijisha mashinda aitabizhiwa umvwe bekimona amba kyakila mukuwama.

Kuno kupeezhako kwa mu mfunjishilo kusa kukwashako bafunda kunonkelamo nangwa bafuma mubuzhokoloke bwapusana-pusana.

Nanchi kyamwekana Patoka amba uno buuku usa kukwashako bafunjishi kufunjisha mu ino mfunjilo ya katataka ya kwingijisha buyuke (Competence Based) mu kutundaika bafunda na maana akuyuka ne kwikala na byubilo byawama mu mfunjilo.

BYAKWINGJISHA UNO BUUKU

Mingilo yanengezhiwa mu uno buuku yafwayinwa kufunjishiwa mu temu 1 mu Fomu 1. Nanchi uno buuku bamwabanya mu bishina bibiji kabiji mu bino bishina muji bibese byapusana-pusana nobe, kwamba ne kuteleka, kutanga, byambo, nchikameno ne nembelo. Mu kunungapotu, uno buuku kechi ke lufunjisho ine. Mufunjishi watundaikwa kunengezha lufunjisho kufuma mu uno buuku saka akyangye kufunjisha. Monai amba mwatolamo mingilo mu bibese byapusana-pusana apa bino mwanemba lufunjisho lwa pajuuba-pajuuba.

Kimwesho, lufunjisho lwafwainwa kwikala na kwamba ne kuteleka, byambo, kutanga ne kunemba. Pa kunengezha lufunjisho, monai amba mwasalamo bintu ne mingilo yo musa kufunjisha bafunda mu byaketekelwa kubiwa. Nanchi kimo kimye lufunjisho lwakosha kwikala na byaketekelwa kubiwa kukila pakimo. Onkao mambo, obewa pamo nobe mufunjishi wafwainwa kumona kibese kibena kukebewa kutaiwapo kimye kyabaya. Kabiji yuka amba mingilo yonse yapanyiswa mu byaketekelwa kubiwa kechi yafwainwa kufunjishi watu mu lufunjisho lumo ne, bino yafwainwa kufunjishiwa mu mafunjisho aavula.

MASHINDA ASALWA KWINGIJISHA

Kimye kyonse mufunjishi saka akyangye kufunjisha wafwainwa kumona mu syllabus wa fomu 1 ne kumona mashinda obapana akufunjishilamo Litalicha. Kabiji Mufunjishi watundaikwa kwingijisha mashinda apusana-pusana kwesekana na nkebelo ya bafunda.

KISHINA 1: KWINGIJISHA BIZHIMA KUTAMA

Bijimo: Mu kino kishina mufunjishi usa kufunjisha pa bibese bitanu kutendekela pa Kuteleka ne Kwamba, Kutanga, Kunemba, Mulakazhilo ne Ntuntulwilo. Kabiji bafunda basakuyuka butame bwa kwingijisha bizhima kutama, kwikala na kipizha kya kuuba kino kyubilo ne bintu byatama bifumamo ne byawama bifuma mu kulondela mikambizho ya kwingijisha bizhima bulongo.

Mufunjishi ayuke amba kino kishina kyaimena pa kibese kya Kuteleka ne Kwamba, kabiji mafunjisho ajimo avwangamo ne mingilo ya kuuba bafunda saka bakyangye kutendeka Kutanga ne Kunemba.

Kongola/Kalobo:

Juuba jimo mwanyike umu waimene kuya ku kusuulu Byo afikile mu sukulu wataine bakwabo balama tumabotolo twamwekelenga nobe twa Mojo mu maboko. Pakumona oa mabotolo wakomokele ne kulomba bakwabo kumupapo. Bamubujile amba kechi basa kumupela apo ine, kana ku kibanza kwafyamika bulongo. Uno mwanyike waswile kabiji baile ku kibanza ko bakamupejile. Byo bamupele kuswitamo, pa kupitapo ka kimye kacheche, wabazhimukiletu uji mu kipatela. Byo bamwipwizhe kulondolola kyalengejile, waambile amba watomene bizhima.

Byambo Byanema

- Bizhima
- Kusulwisha
- Kipizha
- Twishi twakafukula
- Maluwo

KIBESE A: KUTELEKA NE KWAMBA

Mutwe: Mwisambo

Mutwe-kache: Bintu bitulamata

Buyuke: Kwingijisha mulaka wafikilamo bulongo pa kwisamba pa bintu bitulamata (Kwingijisha bizhima kutama)

Ntendekelo

Mu kino kibese kya Kuteleka ne Kwamba. **Bafunda** basakuyuka butame ne buyuke bwa kwingijisha bizhima.

■ Ndonda ya lufunjisho

Mufunjishi abuule bafunda kwisamba pa kwingijisha bizhima kutama.

- Apane mitwe ya kwisambapo yaamba pa kwingijisha bizhima kutama.
- Abike bafunda mu bipanyi pakuuba amba besambe.

Biñambañamba

- Kipabi kya kunembapo
- Choko
- Buuku wa lufunjisho
- Bikaachi bya byambo

Mwingilo wakuuba:

Mufunjishi:

Mufunjishi esambe na bafunda pa ano mashinda mwatamina kwingijisha bizhima. Ebabuule bafunda mwaila kyambo kya bizhima.

- Bizhima ke muchi washinta wingijishiwa kukila pa kipimo kyafwainwa.
- Bizhima biji mu mashinda avula, biji nobe kupepa jamba, kubika jamba mu mema ne michi ikwabo ya mubipatela nobe amatani, dayasipamu, heloini ne bikwabotu.
- Mufunjishi abike bafunda mu tubipanyi pa kuuba'mba besambe aino mitwe ya mepuzho yapanyiwa kunshi.
- Banembeshi bapane sawakya panyuma ya kwisamba mikumbu ya mepuzho o bapewa.

Mepuzho:

1. Ñanyi bipamo bya Kafulumende bikanya kwingijisha bizhima kutama?
2. Mashinda ka bantu lelo jino mo babena kwingijisha bizhima?
3. Ñanyi buwame buji mu kwingijisha bizhima bulongo?
4. Ñanyi butame bo wamona buji mu kwingijisha bizhima kutama?

Bafunda:

- Bafunda bafwainwa kuyuka kuuba amba Kafulumende wabika mabumba atala pa kukanya ñingijisho ya bizhima kutama, abino bipanyi ke ba DEC (DRUG ENFORCEMENT COMMISSION), ZP(ZAMBIA POLICE).
- Bafunda bengile mingilo yo bapewa ku mufunjishi mu bipanyi.

Kipimo kyañingijilo kyaketekelwa kubiwa: 1. Bintu byo besamba pa kwingijisha bizhima kutama pano bebyambe ku bakwabo

2. Besambe bulongo mutwe wasalwa pa kwingijisha bizhima kutama

Mwingilo wakuuba

Bafunda besambe pa bintu bitanu byo balanguluka amba byo byafwainwa kubiwa pa kukanya kwingijisha bizhima kutama mu nyaunda yabo.

Mepuzho:

Mufunjishi abuule bafunda kwamba byo bafunda pa kwingijisha bizhima kutama. Apa bino anungepo kwamba byo bafunda.

KIBESE B: KUTANGA

Mutwe 1: Mpeyo ya lufunjisho

Mutwe-kache: Nsulo ya mabuuku aingijishiwa

Buyuke: Bya kutana mabulañano mu mabuuku

Ntendekelo

Mu kino kibese kya Mpeyo ya Lufunjisho bafunda basakuyuka byakutana mabulañano mu mabuuku.

- Mufunjishi alumbulule bulongo mwatala kyambo kya nteta ne tebulu wa byambo.
- Abuule bafunda kuyuka bya kwingijisha nteta ne tebulu wa byambo.
- Abuule bulongo bafunda bya kutana mabulañano kufuma mu mabuuku kwingijisha nteta ne tebulu wa byambo.

Mwingilo wakuuba: Kutana mabulañano kufuma mu mabuuku apewa apusana-pusana

Bafunda:

- Bafunda bafwainwa kuyuka kuuba amba Nteta ya Byambo ke mutanchi wa mazhina, byambo, mitwe ne bintutu bikwabo byo banemba kunyuma ya buuku mu kukwasha ubena kupesapesa kutana mabulañano akebewa.
- Bafunda bengile mingilo yo bapewa mu bipanyi.
- Batane bulongo mabuñano kwingijisha nteta ne tebulu wa byambo.

Bipimo byañingijilo byaketekelwa kubiwa

Kutana mabulañano bulongo kufuma mu mabuuku apewa

Mwingilo wakuuba:

Kwingijisha nteta ya byambo ne tebulu wa byambo kutana mabulañano mu mabuuku

Bipimo byañingijilo byaketekelwa kubiwa

Kwingijisha nteta ya byambo ne tebulu wa byambo bulongo kutana mabulañano mu mabuuku

Mwingilo wakuuba:

Bafunda bakebe mabulañano kupichila mu kwingijisha nteta ne tebulu wa byambo

Mepuzho:

Mufunjishi abuule bafunda kwamba bintu byo bafunda, apa bino ne aye mwine anungepo byo bashapo

Mutwe 2: Byambo

Mutwe-kache: Ndumbulwilo ya byambo

Buyuke: Kwingijisha byambo byafikilamo bulongo

Mwingilo wakuuba:

Kwisamba pa ndumbulwilo ya byambo bimo byasalwa

Mufunjishi:

Mufunjishi amone kuuba amba wabula bafunda bya kwingijisha byambo byafikilamo

- Apane kibaaba kufuma mu mabuuku mo basakutana byambo.
- Ebabuule kulumbulula byambo bimo byasalwa kufuma mu kibaba.
- Mufunjishi ebabuule bafunda kupana ndumbulwilo ya kulumbulula ku bakwabo.
- Apane mwingilo ku bafunda wa kwingijisha byambo bimo byasalwa mu bipelu.

Biñambañamba

- Kipabi kya kunembapo
- Choko
- Buuku wa lufunjisho
- Bikaachi bya byambo

Bipimo byañingijilo byaketekelwa kubiwa

Kwisamba bulongo pa ndumbulwilo ya byambo bimo byasalwa.

Mwingilo wakuuba:

Bafunda bapane mikumbu ya byambo byo balumbulula.

Bafunda:

Bafunda bamone kuuba amba balondela bino:

- Balondele bulongo mabulañano akibaaba kufuma mu mabuuku mo basakutana byambo.
- Balumbulule bulongo byambo bimo byasalwa kufuma mu kibaba.
- Bafunda bapane ndumbulwilo ya kulumbulula ku bakwabo.
- Bobe mwingilo wa kwingijisha byambo bimo byasalwa mu bipelu.

Bipimo byañingijilo byaketekelwa kubiwa: Bafunda bapane bulongo mikumbu ya byambo byo balumbulula.

Mwingilo wakuuba:

Bafunda bengijishe byambo byasalwa mu bipelu

Bipimo byañingijilo byaketekelwa kubiwa: Bafunda bengejishe bulongo byambo byasalwa mu bipelu.

Mwingilo wakuuba:

Bafunda balenge bipelu na byambo byafikilamo bulongo.

Mepuzho:

Bafunda bambepo bintu bimo byo bafunda mu luno lufunjisho. Apa bino ne aye mufunjishi anungepo pa byashalapo.

Mutwe 3: Ntangilo Yazhika

Mutwe-kache: Kutanga Nchikameno

■ **Ndonda ya lufunjisho**

Bafunda batange bibaaba muji bya mu mabuuku byapusana-pusana.

- Bibaba nabiji mashimikila, bishimi, nsansawilo, nsapawilo, yimbo ya kumuzhi ne bikwabotu.
- Mufunjishi apane mepuzho ku bafunda.

Buyuke: Bafunda batange ne kumvisha bulongo bibaaba muji bya mu mabuuku byapusana-pusana.

Mingilo yakuuba: Kutaanga bibaaba.

Kibaaba

Makatazho onse atendekele panyuma ya myaka ibiji yapitapo,po natendekejile kwingijisha bizhima. Kwajinga ne mwanamukazhi umo wapwishishe myaka makumi abiji ne itanu mukaleya na mambo kwitwezha mu busulu bwa kusulwisha bizhima.

Katataka papo, bamupimine ne kumutana amba uji na twishi twakafukula. Bena kwami nabo bepizhizhe na kisela kwingijisha bizhima kutama. Mu kimye kitanshi kyo twasambakene baingijishanga bizhima kutama bingi. Bino amiwa pa kyokya kimye kechi naingijishanga bizhima kutama ine, kabiji natwajijile na kwibatundaika kushinda uno muteeto pakuuba amba baleke kikupu.

Naesekele kwisamba ne bena kwami pa uno mutwe wa kwingijisha bizhima kutama, kabiji ne bachinyishe kuuba amba, maluwo apwe. Pano, bino byonse kechi byasebezele ine. Mukumbu ku bino byonse ke wakuuba amba, kechi nakonsheshe kwibakwasha ine. Mu kuya kwa kimye, batendekele kwikala na bukaji. Ne kyafuminemo batendekele kumpuma pa juuba pa juuba.

Bipimo byańingijilo byaketekelwa kubiwa: Bibaaba bitangiwe bulongo.

Mingilo yakuuba:

Bafunda bakumbule mepuzho apusana-pusana.

Mepuzho:

1. Busulu ka bwitwezhezemo mwanamulume uji mu jishimikila?

2. Mu milanguluko yobe, uno mutwe ubena kwamba pa ka?
3. Nanyi kintu kyalengejile mwanamukazhi umo kumutaya pa kazhima?
4. Kintu ka kimo kyafumine mu kwingijisha bizhima kutama kwa mwanamukazhi umo?
5. Kumvwa bakazhi amba “kechi nakonsheshe kwibakwasha ine.” Mwayila jishimikila, ino nambilo yatala muka?

Bipimo byañingijilo byaketekelwa kubiwa: Bafunda bakumbule bulongo mepuzho apusana-pusana.

Mwingilo wakuuba:

Bafunda bepipishe kibaba kyatangiwa

Mufunjishi abuule bafunda

Bipimo byañingijilo byaketekelwa kubiwa:

Bafunda bepipishe bulongo kibaaba kyo batanga

Mwingilo wakuuba:

Kwisamba ndumbulwilo ya byambo

Byambo:

- Bizhima
- Kusulwisha
- Kipizha
- Twishi twakafukula
- Maluwo

Bipimo byañingijilo byaketekelwa kubiwa:

Kwisamba bulongo ndumbulwilo ya byambo.

Ndumbulwilo ya byambo yaketekelwa:

- Bintu nabiji binyu, michi ya ku kipatela yashinta, nangwa michi ikwabo imo yakanyiwa.
- Kupotesha
- Muteeto
- Tulongolo tucheche tubula kumweka twa mu mashi
- Masongola

Mwingilo wakuuba:

1. Mu nanyi mashinda kwingijisha bizhima kutama mo kuletela makatazho?
2. Mashinda ka owalanguluka akonsha kukwasha kushinjalamo kwingijisha bizhima kutama?
3. Bañanyi bo walanguluka bengijisha bingi bizhima kutama mu kino kyalo kya Zambia?

Mepuzho:

Mufunjishi abuule bafunda kwambapo bintu bimo byo bafunda mu kwipipisha. Apa bino, ne aye asunsepo pabyo baamba.

KIBESE C: KUNEMBA

Mutwe: Nsombelo

Mutwe-kache: Nembelo ya Nsombelo

Ndonda ya lufunjisho:

- Mufunjishi abuule bafunda kuuba amba babena kufunda pa nembelo ya nsombelo.
- Ebabuule byafwainwa kunembwa nsombelo ne bintu byafwainwa kunembwamo.
- Bafunda banembe bulongo nsombelo.

Buyuke : Kunemba mutanchi wa bintu bikala mu nembelo ya nsombelo.

Mwingilo wakuuba:

Kwisamba nembelo ya nsombelo ne bintu byafwainwa kwibikiwamo.

Bipimo byańingijilo byaketekelwa kubiwa: Kwisamba bulongo nembelo ya nsombelo ne bintu byafwainwa kwibikiwamo.

Mwingilo wakuuba:

Bafunda besambe ne kutongola bintu byafwainwa kwikala mu nembelo ya nsombelo (nobe mutwe, ntendekelo, bikomo biji mu byepelo ne Mepuzho.)

Bipimo byańingijilo byaketekelwa kubiwa: Bafunda besambe ne kutongola bulongo bintu byafwainwa kwikala mu nembelo ya nsombelo.

Mwingilo wakuuba:

Bafunda banembepo nsombelo imo pa ino mitwe ypanyiwa

1. Nemba nsombelo pa mo kyawamina ne kutamina kwingijisha bizhima kutama.
2. Bantu bonse bafwainwa kwibaswisha kwingijisha bizhima kutama. Pachika.
3. Nemba jishimikila pa muvuala obe umu ye bakashile na mambo a kwingijisha bizhima kutama.

Mepuzho:

Mufunjishi abuule Bafunda kwambapo bishinka bimo byo bafunda. Apa bino ne aye apitulukemo pacheche byafunda Bafunda.

KIBESE D: MULAKAZHILO

Mutwe: Mitundu ya Byambo

Mutwe-kache: Bibese bya ñambo

■ Ndonda ya lufunjisho

Mufunjishi abuule bafunda bya kusobolola byambo mwayila mitundu yabo.

■ Ebatangijile mu kulumbulula mitundu ya byambo

Buyuke: Kusobolola byambo mwayila mitundu ya byambo

Mwingilo wakuuba (1)

Kusobolola mitundu ya byambo (bintu, tusuñami, byubilo, ndumbululo, tulumbuluzhi, tununganunga, tutangijilo, ngitabulwilo)

Bipimo byañingijilo byaketekelwa kubiwa:

Kusobolola bulongo mitundu ya byambo

Mwingilo wakuuba (2): Bafunda besambe pa mitundu ya byambo na bimwesho.

Bipimo byañingijilo byaketekelwa kubiwa: Bafunda besambe pa mitundu ya byambo na bimwesho

Mikumbu yaketekelwa:

1. **Bintu**-ke byambo byaimenako mazhina a bintu biji nobe kajo, nyama, muntu, mpunzha, mukola, kyalo, nangwa kyonse kintu kimweka nangwa kibula kumweka. Bintu byonse (kufumyakotu bintu-zhina) twakonsha kwibitela amba bintu-seka.”
2. **Tusuñami**-ke byambo byo twingijisha mu kifulo kya bintu. Nabiji mu kifulo kya kwamba amba Mukwemba waiya, twakonsha kunembatu amba *waiya* nangwa amba *aye* waiya. Kyambo kya waiya “wa” ke kasuñami kaimenako Mukwemba (kintu).
3. **Byubilo**- bimwesho byubilo byubiwa. Nabiji “ja”ne “enda”, ke byubilo.
4. **Ndumbululo**-ke byambo bitukwasha kulumbulula kyubilo, tulumbuluzhi ne ndumbululo ikwabo. Nabiji *kwamba bulongo*, *kwimba kimenge* ne *kulaala pangye*.
5. **Tulumbuluzhi**-Ke byambo byo twingijisha pa kulumbulula kintu nangwa kasuñami. Nabiji *muntu wabaya* ne *muchima wawama*.
6. **Tununganunga**-ke byambo byo twingijisha kunungakanya nangwa kukumankanya milanguluko, bipelu nangwa byambo kupichila mu ñambilo nangwa nembelo ya mulaka. Nabiji *ne, kabiji, nangwa, onkao mambo*, ne *bino*.
7. **Tutangijilo**-ke byambo bitangijila mazhina a bifulo nangwa mapunzha. Nabiji *pa, mu, mwa, mwi* ne *ku*.
8. **Ngitabulwilo**-Ke byambo byo bingijishiwa pa kuubazhimuka. Nabiji **nafwa! mama yoyoyo! Mwane!**

Mwingilo wakuuba:

Bafunda basobolole byambo kwesakana na mwayila mitundu yabyo

Bipimo byañingijilo byaketekelwa kubiwa:

Bafunda basobolole byambo kwesakana na mwayila mitundu yabyo

Mwingilo wakuuba:

Bafunda bengijishe bibese bya ñambo bimo mu kulenga bipelu

Mepuzho:

Mufunjishi ambile bafunda batongole bibese bya ñambo byo bafunda mu kwipipisha. Apa bino apwishe lufunjisho.

KIBESE : NTUNTULWILO

Mutwe-kache: Kulumbula byambo bingijishiwa mu kututulula byambo.

Buyuke: Kulumbulula byambo bingijishiwa mu kututulula

Mwingilo wakuuba(1): Isambai pa ndumbulwilo ne buneme buji mu kututulula.

Bipimo byañingijilo byaketekelwa kubiwa:

Isambai bulongo pa ndumbulwilo ne buneme buji mu kututulula

Mwingilo wakuuba (2): Bafunda besambe pa byambo byanema bingijishiwa pa kututulula (Ntuntulwilo yakunemba ne ntuntulwilo ya kwamba (translation and interpretation), mulaka mufuma byambo bintululwa ne mulaka ye mwatuntulwilamo (source language and target language), ntuntulwilo ya byambo kufuma mu mulaka umo kutwala mu milaka yavula ne ntuntulwilo ya byambo kwingijisha mulaka umo (interlingual and intralingual)

Bipimo byañingijilo byaketekelwa kubiwa: Bafunda besambe bulongo pa byambo byanema bingijishiwa pa kututulula

Mwingilo wakuuba (3): Bafunda bapusanye byambo bingijishiwa pa kututulula

Bipimo byañingijilo byaketekelwa kubiwa: Bafunda bapusanye byambo bingijishiwa pa kututulula

Byambo bingijishiwa pa kututulula

- a. **Ntuntulwilo ya byambo byanembwa (translation)-**ke ntuntulwilo ya byambo, bipelu nangwa bibaaba kufuma mu mulaka umo ne kutwala mu mulaka mukwabo kupichila mu kunemba.
- b. **Ntuntulwilo ya byambo pa kanwa (interpretation)-**ke ntuntulwilo ya byambo, bipelu nangwa bibaaba kufuma mu mulaka umo ne kutwala mu mulaka mukwabo kupichila mu kwamba.
- c. **Mulaka mufuma byambo bintululwa (source language)-**Ke mulaka mwine mwafuma byambo, bipelu nangwa kibaaba kyatuntululwa.
- d. **Mulaka ye mwatuntulwilamo (and target language)-**Mulaka mo mwatuntulwila byambo, bipelu, ne bibaba kufuma mu mulaka mukwabo.

- e. **Ntuntulwilo ya milanguluko yawwangamo milaka yavula (interlingual)**- Ino ke kutuntulula ya byambo bipelu nangwa kibaaba yawwangamo milaka yavula.
- f. **Ntuntulwilo ya byambo kwingijisha mulaka umo, (intralingual)**-Ino ke kutuntulula ya byambo bipelu nangwa kibaaba ya mu mulaka umo.

Mwingilo wakuuba:

Mufunjishi ape bafunda byambo mu kizungu kutuntulula kutwala mu Kikaonde.

Byambo:

- a. Smoking
- b. Drug
- c. Drug abuse
- d. Youth
- e. Addition
- f. Injection

Mepuzho: Mufunjishi abuule bafunda kwamba byambo bimo bingijishiwa pa kutuntulula. Apa bino, ne aye anungepo.

KISHINA 2: BAANABALUME NE BAANABAKAZHI

Bijimo: Mu kino Kishina bafunda basakufunda bibese bya Kwamba ne kuteleka, Kutanga, Kunemba, Mulakazhilo ne Ntuntulwilo. Kabiji bafunda basakuyuka bintu byaambiwa pa baanabakazhi ne baana baanabalume ne byoba.

Mufunjishi ayuke amba nangwa kya kuuba kino kishina kyaimena pa Kwamba ne Kuteleka, bya kufunda mu bibese byavwangamo ne mingilo ya kuuba banyike saka bakyangye kutendeka Kutanga ne Kunemba.

Kalobo

Fwanyikizha kwikala mu ntanda mwabula baanabalume ne baanabakazhi. Kupanga kwa bipangwa bimo ku bichi byavula kubiwa panyuma ya kuuba makopyo a bichi (pollen) beafumya ku maluba beasenda ne kwiatwala ku maluba a kichi kikwabo kya mutundu umo nangwa kyapusanako pa kuuba amba bichi biyuuke masongola byonka byo kikala ku bantu pa kusambakana kwa kwilaala inge bakeba kusema mwana. Ne bichi ne bijimwa byo byuba byonkabyo pa kuuba amba bivule nangwa kupanga bipangwa byavula abyoyatemwa kuja bantu. Pano nga bichi byakonsha kusema byepi saka bibula kulaala pamo?

Byambo Byanema

- a. Makopyo
- b. Jike
- c. Kwilaala
- d. Nsongwalume
- e. Nsongwakazhi
- f. Kulamata

KIBESE: KWAMBA NE KUTELEKA

Mutwe: Mwisambo

Mutwe-kache: Kwipachika

Buyuke: Bepachike pa mutwe uji yense

Ntendekekelo: Mu kino kibese kya Kuteleka ne Kwamba bafunda basakufunda pa baanabalume ne baanabakazhi.

Ndoonda ya lufunjisho

- Mufunjishi abuule bafunda kwisamba pa baanabalume ne baanabakazhi
- Apane mitwe ya kwisambapo yaamba pa baanabalume ne baanabakazhi
- Abike bafunda mu bipanyi pa kuuba amba besambe
- Ebabuule kunemba mingilo yapewa

Biñambañamba

- Kipabi kya kunembapo
- Choko
- Buuku wa lufunjisho
- Bikaachi bya byambo

Mwingilo wakuuba:

Baana bepachike pa ino mitwe yapewa pa baanabalume ne baanabakazhi

Mufunjishi

- Alumbulule mwatala kyambo kya lupachiko
- Ape bafunda mitwe ya kwichochekapo
- Ebabuule besambe pa mitwe yapewa mu bipanyi

Bafunda

- Balondele mikambizho yo bapewa
- Bechocheke mitwe yo bapewa

Mitwe:

1. Bansongwakazhi bakoma bukiji mu maana kukila bansongwalume. Pachika.
2. Bansongwakazhi nangwa bansongwalume bafwainwa kwisongolanga mu lwabo abo bene. Pachika.
3. Mwanamulume ne mwanamukazhi bajifumbi jimo kechi bafikilamo kwisongola ne. Pachika.

Bipimo bya ñingijilo byaketekelwa kubiwa: Baana bepachike pa mitwe yapewa bulongo.

Mikumbu yaketekelwa

Mutwe 1:

Kuswisha	Kukana
1. Bansongwakazhi bakoma bukiji mu maana	1. Bansongwalume kechi bakoma mu maana bukiji

kukila bansongwalume, maambo javula batanwa ne bainabo bebafunjisha byavula.	ine, mambo batemwa kufuma pa nzubo kuya na kukaya bingi ne kutanwa ne bashabo.
1.	1
2.	2
3.	3

Mutwe 2:

Kuswisha	Kukana
1. Baanabakazhi nangwa baanabalume bonka bonka bafwainwa kwisongolanga mulwabo mambo muntu wafwainwa kutemwa ne kusongola yense ye akeba kikulu awo muntu naye muntu .	1. Baanabakazhi nangwa baana balume kechi bafwainwa kwisongolanga mu lwabo ine, mambo ke kya bumvu kabiji Baibolo wakanya kuuba bino.
2	2
3	3
4	4

Mutwe 3:

Kuswisha	Kukana
1. Mwanamukazhi ne mwanamulume ba jifumbi jimo, kechi bafikilamo kwisongola ine, mambo baanabakazhi bakoma bukiji mu maana ne mu kimino kukila babalume	1. Bafwainwa kwisongola mambo bonse baji mu jifumbi jimo kabiji ne maana kechi apusenshatu ine.
2.	2
3	3
4	4

Mwingilo

Bafunda banembe bishinka bya kukana ne kuswa pa mutwe wa kuuba amba, “Kyawama nsongwalume kusongola nsongwakazhi mwanyikeko.”

Mepuzho

Mufunjishi abuule bafunda kwambapo pa byo bafunda. Apa mino ne aye mwine anungepo byo bashapo.

KIBESE: KUTANGA

Mutwe 1: Mpeyo ya Lufunjisho

Mutwe-kache: Kutanga kapambala ne kutanga na nshinkamiko.

Buyuke 1: Kutanga kapambala kibaaba kyo bapewa pa kuuba amba bakwatankanyeko bimo bijimo bukiji

Ntendekelo:

Mu kino kibese, bafunda basafunda ya kutanga kapambala ne kutanga na nshinkamiko.

- Mufunjishi alumbulule bulongo mwatala kyambo kya kutanga kapambala ne kutanga na nshinkamiko.
- Abuule bafunda kuyuka bya kwingijisha nteta ne tebulu wa byambo.
- Abuule bulongo bafunda bya kutana mabulañano kufuma mu mabuuku kwingijisha nteta ne tebulu wa byambo.

Ndonda ya Lufunjisho

- Kufunda kutanga kapambala
- Kufunda kutanga na nshinkamiko

Biñambañamba

- Kipabi kya kunembapo
- Choko
- Buuku wa lufunjisho
- Bipachi

Mwingilo wakuuba:

Baana batange kapambala kibaaba (kyafuma mu magazini, pepala wa byambo ...)

Mufunjishi

- Alumbulule bulongo mwatala kutanga kapambala
- Abuule bafunda kutanga kapambala kibaaba kyo bapewa
- Ebabuule kwamba byambo bijimo

Bafunda

- Bafunde kutanga kapambala
- Bambe ne kwisamba byambo bijimo

Tanga kino kibaaba kyapewa kwesakana na byo bakukambizha.

Mu kisémwatu, nsongwalume ne nsongwakazhi bakonsha kwifwalama bingi umvwe betemwa. Mwanamukazhi ne mwanamulume baji nobe bichi nangwa bijimwa bipanga bipangwa. Akilangulukai pa bichi byo bivula ne bipangwa byo bilengwa! Bashayuka bapeya bya kashinshi bamba amba, bipangwa bilengwa mu mashinda abiji. Jishinda jimo ke bulume bo babika mu bichi, nsono ne bijimwa ya kichi nangwa kijimwa kine bwa kwisemesha bunke nangwa kwivuzha (self pollination) ne jishinda ja bubiji ke kwisemesha kubiwa pakachi ka bichi byavula bya mutundu umo nangwa byapusanana (cross pollination).

Kupanga kwa bipangwa bimo ku bichi byavula kubiwa panyuma ya kuuba makopyo a bichi (pollen) beafumya ku maluba beasenda ne kwiatwala ku maluba a kichi kikwabo kya mutundu umo nangwa kyapusanako pa kuuba amba bichi biyuuke masongola byonka byo kikala ku bantu pa kusambakana kwa kwilaala inge bakeba kusema mwana. Ne bichi ne bijimwa byo byuba byonkabyo pa kuuba amba bivule nangwa kupanga bipangwa byavula abyo byatemwa kuja bantu. Pano nga bichi byakonsha kusema byepi saka bibula kulaala pamo?

Bilongolo, mwela, mema ne banyama bingila mwingilo wabaya mu kukwashako pa kuuba amba bichi nangwa bijimwa bivule. Pano bino mu uno mwisambo tusakwambakotu pa bilongolo, abyo biji mu mitundu yavula nobe nyuki, bipupulwa ne bikwabotu, mwane kuubala kukoka bisenda makopyo a bichi (pollen) kufuma ku kichi kimo kilume ne kutwala ku kikwabo kichi kikazhi ku maluba. Ano mashinda alondelapo o alondelwa pa kuuba amba bilongolo bikwasheko mu kusema ne kuvula kwa bichi.

Patanshi, **bilongolo biya na kwikala pa maluba a bichi**. Bilongolo nabiji nyuki iya na kwikala pa maluba na mambo a kukeba mema atobala (nectar) ekala mu maluba a bichi. Ano mema bamba amba awama bingi mambo atobala kabiji apana bingi ngovu mu mibiji ya bilongolo bi atoma.

Kya bubiji, **makopyo alamata ku mubiji wa bilongolo**. Inge kya kuuba lunyuki ke luvilauke ne kwikala-ikala ku maluba, makopyo afuma ku bibese bya lusemo bya kijimwa kilume (anthers) ne kulamachila ku mauulu nangwa lubaji lukwabo lwa mubiji. Kilengela kino kubiwa ke na mambo a kuuba amba makopyo bealenga mu jishinda ja kulamata ku mubiji wa kilongolo byonka bilamata kyela ku jibwe ja magineta.

Kya busatu, **bilongolo bisenda mema a tobala** kufuma ku maluba. Bilongolo inge byaiya na kusenda mema atobala ku maluba, makopyo afuma ku kibese kya lusemo kya maluba alamata ku mauulu a kilongolo, ponkapotu ke kuya ku jiluba jikwabo, kikale ku jiluba ja musampi ja kyonkakyo kichi nangwa ku ja kukichi kikwabo. Bilongolo byuba bino javula na mambo a kupitañana ne kwenda kukeba kajo. Bino bilongolo kechi byayukapo amba bisenda ne makopyo kukeatwala ku bichi bikwabo ne kuuba amba byo bilengela bipangwa kuvula ne bichi kusemununa ine.

Kulondelapo, **makopyo beatwala ku bijimwa** nangwa bichi bikwabo. Bilongolo byo biya na kwikala pa maluba akwabo, makopyo aji kulamata ku mauulu nangwa ku bibese bikwabo bya mibiji ya bilongolo aya na kubikwa nangwa kushimwinwa pa jiluba jikazhi (stigma).

Mu kupezhako, **makopyo a kijimwa asambakana na jike ja lusemo ja kijimwa kikazhi** (fertilization). Inge makopyo a kijimwa ne jike ja lusemo ja kijimwa byaikala na mufundo wa lusemo pa kusambakana, ku kuuba amba bipangwa bikwabo byakonsha kulengwa nangwa bichi bikwabo bisemwa ne kuvula.

Ano o mashinda mo muvujila bichi ne bijimwa pa kuuba amba bipangwa bikaleko byavula.

Bipimo bya ñingijilo byaketekelwa kubiwa: Baana batange kapambala bulongo kibaaba kyo bapewa

Mwingilo wakuuba:

Baana bakumbule mepuzho a bukiji bukiji

- 1) Jino jishimikila jibena kwamba pa ñanyi kintu?
- 2) Ñanyi bintu bikwabo byo waketekela kufunda?
- 3) Tongola byambo bya Kizungu byo wamonamo.
- 4) Nga mitwe iji mu misombelo ifita iji inga?
- 5) Tongola mitwe yonse iji mu misombelo ifita.

Bipimo bya ñingijilo byaketekelwa kubiwa: Baana bakumbule bulongo mepuzho

Mikumbu yaketekelwa:

- 1) Kusema ne kuvula kwa bijimwa ne bichi
- 2) Bilongolo byo bikwashako bichi kusema
- 3) Pollen, anthers, stigma ne fertilization
- 4) Bitanu (5)
- 5) Bilongolo biya na kwikala pa maluba a bichi, makopyo a bijimwa alamata ku mubiji wa bilongolo, bilongolo bisenda mema a tobala kufuma ku maluba, makopyo beatwala ku bijimwa nangwa bichi bikwabo, makopyo a kijimwa alala jike ja kijimwa kikwabo(fertilization).

Buyuke 2: Baana batange na kumvwisha kibaaba kyapewa pa kuuba amba bayuke bulongo bijimo

Mwingilo wakuuba:

Baana batange na kumvwisha kibaba/jishimikila pa kuuba amba bayuke bijimo bulongo.

Mufunjishi

- Alumbulule bulongo mwatala kutanga nshinkamika
- Abuule bafunda kutanga nshinkamika kibaaba kyo bapewa
- Ebabuule kwamba byambo bijimo

Bafunda

- Bafunde kutanga nshikamika
- Bambe ne kwisamba byambo bijimo
- Bakumbule mepuzho bulongo

Kumbula ano mepuzho alondelapo:

1. Jino jishimikila wakonsha kwijipa ñanyi mutwe?
2. Nemba mashinda abiji musemena bichi?
3. Tongola bintu byonse bingila mwingilo wa kukwashako mu kusemununa ne kuvula kwa bipangwa.
4. Ñanyi mutundu wa bilongolo wambiwapo bingi ukwashako mu kutwala makopyo
5. Ñanyi lupusano luji pakachi ka makopyo a bichi ne make a lusemo a bichi nangwa bipangwa.
6. Tongola ndonda ya mashinda ana engijisha bilongolo pa kusenda makopyo a bichi.
7. Mu ndangulukilo yobe, nemi wafwainwe kwamba ne pa bika bikwabo?

Bipimo bya ñingijilo byaketekelwa kubiwa: Baana batange na kumvwisha bulongo kibaaba kyo bapewa

Mikumbu yaketekelwa:

1. Kusema ne kuvula kwa bichi ne bijimwa.
2. Jishinda jimo ke bulume bo babika mu bichi, nsono ne bijimwa ya kichi nangwa kijimwa kine bwa kwisemesha bunke nangwa kwivuzha (self pollination) ne jishinda ja bubiji ke kwisemesha kubiwa pakachi ka bichi byavula bya mutundu umo nangwa byapusanana (cross pollination).
3. Bilongolo, mwela, mema ne banyama.
4. Nyuki
5. Makopyo a bichi afuma ku kijimwa kilume ne make a lusemo a bichi afuma ku kijimwa kikazhi.
6. Bilongolo biya na kwikala pa maluba a bichi, makopyo a bijimwa alamata pa mubiji wa bilongolo, bilongolo bisenda mema a tobala kufuma ku maluba, makopyo beatwala ku bijimwa nangwa bichi bikwabo, makopyo a kijimwa kilume alala jike ja kijimwa kikazhi (fertilization).
7. Mwela, mema ne banyama byo boba pa kukwashako bichi ne bijimwa kusema ne kuvula.

Mepuzho

Mufunjishi abuule bafunda kwambapo pa byo bafunda, apa mino ne aye anungepo.

Mutwe 3: Byambo

Mutwe-kache: Ndumbulwilo ya Byambo

Buyuke: Kwingijisha byambo byafikilamo bulongo

Mwingilo wakuuba: Baana besambe ndumbulwilo ya byambo byasalwa

- g. Makopyo
- h. Jike
- i. Kwilaala
- j. Nsongwalume
- k. Nsongwakazhi
- l. Kulamata

Bipimo bya ñingijilo byaketekelwa kubiwa: Baana besambe bulongo ndubulwilo ya byaambo byasalwa

Ndumbulwilo ya byambo yaketekelowa:

- a. Makopyo-ke kibesa kya kijimwa nangwa kichi kilume kilala jike ja kijimwa kikazhi.
- b. Jike-ke kibese kya lusemo kya kijimwa kikazhi kyo balala ku makopyo a kijimwa kilume

- c. Kwiyuuka masongola-kwilaala
- d. Nsongwalume-mwanyike ukitwala wamulume
- e. Nsongwakazhi-mwanyike ukitwala wamukazhi
- f. Kulamata-kukakela ku kintu

Mwingilo wakuuba:

Bafunda babuule bakwabo ndumbulwilo ya bintu byo besamba.

Byaketekelwa: Baana babuule bakwabo bulongo ndumbulwilo ya byambo yo besamba

Ndumbulwilo yaketekelwa:

- a. Kibese kya kijimwa nangwa kichi kilume kilala jike ja kijimwa kikazhi.
- b. Kibese kya lusemo kya kijimwa kikazhi kyo balala ku makopyo a kijimwa kilume
- c. Kwilaala
- d. Mwanyike ukitwala wamulume
- e. Mwanyike ukitwala wamukazhi
- f. Kukakela ku kintu

Mwingilo wakuuba:

Baana bengijishe byambo bimo byasalwa mu bipelu bya byambo

Bipimo bya ñingijilo byaketekelwa kubiwa: Baana bengijishe bulongo byambo bimo byasalwa mu bipelu

Bipelu byaketekelwa:

- a. Makopyo a kijimwa kilume a mufundo alengela bichi kuvula.
- b. Bilongolo biletela jike ja kijimwa kikazhi makopyo kufuma ku bijimwa bikwabo.
- c. Bichi nabyo bilaala nobe bantu
- d. Bansongwalume ne bansongwakazhi befwalama bingi.
- g. Makopyo alamata ku maulu a bilongolo

Mutwe 4: Ntangilo Yazhika

Mutwe-kache: Kutanga ne Kumvwisha

Buyuke: Bafunda batange na kumvwisha bulongo bibaaba muji mitundu ya Biñambwa-nembwa (genres)

Ntendekelo

Bafunda basa kufunda ntangilo yazhika kwingijisha Biñwambwa-nembwa.

Ndonda ya lufunjisho

- Bayuke mitundu ya biñambwa-nembwa
- Bafunda batange na kumvwisha bulongo bibaaba bya Biñambwa-nembwa byapusana-pusana

Byambo

Mwingilo wakuuba:

Kutanga bibaaba

Bafunda batange bibaaba muji bya mu mabuuku byapusana-pusana. Nabiji mashimikila, bishimi, nsansawilo, nsapawilo, nyimbo ya kumuzhi ne bikwabotu

Bipimo bya ñingijilo byaketekelwa kubiwa: Bibaaba bitangiwe bulongo

Bya mu mabuuku bino:

a. Obewa uja bunke
Talai kaji pa mutwe
Obewa uja bunke
Talai kaji pa mutwe

b. Natwa mwa bunke
Ba maama baya pi
Nsumpa
Yo yo yo
Ku Kasempa kwalepa
Sumpa.
Yo yo yo
Ko bapapa babalu
No baana

c. Kibinda
Yami kiluzha-luzha
Ñanzha nyama
Kapongo ngive wa ntanda
Lundwe kiya na mwela
Kitamba makelo mwine
Kyatapile bokwe
Kyenda misezho



D. Twaile twayile
Twayile ne ba shamanga
Shamanga wamona katonto
Katonto kaibila pa mema
Pa meema pafuma mwana ñandu
Mwana ñandu yetu twamulela
Twamulela ne ba kuyukuyu
Kuyukuyu ñombe yafulama
Yafulama yaya ku Bulenge
Ku Bulenge ya kasemununa
Semununa semununa
Semununa ne semununa

Mwingilo wakuuba:

Bakumbule mepuzho apusanapusana

1. Ñanyi mutwe ye usakupa nsansawilo yo watanga imo imo?
2. Ino nyimbo beimba ñanyi kimye?
3. Bañanyi bamba ino nyimbo?
4. Bembila bañanyi?
5. Mu milanguluko yobe, aba bo bembila ino nyimbo batanañana bomvwa byepi ku muchima?
6. Vulukai ne kubula bakwenu nsansawilo ikwabo yo wayuka.

Bipimo bya ñingijilo byaketekelwa kubiwa: Baana bakumbule bulongo mepuzho apewa

Mikumbu yaketekelwa:

1. Butanyi, Kutwa, Bubinda ne kulelezha baana.
2. Pa kimye kya kuuba umo watanañana, kimye kya kutwa, pa kwipaya banyama ne pa kulelezha baana.
3. Bo batana bintu, batwa ku kina, bibinda ne balelezha baana.
4. Bembila bantanyi, aba batwa, bibinda ne baana bajila.
5. Kibakola ku muchima, bino baleka kino kyubilo.
6. (Bana bavulukapo ne kubula bakwenu nsansawilo ikwabo yo bayuka).

Mwingilo wakuuba:

Bepishe bibaaba byo bapewa

Bipimo bya ñingijilo byaketekelwa kubiwa: Bepishe bulongo bibaaba byo bapewa

Kwipipisha kwafwainwa kwipashako na bino:

Bya mu mabuuku bino:

a. Obewa uja bunke
Talai kaji pa mutwe

b. Natwa mwa bunke
Ba maama baya pi
Nsumpa

c. Kibinda
Yami kiluzha-luzha
Ñanzha nyama
Kyatapile bokwe

d. Twaile ne ba shamanga
Shamanga wamona katonto
Katonto kaibila pa mema
Pa meema pafuma mwana ñandu

Mwingilo wakuuba:

Bapimpuleko nembelo ya bibaaba byo bapewa

Bipimo bya ñingijilo byaketekelwa kubiwa: Bapimpuleko bulongo nembelo ya bibaaba byo bapewa

Bya mu mabuuku bino:

a. Obewa ntanyi
Talai ko bakubika pa mutwe
Obewa ntanyi
Talai ko bakubika mutwe

b. Mbena kutwa bunke
Ba maama baya pi
Nsumpa
Yo yo yo
Ku Kasempa kwalepa
Sumpa.
Yo yo yo
Ko bapapa babalume
Nobe baana

Yaami kiluzha-luzha
Aye yenka ñanzha nyama
Uponga bngivi mu ntanda
Lundwe kiya na mwela
Kitamba makelo mwine
Kyatapile bokwe
Kyenda misezho

c. Twaile ne ba shamanga
Shamanga wamwene katonto
Katonto kabwela kaibila pa mema
Pa meema pafuma mwana ñandu
Mwana ñandu
Twamulela ne ba kuyukuyu
Kuyukuyu ñombe yafulama
Yafulama yaya ku Bulenge
Ku Bulenge ya kasemununa
Semununa semununa

Mwingilo wakuuba:

Baana besambe ndumbulwilo ya byambo

Byambo bimo byaketekelwa

1. Sumpa
2. Kibinda
3. Ñanzha-nyama
4. Katonto
5. Ñandu

6. Bulenge

Bipimo bya ñingijilo byaketekelwa kubiwa: Baana besambe bulongo ndumbulwilo ya byambo

1. Sumpa=Kutwa mu kina na mwinshi
2. Kibinda=Muntu wipaya banyama bakatampe
3. Ñanzha-nyama=Kibinda wa banyama bakatampe
4. Katonto –kanyama ka mungye kapasha mpongo kenda na kutontauka kavimba meeso
5. Ñandu=kiwele
6. Bulenge=ke Kabeta katalañana na Kabeta ka Buyeke

Mepuzho:

Mufunjishi abuule bafunda kwambapo pa byo bafunda, apa bino ne aye anungepo byashala.

Mutwe 5: Kutanga Nsabailo

Mutwe-kache: Kutanga

Buyuke: Baana batange bibaaba muji mitundu ya biñambwa-nembwa (genres) byapusana-pusa.

Mufunjishi:

- Alumbulule kutanga Nsabailo
- Abuule bafunda kutanga Nsabailo

Bafunda:

- Abuule bafunda kutanga bulongo Nsabailo

Mwingilo wakuuba:

Batange bibaaba byapusana-pusana

Bipimo bya ñingijilo byaketekelwa kubiwa: Baana batange bulongo bibaaba muji biñambwa-nembwa byapusana-pusa.

Mwingilo wakuuba:

Baana bambe ngipipishilo ya bibaaba.

Bipimo bya ñingijilo byaketekelwa kubiwa: Baana bambe bulongo ngipipishilo ya bibaaba.

Mikumbu yaketekelwa:

Ngipishilo beyambe bulongo kwimena pa bibaaba byapusanapusana byo batanga.

Mepuzho:

Mufunjishi abuule baana kwambapo bimo pa byo bafunda. Apa bino ne aye anungepo.

KIBESE: KUNEMBA

Mutwe: Nsombelo

Muntwe-kache: Nembelo ya byepelo

Buyuke: Bafunda banembe byepelo kwingijisha bipelu biji na mitwe-kata

Mufunjishi:

- Akwashe bafunda kufunda bya kunemba byepelo kwingijisha bipelu biji na mitwe-kata.

Bafunda

- Bafunda bayuke bya kunemba byepelo kwingijisha bipelu biji na mitwe-kata

Mwingilo wakuuba:

Bafunda besambe bepelo biji na mitwe-kata

Bipimo bya ñingijilo byaketekelwa kubiwa: Bafunda besambe bulongo bepelo biji na mitwe-kata

Bipelu bya bafunda bipasheko na bino:

1. Kunemba nsombelo kukwasha kuyuka mulaka bulongo. Mu bibese byonse mu Buuku wa Kufundamo muji kibese kya nsoombelo
2. Nembelo ya nsombelo yavwangamo kunemba, kwingijisha bipelu byafwainwa kutangiwa kwakubula lukatazho, kunemba bisopelo byaoloka, byayimana mu bipelu bulongo
3. Nsombelo ikebewa kunemba bisopelo bya Kikaonde monka mwayila ñambilo ya Kikaonde, kutanga nchikameno yafwainwa kabiji ne kutanchika byepelo mu ndonda bulongo.
4. Pa kuuba amba mufunjishi ayuke ne byo bayuka, wafwainwa kwibapa mutwe wa kunemba nsombelo aku beyatu saka bakyangye kufunda ine

Mwingilo wakuuba: Baana banembe byepelo kwingijisha bipelu biji na mitwe-kata:

Bipimo bya ñingijilo byaketekelwa kubiwa: Baana banembe bulongo bipelu biji na mitwe-kata.

Mikumbu yabo ipasheko na ino:

Kunemba nsombelo kukwasha kuyuka mulaka bulongo. Mu bibese byonse mu Buuku wa Kufundamo muji kibese kya nsoombelo. Kuji bintu bimo byanema byafwainwa kufunda banyike mu lufunjisho lwa nsoombelo.
Nembelo ya nsombelo yavwangamo kunemba, bipelu byafwainwa kutangiwa kwakubula lukatazho, kunemba bisopelo byaoloka, byayimana mu bipelu bulongo. Kunungapo, Nsombelo ikebewa kunemba bisopelo bya Kikaonde monka mwayila ñambilo ya Kikaonde, kwingijisha nchikameno yafwainwa kabiji ne kutanchika byepelo mu ndonda

yafwainwa.

Onkao mambo, **pa kuuba amba mufunjishi ayuke ne byo bayuka, wafwainwa kwibapa mutwe wa kunemba Nsombelo aku beyatu saka bakyangye kufunda ine.** Monka mwaila nnembelo ya banyike mufunjishi wafwainwa kusalapo bikwabo byakonsha kulondelapo kufunjisha.

Mepuzho

Mufunjishi abuule bafunda kwambapo bimo byo bafunda mu luno lufunjisho.

KIBESE: MULAKAZHILO

Mutwe-kache- 1: Bimye-ngubo

Buyuke: Kwingijisha mitundu ya bimye-ngubo bya luno yapusana-pusana

Ntendelelo

Mu kino kibese bafunda basakufunda bya kwingijisha mitundu ya bimye-ngubo bya luno yapusana-pusana

- **Kwingijisha mitundu ya bimye-ngubo bya luno yapusana-pusana**

Mufunjishi

- Abuule bafunda kuuba amba basakufunda pa bimye ngubo bya luno

Bafunda

- Bafunda besambe mitundu ya bimye-ngubo bya luno

Mwingilo wakuuba:

Baana besambe mingilo ya mitundu ya bimye-ngubo ya luno (luno-kache, luno kache-ntwajijilo, luno kata ne luno kata-ntwajijilo.)

Bipimo bya ñingijilo byaketekelwa kubiwa: Baana balumbulule bulongo mitundu ya byubilo byapusanapusana

Mikumbu yaketekelwa:

Mufunjishi abuule bafunda amba mu kino kibese tusakutalanga pa kwingijisha bimye-ngubo bya Luno (Present tense) kwibipusanya monka mwayila mitundu yabyo.

Kimye kyabanyiwa mu bibese bisatu: **Luno, Lunyuma, ne Lutwe.** Kabiji bintu byubiwa nangwa kumwekela mu bino bibese. Onkao mambo, kyambo kya Kimye-ngubo kyayila mu ngubilo ya kyubilo monka mu kimye kyapanyiwa. Mu Kikaonde tuji na Bimye ngubo kukilaila pa jikumi.

Luno kache ke kyubilo kimwasha bintu byubiwa jonse, nabiji *nja, ngipaya, nkomboka, mfunda* ne bikwabotu bipashako.

Luno kache-ntwajijilo ke kimye ngubo kimwasha byubilo bibena kubiwa byatwajijila; biji nobe *mbena kuja, babena kunyema* ne *ubena kufunda*.

Luno kata ke kimye ngubo kimwasha byubilo byaubiwa; nabiji *naingila* ne *baingila*.

Luno kata-ntwajijilo ke kimye ngubo kimwasha kyubilo kyatendekela kunyuma kabiji kyatwajijila kubiwa ne luno nabiji *nababelenga, nabanyemenga* ne *nabafundenga*.

Tumone mashinda a **kimye-ngubo kya luno** kwingijisha kyubila kya “**kwingila**.”kwingijisha *Amiwa* ne *Aye*.

Luno

Kimye ngubo	Amiwa	Aye
Luno-kache	Ngingila	wingila
Luno ntwajijilo	mbena kwingila	ubena kwingila
Luno kata	Naingila	Waingila
Luno kata-ntwajijilo	nabaingilenga	ubaingilenga

Mwingilo wakuuba:

Baana besambe bisopelo bya bya kuyukilako bimye-ngubo bya luno bya byambo

- a. Ngingila
- b. Mbena kwingila
- c. Naingila
- d. Nabaingilenga

Bipimo bya ñingijilo byaketekelwa kubiwa: Baana besambe bulongo bisopelo bya kuyukilako bimye ngubo bya luno bya byambo.

Mikumbu yaketekelwa:

- a. Ñingila
- b. Mbena kwingila
- c. Naingila
- d. Nabaingilenga

Mwingilo wakuuba:

Baana banembe bipelu kwingijisha bimye-ngubo bya luno byapusana-pusana

- a. Wingila
- b. Ubena kwingila

- c. Waingila
- d. Ubaingilenga

Bipimo bya ñingijilo byaketekelwa kubiwa: Baana banembe bulongo bipelu kwingijisha bimye-ngubo bya luno byapusana-pusana.

Mikumbu yaketekelwa:

- a. Kibepesho **wingila** bingi na ngovu jonse.
- b. Aye **ubena kwingila** bingi na ngovu.
- c. Mumba **waingila** kala mingilo.
- d. Ba bombwe **babaingilenga** mingilo ne luno.

Mwingilo wakuuba:

Baana banembe bipelu kwingijisha bimye ngubo bya luno kumwesheshamo biswilo nangwa bikaino

Mu ñaambilo yonse muji biswilo ne bikaino. Pa kumwasha kukana kwingijisha bipelu bya bikayino bitendeka na byambo nobe bino:

Bimwesho:

- a. Kipesho **kechi** wingila **ine**/Kibepesho wingila
- b. Ubena kwingila/**Kechi** ubena kwingila **ine**
- c. Waingila/**Kechi** waingila **ine**
- d. Ubaingilenga/**Kechi** ubaingilenga **ine**

Pano nembulula bino bipelu kwingijisha biika ino:

1. Mubangwapopo wikala mu kinsa.
2. Kyajingatu bulongo kwipayañana ku bena Isalela.
3. Mwanamukazhi wafwainwa kulaajila ku mujilo.
4. Kijitu bulongo kwikangaizha saka wayuka amba wauba kintu.
5. Bantu bonse bakatwela mu bufumu bwa Lesa.

Bipimo bya ñingijilo byaketekelwa kubiwa: Baana baneembe bulongo bipelu kwingijisha bimye ngubo bya luno kumwesheshamo biswilo nangwa bikaino.

Mikumbu yaketekelwa:

1. Mubangwapopo **kechi** wikala mu kinsa **ine**.
2. **Kechi** kyajinga bulongo kwipayañana ku bena Isalela **ine**.
3. Mwanamukazhi **kechi** wafwainwa kulaajila ku mujilo **ine**.

4. **Kechi** kijitu bulongo kwikangaizha saka wayuka amba wauba kintu **ine**.
5. Bantu bonse **kechi** bakatwela mu bufumu bwa Lesa **ine**.

Mwingilo wakuuba:

Baana banembe bipelu bya kutebawisha (Interrogative) kwingijisha bimye-ngubo bya luno.

Mikumbu yaketekelwa:

- a. Maluba wingila nyi?
- b. Nanchi Mumba ubena kwingila nyi?
- c. Abya Kyembe waingila nyi?
- d. Mateo ubaingilenga nyi?

Mepuzho:

Mufunjishi abuule bafunda kwamba byo bafunda. Apa bino, anungepo byo bashapo.

Mutwe 2: Ñambilo Yafyamika

Mutwe-kache: Bishimpi

Buyuke: Kwingijisha bishimpi

Ntendekelo

Mu uno mutwe bafunda basakufunda pa bishimpi ne mingilo yabyo.

Mufunjishi

- Alumbulule mwatala bishimpi
- Abuule bafunda mingilo ya bishimpi

Bafunda

- Bayuke mwatala bishimpi
- Bafunde mingilo ya bishimpi byapusana-pusana

Mwingilo wakuuba:

Bafunda besambe ndumbulwilo ne byo bafwainwa kwingijisha bishimpi

Muntu pa kuuba amba ayuke bishimpi bulongo wafwainwa patanshi kuyuka ndumbulwilo ya bishimpi apa bino wayuka ne mingilo yabyo. Bishimpi bingila mingilo yavula. Kuji bishimpi bingila mingilo ya kufunjisha, kujimuna, kubingisha, kuzhachisha, kukosamika ne mingilotu ikwabo.

Bipimo bya ñingijilo byaketekelwa kubiwa: Bafunda besambe bulongo ndumbulwilo ne byo bafwainwa kwingijisha bishimpi

Mwingilo wakuuba

Bafunda banembe na kwabanya bishimpi mwayila mingilo yabyo yapusana-pusana

Bipimo bya ñingijilo byaketekelwa kubiwa: Baana banembe na kwabanya bulongo bishimpi mwayila mingilo yabyo yapusana-pusana

Mikumbu ipasheko na ino:

Bishimpi	Mingilo
1. Jipila jatukijile ku mwenyi 2. Batala pa bunga ne pa mema 3. Bichi biji pamo byo bishenkana	Kufunjisha
1. Bakonda mukoko wakosa, kechi wanekena ine 2. Tangatanga muja twileta 3. Mwanamulume tonge, uchibikatu wanunga	Kubingisha
1. Biya pa meso bebitekenya 2. Bibusa byaipaile nkawasi 3. Bitobala byo bifwana, lupemvu wafwile biseke	Kujimuna

Mepuzho

Mufunjishi abuule bafunda kwamba byo bafunda. Apa bino, anungepo byo bashapo.

KIBESE: NTUNTULWILO

Mutwe: Ntuntulwilo

Mutwe-kache 1: Mashinda a kutuntulwilamo

Buyuke: Kwingijisha mashinda apusana-pusana kutuntulwilamo kibaaba kufumya mu Kizungu kutwala mu Kikaonde kabiji ne kufumya mu Kikaonde kutwala mu Kizungu.

Ntendekelo

- Mu uno mutwe bafunda basakufunda pa mashinda apusana-pusana a kutuntulwilamo.

Mufunjishi

- Alumbulule mashinda a kutuntulwilamo kibaaba
- Ape banyike mwingilo wa kutuntulula

Bafunda

- Bayuke bulongo mashinda a kutuntulwilamo
- Banembe mwingilo wa kutuntulula kibaaba

Mwingilo wakuuba:

Baana bengijishe mashinda apusana-pusana kutuntulwilamo kibaaba kufumya mu Kizungu kutwala mu Kikaonde kabiji ne kufumya mu Kikaonde kutwala mu Kizungu kwingijisha (ntuntulwilo ya kyambo pa kyambo (literal translation), ya kupingizhapo byambo (substitution), ya kusenga (borrowing/loaning), ya kupikulula byambo bya yenka wo mulaka (transliteration), wa kulumbulula (description) ne wa kukumpakanya generalization)

Tuntulula bino byambo kufumya mu Kizungu kutwala mu Kikaonde.

Once upon a time, in a village of Kasempa, there lived a little boy. His name was Kanyambale. Kanyambale was a happy and clever boy. He loved to play outside and explore the bush.

One day, he found a beautiful flower. The flower was red and had a sweet smell. He loved the flower and decided to take it home.

As he was walking, he met his friend, named Kalulu. Kalulu asked Kanyambale, “What is that beautiful flower you have?” Kanyambale said, “I found it in the bush. It is so pretty and smells so good!”

Kalulu said, “I love flowers too! Can I see it?” Kanyambale showed Kalulu the flower, and they both admired its beauty.

Mukumbu waketekelwa:

Kwajinga pa muzhi umo mu Kasempa, paikalanga kalombwana. Jizhina janji wajinga Kanyambale. Kanyambale wajinga mwanyike walusekelo kabiji wajimukile bingi. Watemenwe kukayila pangye ne kuya na kufwakasha mu jisaka.

Juuba jimo, Kanyambale wataine jiluba jawama bingi. Jino jiluba jajinga jichila kabiji janukijilenga bulongo. Kanyambale watemenwe bingi jino jiluba kabiji wakebelenga kwijitwala ku nzubo yabo.

Byo ayilenga ku nzubo wasambakene mulunda nanji wa jizhina ja Kalulu. Kalulu washikishe Kanyambale amba, “Nga jo jiluba jo wasenda mu maboko jafuma pi? Kanyambale wakumbwile amba, “Najikwijitana mu jisaka. Jawama bingi kabiji jinukila bingi bulongo!”

Kalulu waambile amba, “Ne amiwatu ne atemwa bingi maluba! Tumone ne jimone byo jiji?” Kanyambale wamweshe Kalulu jiluba, kabiji bonse baumvwine bingi bulongo pa kumona buya bwajo.

Bipimo bya ñingijilo byaketekelwa kubiwa: Baana bengijishe bulongo mashinda apusanapusana kutuntulwilamo kibaaba kufumya mu Kizungu kutwala mu Kikaonde kabiji ne kufumya mu Kikaonde kutwala mu Kizungu.

Ntuntulula bino byambo kufuma mu Kikaonde kutwala mu Kizungu.

Byo bapwishe kotalatala jiluba Kanyambale ne Kalulu batatwileko kubwela ku nzubo. Mu jishinda Kanyambale waletelapo mulanguluko. Waambile amba, “Tukabyale jino jiluba mu galadeni wami

pa kuuba amba jikasapuke ne kukoma jikwabo!” Kalulu waswile kabiji bonse babiji bakajimbile jino jiluba.

Juuba jalondejilepo, Kanyambale ne Kalulu bakapempwile. Bafikele pepi na jino jiluba kabiji bakuminye bingi pa kutana kuuba amba jatendeka kusapuka. Basangalele bingi kabiji pa kumona jiluba jatendeka kukoma jikwabo.

Mukumbu waketekelwa:

When they finished admiring the flower, Kanyambale and Kalulu started going home. Then Kanyambale had an idea. He said, “Let’s plant the flower in my garden so it can grow and bloom again!” Squeaky agreed, and they planted the flower together.

The next day, Kanyambale and Kalulu went to visit the flower. To their surprise, it had already started to grow! They were so happy and excited to see the flower blooming again.

Mwingilo wakuuba

- (a) Tuntulula lwimbo lwa kishipa lwa kyalo kya Zambia kufumya mu Kizungu kutwala mu Kiikaonde
- (b) Sobolola ne kulumbulula mashinda a kutuntulwilamo aingijishiwa

Mepuzho

Mufunjishi abuule bafunda kwamba byo bafunda pa ntuntulwilo. Apa bino, anungepo byo bashapo.

KISHINA 3: LUUSA LWA PANYIWA KU BANTU

Bijimo: Mu kino kishina tusa kutala pa byubilo bya bantu byaketekelwa kukikizha mu ntanda ne mu kyalo kyonse pano pa ntanda. Bibese bijimo ke Kuteleka ne Kwamba, Kutanga, Kunemba, Mulakazhilo ne Ntuntulwilo. Kabiji bafunda basakuyuka luusa lwapewa ku bantu ne byo bafwainwa kwilwingijisha pa kuuba amba bekale Bafunda babene.

Auno mutwe usa kuleta buyuke ku bafunda pa luusa lwapewa ku bantu.

Kongola

Juuba jimo nsongwalume wayile na kupota pepala wa kutangamo pakisankanyi kya Solwezi. Wataine nsongwalume mwabi wawwajile jilaya ja manzha-matamba ja kipanyi kya bumulwila-ntanda. Watendekela kumutuka kabiji ne kumubula amba, “Muno mu kyalo kyetu, kechi tuswisha bantu kuvwala bivwalo bya bumulwila-ntanda ine. Mwabi kechi wapewa luusa lwakwimana pa kisankanyi ine.” Papichiletu ka kimye kacheche, paishile nsongwalume, kebesambe ne kwisamba. Nanchi wajinga nchiba mambo wa mukochi. Byo amubujile byo byaubiwe, wamukumbwile amba, “Muntu yense wapewa luusa lwa kuvwala byo atemwa. Kabiji ke mambo akatampe kutopeka

nangwa kwambila mwabi byatama na mambo a kusemwa bu mwabi, mambo kafulumende wakanya.

Byambo Byanema

1. Kibinda
2. Mukeyu
3. Ku pewa luusa
4. Nchiba mambo

5. Malwa

KIBESE: KUTELEKA NE KWAMBA

Mutwe : Mwisambo

Mutwe-kache : Bintu bitulamata

Buyuke: Kwingijisha mulaka wafikilamo bulongo kwisamba pa bintu bitulamata.

Ntendekelo

Bafunda bafwainwa kwikala na buyuke bwa luusa lwapewa ku bantu.

Biñambañamba

- Kipabi kya kunembapo
- Choko
- Buuku wa lufunjisho
- Bikaachi bya byambo

Mwingilo wakuuba:

Mufunjishi:

Mufunjishi abuule bafunda mikambizho ne ndonda ya kwipachikilamo.

Mikambizho ya lupachiko

- Patanshi bafunda bekale na buyuke bwa kwichocheka
- Bafunda bekale na buyuke bwa mutwe wa lupachiko.
- Bekale na bishinka byamwaila mutwe wa lupachiko.
- Mufunjishi akwashe bafunda kwabana bishinka bya kwichochekelamo.
- Abuule bafunda amba,kipanyi kimo kyafwainwa kwikala na bafunda basatu.
- Abano bonse baji na mingilo yakwingila.
- Ñambi mutanshi uji na luusa lwa kupana ntendekelo ya lupachiko.
- Ñambi wabubiji yemwine mwina kuchocheka, wafwainwa kusobolola tonse.
- Ñambi wa busatu nkito yanji ke kupachika nangwa kumweshwa amba abya byonse bya. amba banswishi nangwa bankanyi bya bubela, kabiji amweshe bishinka bine.

- Amone kuuba amba bañambi bonse babena kwipachika na mananka ne manono.

Mepuzho:

1. Muntu yense wapewa luusa lwa kufunda kusuulu
2. Mufunjishi wapewa luusa lwa kupuma bafunda.
3. Muntu yense uji na luusa lwa kwamba.
4. Muntu yense uji na luusa kwikala na bumi.

Bafunda:

Bafunda bechocheke nangwa kwipachika pa mitwe yo bapewa.

- Lupachiko lubiwe na mananka ne manono.
- Balondele mikambizho ya lupachiko lo bebapa kumufunjishi.

Bipimo byañingijilo byaketekelwa kubiwa

Bishinka byatanyiwa, bebyambe bulongo ku bakwabo.

Mepuzho:

Mufunjishi asanchile bafunda pa mingilo yo baingila, panyuma ya kwisamba bimo byo baafunda.

KIBESE: KUTANGA

Mutwe 1: Byambo

Mutwe-kache: Ndumbulwilo ya Byambo

Buyuke: Kwingijisha byambo byafikilamo bulongo

Ntendekelo

Mu kino kibese bafunda basakuyuka kutanga na manono ne kumvwisha bijimo.

Biñambañamba

- Kipabi kya kunembapo
- Choko
- Buuku wa lufunjisho
- Bikaachi bya byambo

Mwingilo wakuuba

Mufunjishi:

- Mufunjishi abuule bafunda kutanga kapambala jishimikila.
- Panyuma ya kutanga kapambala , bafunda batongole bintu byo batangamo.

- Mufunjishi atangijile mwisambo pa byambo biji mu musombelo ifita.
- Ebabuule batange na kumvwisha kibaaba
- Mufunjishi abuule bafunda kukumbula mepuzho afuma mu kibaaba panyuma ya kwisamba mu tubipanyi.
- Mufunjishi atangijile bafunda kulenga bipelu kwingijisha byambo biji mu musombelo ufitu.

Wampa waimene mu kije kya mambo kechi wayukile amba, mambo **a kupewa luusa** pa bintu ke mambo ashupa bingi ine. Ba mulobejile mu kochi na mambo akukanya mwananji kuya mu kufunda kusuulu Mwananji, Bubile wijizhañenye pavula bingi na mambo a bashanji kukana ku mutwala ku sukulu amba posotu akekale **kibinda**.

Nchibamambo wa mwipwizhe amba, iñanyi wa kupele luusa lwa kukanya mwana obe kubula kuya kukusuulu Mu kukumbula waambile amba, “Mwane mwanami. Kafwako uji na luusa lwa ku ngipuzha pabyo nafukula mwane.” Kumvwa **nchibamambo** amba, “Kine wapwisha nyi.” Kumvwa wakumbula amba, “Oh my LORD, nanchi mwateleka.” Wa pishako ne **mukeyu**.

Nchibamambo wamutala mu meso. Wabwela wakunyika kilungi kyanji pa mapepala. Kumvwa amba, “Obewa, wayuka amba lelo jobe ja **malwa** anyi? wakonsha kukumbula nchibamambo byonkabyo anyi? Ubena kuuba ne pa meso **yuku-yuku** nobe bokwe. Amuno mukochi **biyangala**, **myofwe** ne **bitonzhi** bisukwila masukula **tupu-tupu**. Kaleya kajitu mu ngala yami. Kyawama, pa mambo owalenga, mbeni kukukasa myaka itanu. Yanga kukaleya.”

Mwingilo wakuuba 1

Bafunda besambe bino byambo byasalwa kufuma mu jishimikila

A. Byambo byasalwa

1. Kibinda
2. Mukeyu
3. Kupewa luusa
4. Nchiba-mambo
5. Malwa

Mwingilo wakuuba 2

Bafunda baswañanye byambo biji mu A. ne ndumbulwilo iji mu B.

B. Ndumbulwilo ya byambo

1. Ñambilo ya kukosamika
2. Muntu wipaya nyama mungye
3. Kyaswishiwa kubiwa na kafulumende
4. Muntu wa mingilo wingila mukochi

5. Bintu byashupa bya kukankalwa mwakutwala

Bipimo byañingijilo byaketekelwa kubiwa: Bafunda besambe ndumbulwilo ya byambo mo kyaila.

Mwingilo wakuuba 3

Bafunda bengijishe byambo biji mu misombelo ifita kulenga bipelu jikumi.

Kimwesho

(1). Meso ayemukilengatu **yemu-yemu** moabena kuya.

(2). Bantu bakala baji **bitonzhi** bine.

(3) Wampa wa ambijile nchiba-mambo **mukeyu** wa mama nafwa.

Mepuzho:

Mufunjishi asanchile bafunda pa kwibikishako kwingila mingilo bulongo.

Mutwe (2) : Ntangilo Yazhika

Mutwe-Kache: Kutanga ne Kumvwisha

Buyuke: Bafunda batange na kumvwisha bulongo bibaaba muji bya mu mabuuku byapusana-pusana.

Ntendekelo

Mu kino kibese bafunda basakuyuka kutanga na manono ne kumvwisha bijimo.

Biñambañamba

- Kipabi kya kunembapo
- Choko
- Buuku wa lufunjisho
- Bikaachi bya byambo

Mwingilo wakuuba 1

Bafunda batange kibaaba

Mufunjishi:

Mufunjishi obe bino pa kufunjisha:

- Abuule Bafunda kutanga jishimikila kapambala.
- Epuzhe Bafunda biji mu jishimikila.
- Besambe pa byambo biji mu musombelo ufitu.
- Panyuma ya kwisamba, mufunjishi atange jishimikila.
- Mufunjishi atangijijile bafunda kutanga kibaaba.
- Mufunjishi epuzhe mepuzho afikila mu kipimo kya bafunda.
- Pa kupwisha apane mwingilo.

Byambo byanema

- Kufwakesha
- Mimpatata
- Milanguluko
- Lunkana-nkana
- Bizhima
- Kumutebawisha
- Lusongwela
- Bansemi

Bafunda:

- Bafunda bobu bino:
- Batange jishimikila ne kumvwisha.
- Besambe pa mutwe wa jino jishimikila mu bipanyi.
- Bafunda bambe byo bayukapo pa uno mutwe.
- Bakumbule mepuzho onse o bapewa.

Mwingilo wakuuba:

Bafunda batange jino jishimikila na kumvwisha

Luusa lwa Bafunda bonse

Juuba jimo navulukile kuya na **kufwakesha** bamaama ku Kasempa. Nakanjijile sakya pa kitesheni. Myaka yapitapo yavula navulukile myaka yakala yo twajanga ntamba, bampuku, ne bankala, ne kuya mukwasa tuñonyi.

Byo nafikile pa kitesheni kya Solwezi, **nakankamenetu** pa kumona banyike ba bacheche, babakazhi ne babalume, bavwala **tupimpikinya** twatabuka, kabiji twafitatu nobe maloba a mu kanyika. Kwitutala bibye, uba nobe twafuminetu munda ya bainato kufika ne lelo kwa kubula kowapo ine. Pa kumona byobya, **milanguluko** yatatwile **kunkatazha** bingi.

Naikela kimye kyabaya saka ndangulukapotu. Natatwile kwi ipuzha amiwa mwine namba, “Kika kibena kulengela Bafunda babacheche kutanyiwa pa bitesheni kabiji ne kulaala pa bitesheni?” Abe Bafunda nkito yabo ke yakwiba, kulomba ne kutambula kajo ne mali **mulunkana-nkana**. Kabiji byubilo bikwabo, batemwa kutukana matuka abaya bingi. Fwanka naye, yenka wajimanga mangimela ye batela amba jamba nangwa amba **kizhima**.

Naishile kwitapo nsongwankazhi umo ne kutendeka **kumutebawisha** pa kine kintu kyalengejile kunyema kunzubo ne kwiya mu kitesheni. **Byatumbukilemo** ke bya kuuba amba, bansemi bavula kebata maana ku Bafunda ine. Javula bamo bansemi bayatu mukutoma maalwa, kwa kubula kukebela Bafunda maali a sukulu ine. Bimye bimo, natemenwe bingi kusuulu Pano inge nabuula bansemi bami namba, “bampanga ku sukulu na mambo a kubula kupana maali,” bambulanga amba “abyo byakuyuka obe mwine.”

Mukwabo naye waambile amba, “Kikwabo atweba bamo, bansemi yetu babalume betushile bunke na bansemi babakazhi. Baaya ne na kusongola kungi. Kabiji bamo nabo bebasunga kuuba ba mu kamwisho yabo bashinta bingi. **Lusongwela** lwa bansemi yetu babakazhi nalo lwitulengele kunyema pa mazubo. Kabiji bamo banyike nabo bomvwatu bulongo kulondela bakwabo pa bitesheni.”

Kafumulende wafwainwa kumona kuuba amba nsemi yense, wata maana ku Bafunda. **Bansemi** bonse bafwainwa kuyuka amba mwana yense uji na luusa lwa kwikala pa nzubo ya bansemi.

Bafunda:

Bafunda bobo bino:

- i). Batange kampambala byambo biji mu misombelo ifita mu jishimikila
- ii). Bafunda beseke kupana ndumbulwilo ya bino byambo
- ii). Bakumbule mepuzho o bapewa

Mepuzho:

1. Kibaba kitanshi kibena kwamba pa ka?

- a. Pa luusa lwa Bafunda.
- b. Pa kupeepa jamba.
- c. Kupempula
- d. Kufwakesha ba nsemi.

2. Mu jifuka 2, kyambo kya kuuba amba “nakankamenetu” kyatala muka?

.....

3. Kibaba 3, bintu ka byo batambulanga bya lunkana –nkana?

- a) Matuka
- b) Mali ne matuka
- c) Kajo, mali ne bivwalo
- d) Kajo ne mali.

4. Kibaba 3, kyambo kya ‘tupimpikinya’ kyatala muka?

- a) Ke tubivwalo

- b) Ke tubivwalo twipi.
- c) Ke tubivwalo twa tabuka twafita.
- d) Ke tubivwalo twa fita.

5. Kulondela mikambizho ya kafulumende, mwana yense wapewa ka?

- a) Luusa lwa kuya kuskulu
- b) Luusa lwa kuja
- c) Luusa lwakuuba byoakeba
- d) Luusa lwa kufunda ne kulaala pawama.

6. Inge wajinga mu kafulumende, ñanyi bintu byo wakonsha kuuba pa kupwisha luno lukakatazho lwa banyike kulaala pa bitesheni?

.....

7. Nembapo bintu bisatu bilengela banyike kubula kubwela ku bansemi yabo.

- a).
- b).
- c).....

Mikumbu

- 1. C
- 2. Mambo wamwene bintu bya mukatezhe, biji nobe Bafunda baba cheche mumpuzha ya kutanamo ba kulumpe.
- 3. D
- 4. B
- 5. D
- 6. Kwibabwezha ku bansemi/kwiba kebakebela nzubo ya ofaneji.
- 7. Kubula kwibata maana ku bansemi/bamo Bafunda ba temwatu/bansemi yabo batemwa maalwa/ne bikwabotu biji mujishimikila.

Bipimo byañingijilo byaketekelwa kubiwa: Bafunda bengile bulongo mwingilo

Mepuzho:

Mufunjishi abuule bafunda kwamba byo bafunda. Apa bino ne aye anungepo.

Mwingilo wakuuba 3.

Ngipipishilo

Bafunda bepipishe kibaaba

Bafunda:

(a) Bafunda banembe ngipipishilo ya bishinte pa bintu byatama byaubanga banyike pa bitesheni kabiji ne byalengejile amba bafume ku mazubo aba nsemi babo.

Mwingilo wakuuba

(b) Bafunda banembe ngipipishilo ya kibaaba pa bintu byatama bya ubanga banyike pa bitesheni kabiji ne byalengejile amba bafume ku mazubo aba nsemi babo.

Mufunjishi

Mufunjishi obe bino:

- ayuke kuuba amba ajino jishikila bafunda bejiyuka kala
- abuule bafunda amba ngipipishilo iji pa biji
- Atongole lupusano lwa ino ngipipishilo ibiji
- Mufunjishi apane kimwesho kya ngipipishilo yapusana pakuuba amba bafunda bekale na mulangwe wa fwainwa.
- Mufunjishi abuule Bafunda amba kishina kya ngipipishilo ke kuyuka jipuzho byo jibena kwambapo.
- Bafunda batange jishimikila kasa baji na jipuzho mu mutwe.
- Balondele bibena kwamba jipuzho
- Basobolole bishina kulondela jipuzho
- Batanchike bino bishina mundonda kulondela byo biji mu jishimikila
- Kabiji bafunda bafwainwa ne kwingila mu bipungu pa kusobolola bishina

Bafunda

Ngipipishilo mu bishina

Mikumbu ya mwingilo (a)

- Nkito yabo kwiba
- Kulomba
- Kutambula kajo ne mali mu lunkana-nkana
- Batemwa kutukana
- Kupeepa fwanka wa bizhimwa
- Bansemi kubula kwi bata maana
- Bamo bansemi ba yatu mu kutoma maalwa
- Kusha Bafunda na bansemi baba kazhi
- Kusungwa na ba muka mwisho yabo bashinta
- Lusongwela lwa Bafunda bakazhi
- Bamo Bafunda kutemwatu

Mikumbu ya mwingilo (b)

Ngipipishio mu kibaaba

Bansongwakazhi ne bansongwalume batanwa pa biteshenyi, nkito yabo ke kwiba ne kulomba, kabiji batambula kajo ne mali mu lunkana-nkana. Batemwa kutukana ne kupepa fwanka wa bizhima. Kabiji kilengela bano Bafunda kuya mu biteshenyi ke namambo a kuuba amba, bansemi babo kechi bebata maana ine. Bamo bansemi, bayatu mu kutoma maalwa, kabiji ne kusha Bafunda na bansemi babakazhi bunke. Kikwabo nakyo ke kusungwa na bamuka mwisho yabo bashinta. Lusongwela lwa Bafunda babakazhi kyo kimo kabiji ne Bafunda nabo kutemwatu kulondela bakwabo.

Bipimo byañingijilo byaketekelwa kubiwa:

Bafunda banembe bulongo ngipipishilo ya kibaaba

Mepuzho:

Mufunjishi esekeshe na ngovu kumona kuuba amba bafunda bafunda mashinda onse a ngipipishilo.

Mwingilo wakuuba:

Bafunda banembulule kibaaba

Mufunjishi:

Mufunjishi obe bino:

- Mufunjishi apane bibaaba biche-biche byapusana-pusana.
- Mufunjishi abanye baaana mu bipanyi.
- Epuzhe bafunda kutanga bino bibaaba bulongo.
- Bafunda batuluke bishinte ne byambo byanema bijimo.
- Balembulule bibaaba bine mu byambo byabo bene.
- Bafunda bayuke byambo byabemba biji nobe, kukajipa/kuzhingila, kuuba bulanda/kupopomenwa kabiji ne kulepa/buula.
- Kange mupimpule ndumbulwilo ya kibaaba kine kitanshi ine.

Kimwesho

Bafunda batange kino kibaaba bulongo ne kwi kilembulula mwaila mikambizho.

Kibaaba 1

Ndona waumvwine ku muchima bibi. Lukeelo wanyamukile ne kuya ku kipatela. Byo afikile kokwa, Dokotala wa mupimine, ne ku mubula amba, wajinga na kikola ku muchima. Pa kumvwa bya ambile Dokotala, wa popomenwe bingi.

Kibaaba 2

Ndona waumvwine ku muchima kutama. Byo bwakile, waile ku kipatela. Aku ufikatu ku kipatela, Dokotala wa mupine ne kumwambila amba wajinga na lukatazho ku muchima. Pa kumvwa bya mubujile Dokotala, wajinga na bulanda bingi.

Bipimo byañingijilo byaketekelwa kubiwa:

Bafunda balembulule bulongo bibaaba.

Mepuzho

Mufunjishi esekeshe na ngovu kumona kuuba amba bafunda bafunde mashinda onse a ndembulwilo ya ngipipishilo.

Mwingilo wakuuba 5

Mufunjishi:

Mufunjishi obe bino:

- Abuule bafunda kutala pa byambo biji mu Ntangilo Yazhika.
- Abuule bafunda kulenga bipelu kwingijisha bino byambo.
- Patanshi atolepo byambo bisatu apane kimwesho kufuma mu kibaaba.

Mwingilo wakuuba

Bafunda banembe bipelu jikumi kufuma ku byambo biji mu kibaaba kya luusa lwapewa. Bengijishe byambo biji mu musombelo ufita.

Kimwesho

- Kyaipaishe ba mwisho ke **lusongwela** lwabo
- **Byatumbukile** mulufu lwa ba mwisho byatamine bingi.

Bipimo byañingijilo byaketekelwa kubiwa Bafunda balenge bipelu bulongo

Bafunda balenge byambo bulongo

Mepuzho:

Mufunjishi apituluke mu byafunda bafunda mu kwipipisha.

Mutwe 3: Kutanga na Jiwi japeulu

Mutwe-kache: Kutanga na manono

Buyuke: Bafunda batange bulongo bibaaba muji bya mu mabuuku byapusana-pusana na manono

Ntendekelo

Mu kino kibese bafunda basakuyuka kutanga na manono ne kumvwisha bijimo.

Biñambañamba

- Kipabi kya kunembapo
- Choko
- Buuku wa lufunjisho

Mwingilo wakuuba

Mufunjishi

Mufunjishi obe bino:

Mufunjishi abuule bafunda kutanga na manono

- Atange kibaaba na manono
- Ebalombe kutelekesha
- Atange kibaaba na jiwi ja sansansuka
- Abuule bafunda kuta maana ku byambo byashupa bingi
- Mufunjishi ekale kimwesho kuubafunda.
- Atangulule kibaaba mu kubwezhapo javula.
- Atange aku bafunda kasa ba teleka pa kuuba amba,ba labijile byambo bya shupa.
- Pano bika bafunda mu bipanyi ku tanga na jiwi japeulu.

Bafunda batange jino jishimikila

Jishimikila

Na mambo akutemwa mali, inetu umo mu nkambi ya Lusaka, watwajile mwata wanji kwazhima.Ne kumufya ku kibamba pa myaka isatu.Auno shetu washajiletu na biboyongolo byo baingijishanga mukongola bantu mu milombelo.Mema oba ovwelanga bino biboyongolo,be apananga ku Bafunda bakazhi kwipikila bamwata wabo pakuuba amba be batemwe.

Mwingilo wakuuba bafunda

- a) Mufunjishi abike bafunda mu bipanyi,apa bino apane bibaaba bya kutanga na jiwi japeulu.Mufunjishi amone kuuba amba, ubena kuzhokoloka mu bipanyi kumona bafunda byo babena kutanga.

Mepuzho

Mufunjishi atange jino jishimikila ku Bafunda jisatu pakuuba amba batelekeshe ne kulabijila byambo.

Bipimo byañingijilo byaketekelwa kubiwa :Bafunda batange bulongo jishimikila na manono.

Kibese: Kunemba

Mutwe: ngipipishilo

Mutwe-Kache: ngipipishilo ya Bishinte

Buyuke: Kunemba ngipipishilo ya bishinte kufuma ku ubena kutanga.

Ntendekelo

Mu kino kibese bafunda basakuyuka kutanga na manono ne kumvwisha bijimo.

Biñambañamba

- Kipabi kya kunembapo
- Choko
- Buuku wa lufunjisho

Mwingilo wakuuba:

Mufunjishi obe bino:

- Kintu kitanshi mufunjishi wafwainwa kwikala na buyuke bwa ngipipishilo.
- Kuji ngipipishilo ya kibaaba ne ngipipishilo ya bishinte. Abino bifuma mu kutanga jishimikila janembwa.
- Aino ngipipishilo ya bishinte ibena kufuma ku bibena kutangiwa na jiji
- Mu ino ngipipishilo, mufunjishi wafwainwa kutanganga jishimikila, aku bafunda babena kuteleka ne kunemba bishinte
- Mufunjishi anengezhe jishimikila nangwa kibaaba kyafikilamo na kipimo kya bafunda
- Mufunjishi amone kuuba amba, bafunda bapewa kimye kya kuteleka ne kumona kuuba amba banemba bishinte ku londela na jipuzho ja ngipipishilo ya bishinte.

Mwingilo wakuuba Bafunda:

Bafunda bateleke ku kibaaba kyanengezha mufunjishi mwaila kipimo kyabo. Banembe bishinte, akwe mufunjishi saka abena kutanga kibaaba.

Bipimo byañingijilo byaketekelwa: Banembe bulongo bishinte kufuma ku ubena kutanga.

Mepuzho:

Mufunjishi amone amba bafunda baji na buyuke bwa kunemba bishinte kufuma ku ubena kutanga.

Kibese: Mulakazhilo

Mutwe 1: Bimye ngubo.

Mutwe-kache: Bimye Ngubo bya Lunyuma

Buyuke: Kwingijisha bimye ngubo bya lunyuma Byapusana-pusana

Ntendekelo

Mu kino kibese tusakufunda pa bimye ngubo bya Lunyuma .

Biñambañamba

- Kipabi kya kunembapo
- Choko
- Buuku wa lufunjisho

Mwingilo wakuuba

Bafunda bapane ndumbulwilo ne mingilo ya mitundu ya kimye ngubo kya Lunyuma.

Mufunjishi

Mufujishi obe bino:

- Epuzhe bafunda kwamba byo bayuka pa bimye ngubo bya Lunyuma.
- Amweshe buyuke pa bimye ngubo bya lunyuma bya pusana-pusana.
- Epuzhe Bafunda mingilo ya bino bimye ngubo bya lunyuma.

Ndumbulwilo ya kimye ngubo.

Kimye ngubo kyaila mukuuba amba ngubilo ya kyubilo monka mu kimye kyafwainwa.

Kimye ngubo kya Lunyuma muji misango ya ngubo itanu.

- Lunyuma-kache
- Lunyuma kache-ntwajijilo
- Lunyuma kata
- Lunyuma kata-ntwajijilo
- Lunyuma ngubo

Bimye Ngubo bya Lunyuma	Ndumbulwilo
Lunyuma kache	Kitubula pa byubilo byafuma na kubiwa, nabiji nobe naji kubela
Lunyuma kache-ntwajijilo	Kitubula pa byubilo byajikubiwanga biji nobe naji kubelanga/nabelenga
Lunyuma kata	Kitubula pa byubilo byaubiwe. Nabiji nabelele
Lunyuma kata ntwajijilo	Kitubula pa byubilo byaubiwanga. Nabiji Nabelelenga
Lunyuma ngubo	Kitubula pa byubilo byaubiwanga. Nabiji Nabelanga

Mwingilo wakuuba 2

Bafunda bamweshe bisopelo bya bimye ngubo bya mulunyuma ku byubilo byapanyiswa.

Mufunjishi obe bino:

- Abuule bafunda amba lufujisho lo basakufunda lusakutala pa kimye ngubo kya Lunyuma.
- Abuule bafunda amba basakufunda bya kusobolola bisopelo bya bimye ngubo ya lunyuma.
- Mufunjishi anembe byubilo byapusana-pusana pakipabi.

Bishina bya byubilo.

Byubilo

- Wanembele
- Nayile
- Nalekele
- Namwene
- Twatolele

Bishina

- Nemb
- Ya
- Lek
- Mwen
- Tol

Kishina kya Lunyuma (Tense marker)

- W-a-nemb-ele
- N-a-ya-ile
- N-a-lek-ele
- N-a-mwen-e
- Tu-a-tol-ele [Twatolele]
- Yukai amba kisopelo [u] inge kyasambakana na kisopelo [a] kyaluka ke [wa]. Pa kwibyabanya, bibwela ke kisopelo [u] ne kisopelo [a]

Mufunjishi alumbulule bulongo bisopelo bya bimye ngubo bya lunyuma mu bino byubilo ne bikwabo bijimo

w-, n-, n-,n-, tu- abino bipimvwa byaimenako mutwe/subject markers.

-a,-a,-a,-a- and **-a-** abino bipimvwa ke ma tense markers.

Bipimo byañingijilo byaketekelwa kubiwa:

Bisopelo bya bimye-ngubo bisobololwe bulongo

Mepuzho:

Mufunjishi abuule bafunda kwamba byo bafunda. Apa bino anungepo byo bashapo.

Mwingilo wakuuba 3

Bafunda banembe bipelu bya lunyuma jikumi.

Mufunjishi obe bino:

Abuule bafunda kunemba bipelu byapusana-pusana bya lunyuma

Kimwesho

Kyembe **wanembele** nkalata.

Nayile ku kasempa na kumona balongo bami.

Amiwa **nalekele** kuja nshima ya makamba kala.

Namwene ba Kyapamofwe kesha pa mulabasa.

Byo twakombokele ku sukulu, **twatolele** mfuko mukatampe bingi.

Bipimo byañingijilo byaketekelwa kubiwa

Bipelu bya lunyuma binembewe bulongo

Mepuzho

Mufunjishi abuule bafunda kwambapapo bimo byo bafunda.

Mutwe 2 : Ñambilo Yafyamika

Mutwe-kache : Ñambilo

Buyuke:Kwingijisha Ñambilo

Ntendekelo

Mu kino kibese tusakufunda pa ñambilo

Biñambañamba

Kipabi kya kunembapo

Choko

Buuku wa lufunjisho

Mwingilo wakuuba:

Bafunda besambe ndumbulwilo ne bya kwingijisha ñambilo yapusana-pusana

Mufunjishi

Mufunjishi obe bino:

Apane jishimikila muji ñambilo yafyamika.

Abuule bafunda besambe pa ñambilo.

Panyuma ya kwisamba, mufunjishi epuzhe bafunda pa byo bayukapo pa ñambilo yafyamika.

Mufunjishi epuzhe bafunda kutongola ñambilo yafyamika yapusan-pusana

Mitunda ya ñambilo yafyamika yapusana-pusana

Mufunjishi alumbulule mwayila bino byambo

Kabiji apane ne bimwesho byaimenako bino byambo.

- a. Kipashañanyo-muntu
- b. Kintente.

Bimwesho:

(a) **Kipashañanyo-muntu:** Ke kufwanyikizha muntu ku kintu kyabula bumuntu. Nabiji;

-Bichi biji na luusa lwa kwikala pantanda.

-Bunga bwaenda bo bwanokwa.

-Ntanda yamena meno

-Kichi kyazhilenga na mwela

(b) **Kintente:** Ke kukizhamo kutentemesha pa kwamba pa kintu. Nabiji “Awe mwaanamukazhi namutemwa kyakufwa”

Bipimo byañingijilo byaketekelwa kubiwa:

Kwabanya bulongo mitundu ya ñambilo yafyamika

Mepuzho:

Mufunjishi apitulukeko pacheche mu bintu byafunjiwa.

KIBESE E: Ntuntulwilo

Mutwe: Ntuntulwilo

Mutwe-kache: Mashinda a Kutuntulwilamo

Buyuke: Kwingijisha mashinda apusana-pusana kutuntulula jishimikila kufuma mu kizungu kutwala mu kikaonde ne kufuma mu Kikaonde kutwala mu Kizungu.

Ntendekelo:

Mufunjishe abuule bafunda mashinda a kutuntulwilamo bibaaba kufumya mu mulaka umo kutwala mu mulaka mukwabo

Mufunjishi:

Mufunjishi obe bino:

- Ingijisha mulaka wapeela kumvwa.
- Kupimpula ndumbulwilo ya kibaa ine.
- Mufunjishi wapana jishimikila ku bafunda jiji mu kizungu.
- Abuule bafunda kutanga ne kumvwisha kibaaba
- Mufunjishi pamo na Bafunda ba tuntulule jino jishimikila.

Kimwesho

Kibaaba mu Kizungu

Human Rights are essential to every human living on earth. Every person regardless of where one comes from, it be a policy maker, or just old or young, should adhere to the principles of human rights. Its worth to note that human Rights play an intergral role in the protection of the less previlaged people. It is from this poit of view that people are educated on how best they need to live.

Ntuntulwilo ya kibaaba mu Kikaonde

Luusa lwapewa ku bantu lwanema ku muntu yense wikala pano pa ntanda. Muntu yense kwesakana ne koafuma, ekale ntangi wa mu Kafulumende, mukulumpe nangwa mu cheche, wafwainwa kulondela mizhilo ya Luusa Lwapewa ku bantu. Kyanema kuyuka amba, Luusa Lwapewa ku bantu lwingila mingilo yanema mu kuvimbila aba babula ngovu ya kwizhikijila ku bintu. Na mambo a byonkabye, muntu yense wafwainwa kufunjishiwa ngikelo yawama ya kwikajilamo.

Mwingilo wakuuba

Bafunda batuntulule kino kibaaba kufumya mu Kizungu kutwala mu Kikaonde

Help me, heal me Loard, take this pain away because I am broken and shattered. I have gone astray. For give me, cleanse me, wash my sins today. I am lost in my way. I hear the whispers, they are hunting my soul, the shadows of my past, they don't let me go. Now I am the one crying and begging on my knees. I need a new start. PLEASE GOD listen to my desperate cry.

Bipimo byañingijilo byaketekelwa kubiwa:

Kwingijisha mashinda a kutuntulwilamo bibaaba apusana-pusana

Mepuzho:

Mufunjishi abuule bafunda kwambapo bimo byo bafunda. Bamweshe amba bayuka mashinda apusana-pusana a kutuntulwilamo.

KISHINA 4: BUNEME BWA BISHO

Bijimo: Kino kishina, kisakutala pa buneme bwa bisho mubwikalo bwakala ne bwa ano moba. Bino bisakubiwa kupichila mu Kuteleka ne kwamba, Kwingijisha bulongo mulaka mu kwisambapo mo kyawamina nemo kyatamina kulondela bisho, Kutaanga, Kunemba, Mulaka-zhilo apa bino ne Ntuntulwilo.

Kalobo: Mutundu yense uji nabyo yaitabilamo ne bisho bya kulondela. Ñ anyi mutundu wabula kisho? Bazungu nabo baji na byobalondela mu bwikalo bwabo. Twayai tufunde byavula pa bisho ne lwitabilo lwa ba Kaonde. Bino, ke bichechetu bya mu bisho ne lwitabilo.

Byambo byanema

1. Kisungu: Uno ke kamwale ye bafukika, ye batwezha mu mwenge/mu mubuji.

2. Ina kisungu: Inetu/Mwanamukazhi wasema kisungu.
3. Nkembele: Kishimina wa mwanamukazhi ufunda kisungu.
4. Lumbusa/Muluonde: Ka kishimikwa ka kukinga mwikala kisungu. Mo bengijila mingilo yonse yafwainwa kisungu.
5. Ñoma ya kisungu : Ke ñoma yo bembila ne kuzhila kisungu pa kumulupula. Kyo kimye kyo bayukisha ntanda amba kamwale wapya.
6. Musama: Inge bisungu bibiji bya belwila pamo mulumbusa, beita bene amba, ‘musama wami’.
7. Kisho: Ke byobya byubiwa ku mutundu wa bantu, kabiji be bilondela mu bwikalo bwabo bwa pajuuba-pajuuba.
8. Lwitabilo Kuswa kwakuuba amba, abya bibula kumwekana kobiji, kabiji biji na luusa pa bwikalo bwa muntu.

Kibese A: KUTELEKA NE KWAMBA

1. Mutwe: Kuteleka ne kwamba

Mutwe: Minsambo

Mutwe-kache: Munema wa bisho

Buyuke : kwisamba pa misango ya bisho mu manyaunda eetu.

Mwingilo wakuuba: Isambai pa bishimikizho ne lwitabilo pa bisho byenu.

Byakuuba mufunjishi:

Mufunjishi abuule bafunda kwisambapo pa bintu byalamata ku lwitabilo ne bisho bya ba Kaonde.

Ntendekelo:

Uno mutwe wa pakuteleka ne kwamba, muji minsambo yalamata pa munema wa bisho ne mepuzhotu akwabo amwa wamina ne mwatamina bisho.

- **Ndonda ya lufunjisho** Mufunjishi atangijile bafunda mu minsambo yamo kyatamina kwingijisha bisho mu tubipanyi tucheche.
- Apana mepuzho anengezhiwa pa kipanyi pa kipanyi.
- Bafunda besambe monka mwaila mepuzho apewa.
- Mufunjishi ete banembeshi ba mubipanyi mu kupaana byo besambapo.

Biñambañamba: Buuku wa mufunjishi fomu 1, Kikachi kya mashimikila a bisho

Kipimo kyañingijilo kyaketekelwa kubiwa: Bishimikizho ne lwitabilo lwa bisho bisambiwa bulongo.

Mwingilo wakuuba

Isambaipo pa mokyawamina ne mokyatamina kulama bisho mwaila manyaunda enu.

Kipimo kyañingijilo kyaketekelwa kubiwa : Mulaka waingijishiwa bulongo mu misambo yapa byo twaitabilamo mu manyaunda etu.

Byakuuba mufunjishi

- Mufunjishi abanye bafunda mu tubipanyi tuche-tuche mu kwisambapo.
- Mufunjishi alumbulwile bafunda mwaila bino byambo saka akyangye kupana mwingilo wakuuba:

Mwingilo 1

Isambaipo pa bino byambo byanema.

Bafunda basa kwisamba babiji babiji mwaila bino byambo:

1. Mashimikizho
2. Lwitabilo
3. Bisho

Mikumbu ya ketekelwa

1. Mashimikizho: Bishimi byakala kene, bilumbulula ne kukumbula mepuzho abyaikelako bijiko lelo
2. Lwitabilo: ko kuswa amba abya bibula kumweka kobiji. Nobe, Lesa, mipashi, ne bikwabotu.
3. Bisho: Muteeto wa bintu byo twaitabilamo

Mwingilo 2

Mufunjishi abike bafunda mu tumabumba tuche-tuche besambepo pauno mutwe:

‘Mwa wamina bisho ne mo byatamina’.

Kupaana masawakya amu minsambo

Bantomesha bamu tubipanyi bapaane masawakya pabyo besambapo.

Mepuzho

Mufunjishi apezheko mukununga pa milanguluko ya bafunda kwa kubula kapatulula. Panyuma ya bino, eba sanchile bafunda bonse pa kutanamo lubaji mu minsambo.

KIBESE B: KUTANGA

Mutwe1: Byambo

Mutwe-kache: Ndumbbulwilo ya byambo

Buyuke: kwingijisha byambo kwesekana na kipimo kya fomu kijimo bafunda.

Ntendekelo

Uno mutwe usa kutala usa kutala pa byambo byanema ne mo twafwainwa kwibingijisha bulongo.m

■ **Ndonda ya lufunjisho**Mufunjishi alenge kipelu kwingijisha byambo byafunjishiwa kala.

Kimwesho: Bamuka mwinsho, basafwangizha mute uno.

■ Mufunjishi ambile bafunda kwingijisha byambo byafundwa mu bipelu.

Biñambañamba: Buuku wa mufunjishi, Bikaachi bya mingilo, kipabi,ne bikwabotu byafikilamo.

Mwingilo wakuuba 1

Byakuuba mufunjishi

Mufunjishi anembe bino byambo pa kipabi (bbodi):

Byambo

1. Kafunga
2. Lukeke
3. Kakuta-mfungo
4. Nkila
5. Mafumbi

■ Kutanga ne kumvwa

■ ngipipishilo

■ Byambo biji na byambo byafyamika

■ Ndembulwilo ya bipelu

Byambo bya kuyuka:

■ Kuzhijika: kukanya kuuba nangwa kuja kajo kamo-kamo.

■ Kuzukuma: Kukooka mu manungo/ kubula ngovu mu manungo.

- Mafumbi: Bimino bya pusana-pusana bya bantu.
- Kuya ku mwenzhi: Kulupula mashi alusemo kufuma mu bwana-bukazhi .
- Nkila : Misongo ya kukankalwa mwana kusemwa bukiji na mambo akwenda bibi shanji nangwa inanji.
- Kakuta-mfungo: Mwanamulume ubula kwibikako ku mingilo ya kyanakilume.
- Lukeke: Mwana wanteta nangwa amba, wapa maboko/jindemba.
- Kafunga: Ulama kipwilo nangwa
- Kusafwangizha: kupulumuna

Kipimo kyañingijilo kyaketekelwa kubiwa: Ndumbululo ya byambo isambiwa bulongo.

Mwingilo wakuuba:

Kwisamba pa bisho ne lwitabilo lwa ba Kaonde.

Kipimo kyañingijilo kyaketekelwa kubiwa: Byambo byaingijishiwa bulongo mu bipelu.

Mutwe 2: Ntangilo yazhika

Mutwe-kache: Kutanga ne kumvwisha

Buyuke: Katanga ne kumvwisha bibaaba byapusana-pusana bya kipimo kya lufundo/fomu.

Mwingilo wakuuba

Ndonda ya lufunjisho:

- Mufunjishi atange kyepelo na manono, kasa alondela tuchibawilo bulongo.
- Abuule bafunda kutanga bibaaba mu mabuuku abo akutangamo na manono.
- Bomvwishe bulongo bwanembwamo
- Abuule bafunda kukumbula mepuzho alondelapo.
- Mufunjishi ne bafunda besambe pa mikumbu.

KUTANGA BIBAABA

Byakuuba mufunjishi

Mufunjishi atange kibaaba bimye bisatu kasa alondela tuchibawilo, kutanga nobe ubena kwamba, kabiji bukiji-bukiji.

Byakuuba bafunda

Bafunda basombolole kutanga kwa mufunjishi kwa na manono,kasa balondela tuchibawilo mwafwainwa.

BISHO NE LWITABILO

Ba Kaonde baji na lwitabilo lwa bintu bimo byo baitabilamo. Ba Kaonde baitabile amba kuntendekelo kwine, mwanamukazhi bamuzhijikile kuja make ne tufumbe (bampuku banuna). baitabile kuuba amba, inge mwanamukazhi waja kano kajo, ushinka lusemo.

Kununga pa bino, mwanamulume naye, bamukanyanga kuja kalembula, bobwa bwa bandelema, mulembwe ne milombe. Baubanga kino, kuchi amba pa kukoma bwanabulume bwanji bwakakoka ne kukankalwa kusemesha.

Kajo kapasha nobe makoko, bilobo, bilalabwa, pamotu ne bibinda kechi bekajanga ine. Baitabile amba azukumisha mu manungo. Kano kajingatu kajo kakuja Bafunda bacheche ne tukuta-mfungo.

Inetu wafwisha lukeke, bamupapikanga muzhazhi wafuma pakilende po bazhika kano kaana. Baubanga kino pakuuba amba ina mwana akaseme jikwabo.

Inetu inge wasafwangizha, kafunga bekazhikanga kwafyamika kumakyamakya nangwa kimye kya muntu-wa muntu-wa. Nsemi ya uno mwana kechi bamuswishanga kujiila pamo na bakwabo ine poso bamovwa mu muchi pakupitapo ñondo umo. Bivwalo byo afwishishamo, kechi wibivulanga ne, kufikatu ne pa kimye kyo bakamovwa mu muchi.

Kisho kikwabo kya ba Kaonde ke misango ya lwimu. Mwanamulume pakwimuna bako, ukinka jinungo jimo panshi. Bainetu, kibafwainwa ku kinka manungo onse panshi pakwimuna bako nangwa bamfumu. Basetu bakinka manungo onse abiji panshi inge babena kwimuna mfumu nangwa kitumba-mfumu.

Inge mwanamukazhi waya kumwenzhi, kizhila kuteekela kajo bantu. Bachinanga kuuba bino mambo a misongo ya kuchimuna bantu mukyaji.

Inetu inge wanema pamuchima, mwata waji kechi wafwainwa kulaala na Bafundabakazhi bakwabo ine. Inge wasulwa malwa mujino jishinda, mwanamukazhi wikala na nkila.

Abino, ne bikwabotu byabula kunembwa, byo bisho ne lwitabilo luji, nangwa lwajinga na bakaonde kala ne mu ano moba.

Byakuuba Mufunjishi:

Mufunjishi apane mwingilo ku bafunda panyuma ya kwibalumbulwila bulongo bisakiwa mu uno mwingilo.

Mwingilo

Kyaketekelwakuuba: Kukumbula mepuzho apusana-pusana.

Mepuzho:

Sobolapo kisopelo kiji na mukumbu wafikilamo (A,B, C nangwa D)

1. Ñanyi kipelu, mu bino biji kunshi kyaamba pakisho kya bukaonde?

- A Bantu bemuna mfumu kasa bakinka manungo onse panshi.
- B Mwanamulume akinke manungo abiji pa kwimuna bako.
- C Mwanamukazhi kechi wafwainwa kuja make ne, ushinka.
- D Mwanamulume kechi aje makoko ne, azukumisha mu manungo.

2. Bisungu bibiji byo babika mumubuji (mwenge) umo biita amba ...

- A mudala
- B mufwalami.
- C musama
- D mwendela

3. Kikola ka kibela bantu inge baja kajo kateekewa ku inetu wasafwangizha?

4. Nanyi byambo mu kibaaba biji na ndumbulwilo pamo naino:

- (a) Muteeto wakulondela
- (b) Kwimita

Kipimo kyañingijilo kyaketekelwa kubiwa: Mepuzho akumbwiwa bulongo.

Ngipipishilo ya kufuma mu kibaaba

Byaketekelwa kuyuka:kutaanga bibaaba ne kwibipishisha bulongo

Mwingilo wakuuba: Ngipipishilo

Byakuuba mufunjishi:

Mufunjishi alondolwele bafunda bino:

Ngipipishilo ke jishinda jimo ja kulumbulwilamo byambo byavula kupichila mu byambo bicheche.

Mu kino kibaaba, mufunjishi wafwainwa kukwasha bulongo bafunda pa kitemwa kya kisungu mo kyawamine ne mo kyatamina mu ano moba.

Ndonda ya lufunjishoMufunjishi akwashe bafunda bintu byanema bisakiwa mundembelo ya ngipipishilo.

Bimo ke bino:

- Kusala byambo, myanzo nangwa bipelu byanema mu kibaaba.
- Kufumyamo byambo bibena kubula kukebewa.

- Kushinkamika milanguluko pabyo bakusakila kuuba.

Byakuuba bafunda

Bafunda batange kino kibaaba ne kunembapo ngipipishilo.

KISUNGU

Kisungu ke kamwale ye bafukika nangwa ye batwezha mu mwenge. Kino kyubiwa inge bamona amba nsongwakazhi uji na mabele antutu nangwa apitailako pantutu, kabiji uji peepi na kuya ku mwenzhi.

Uno kisungu, bamupaatula ne kumubika mulumbusa nangwa amba muluonde. Kano ke kakishimikwa mwikala kisungu. Kuno ku lumbusa, ko kusukulu ko bamufunda mingilo ya pusana-pusana ne bikwabo byalamata mukukoma kwanji kwa mubiji.

Kununga pa bino, mufunjishi wa uno kisungu bamutela amba nkembele. Uno uji na mwingilo mukatampe wa kukomesha bulongo uno kisungu. Panyuma kupwisha lufundo, nkembele ubula ina kisungu amba kisungu wapya.

Kisungu bamulupula na ñoma ya kisungu. Inge bisungu biji bibiji, bebabika mu mubuji umo. Bano beita bene-na-bene amba musama; kulumbulula amba bisungu bya belwila pamo.

Ñoma yo bebembila, keya kisungu mukubula ntanda amba Bafunda bafikilamo mu kutwela mu masongola.

BYAMBO

Ndonda ya lufunjisho Mufunjishi alumbulwile bafunda bino byambo.

1. Kisungu: Uno ke kamwale ye bafukika, ye batwezha mu mwenge/mu mubuji.
2. Ina kisungu: Inetu/Mwanamukazhi wasema kisungu.
3. Nkembele: Kishimina wa mwanamukazhi ufunda kisungu.
4. Lumbusa/Muluonde: Ka kishimikwa ka kukinga mwikala kisungu. Mo bengijila mingilo yonse yafwainwa kisungu.
5. Ñoma ya kisungu : Ke ñoma yo bembila ne kuzhila kisungu pa kumulupula. Kyo kimye kyo bayukisha ntanda amba kamwale wapya.
6. Musama: Inge bisungu bibiji bya belwila pamo mulumbusa, beita bene amba, ‘musama wami’.

Mwingilo wakuuba: ngipipishilo

Ndonda ya lufunjisho:

Mufunjishi afunjishe ngipipishilo bino:

- Abuule bafunda amba kyanema kusala byambo, myanzo ya byambo ne bipelu byalamata pa bikebewa mu ngipipishilo.
- Babula bafunda panyuma ya kupana kya kumwenako, kunembulula byo basobola mu bikebewa mu byambo byabo bya esekana mubilumbuzhi nabyo baji kusala.
- Mufunjishi, akwashe bafunda mwa kunembela kyepelo kimo kufuma mu byambo bya salululwa.

Mwingilo

Nemba mu byambo makumi atanu, lunengezho lwa kisungu/bisungu.

Ñambulwilo ne ndembulwilo

Mufunjishi apanepo kimwesho kimo ku bafunda pa ñambulwilo ne ndembulwilo.

Kimwesho:

A. Nkembele ye mufunjishi wa bisungu.

B. Tendeka: U

Mukuumbu: *Ufunjisha bisungu, ke nkembele.*

Mufunjishi, bula bafunda banembulule bino bipelu kwa kubula kupimpula ndumbulwilo yabyo:

1. A. Kafuunga bekazhika pamansanga munshi ya kichi kya mwenge.

B. Tendeka: Pamansanga.....

2. A. Kisungu bamufukika mulumbusa bañondo basatu.

B. Pezha: mulumbusa.

3. A. Musama na muntu, ke bisungu byabelwila pamo mu mwenge.

B. Pwisha: bamusama na muntu.

Mutwe 3: Kutanga nsabailo

Mutwe-kache: Katanga nsabawilo kufuma mu bibaaba byapusana-pusana bya kipimo kya lufundo/fomu 1.

Mwingilo:

Ndonda ya lufunjisho Mufunjishi abuule bafunda mwanemena kutanga nsabailo. Kutanga nsabailo kukwasha

- kupeya muntangilo
- kuyuka byambo bipya

- kufikilamo mu kuyuka mulaka
- Ñambilo iwama

Kutanga bibaaba byapusena-pusana

Mufunjishi, atange kibaaba kasa alondela tuchibawilo mo kyafwainwa.

Mufunjishi, atundaike bafunda kutanga nsabawilo na manono pa byalamata ku bisho kufuma mu mabuuku apusana-pusana.

Kipimo kyañingijilo kyaketekelwa kubiwa: Mabuuku apusana-pusana atangiwa bulongo.

Mwingilo

Bafunda bambe mubwipi byo batanga pa bisho.

Bafunda bashilane bene na bene pa byotanga pa bisho.

Mpeyo: Bafunda bapeya

KIBESE C: KUNEMBA

Mutwe-kata: Nsombelo

Mutwe-kache: kunemba makalata

Nsombelo ke mwingilo wa kunemba bisombwa mu kulondela mizhilo yandembelo nangwa mitwe ya pewapo.

Buyuke: Kunemba nkalata mbula-mizhilo bulongo.

MWINGILO WAKUUBA:

Ndonda ya lufunjisho:

- Mufunjishi abuule bafunda mitundu ya makalata.
- Amweshe makalata mitundu ibiji: Nkalata ndonda-mizhilo ne nkalata mbula-mizhilo.
- Apa bino besambe na bafunda mwapusena ano makalata abiji.
- Mufunjishi abuule bafunda nkalata yo basakunda ne kunemba
- Kwiisamba pa mulakazhilo ne bibese bya nkalata mbula-mizhilo

Kipimo kyañingijilo kya ketekelwa kubiwa: Mulakazhilo ne bibese bya nkalata mbula-mizhilo bisambiwa mwafwainwa.

Mwingilo wakuuba:

Mufunjishi alumbulwile bafunda mwapusena ano makalata abiji nobe bino:

Nkalata mbula-zhilo iji na uno musango:

- Uno musango wa nkalata unembwa ku bantu bo twiyuka nabo ne kubo twipwiluluka nabo.

- Paino nkalata, patanwatu adulesi ya mwine nembu.
- Juuba ja kunembelapo nkalata.
- Baswisha kwipipisha byambo, kikatakata bo wipwiluluka nabo. Kimwesho: Lk, kwimenako Lusaka.
- Kwingijisha jizhina jobe ja kine nangwa ja bisela.

Kimwesho:

Kanawije Gulosali,
Keyala yaba Kashimbai,
P.O. Box 130027,
Lwalaba.
18 Nkubo-mukata, 2025.

Kwi mbai wami Kaselampao,

Angi sekapo kino webu. Aka kamwale ko waasangako meso amujilo, uno mulungu pa Kibelushi, bakekalupula mulumbusa. Wikayuka buloongonyi? Kano keka Buwame. Konka katokato meso nobe mwana Lesa ne mikupa yaoloka bulongo.

Lampa mbai, bake balupula muluonde pamo ne Ntengabuya, aka kansongwakazhi ko nashi nkesekwe nako, kamposomoke mukuboko! Ale! Na kubulakotu. Inge ukabuule kwiya, mambo obo ukashalapo.

Mutende bonse babileya bobu bapwa mujilo. Wimunepo ne ki Kalapanshi kyachila meso nobe kitengwe mubwishi.

Shalapo.

Wanji Kilemo

Nkalata ndonda-mizhilo iji nauno musango

- Ino ke nkalata inembwa na byambo bya mushingi.
- Ingijisha madulesi abiji. Imo, ya peulu na kukilujio, yo ya mwine nembu. Washako kapunzha kacheche, apa bino, na kukipiko, adulesi yako ibena kuya.
- Mwikala byambo bya mushingi ke byakipwiluluka ine.
- Kechi mwaswishiwa kwipipisha byambo (nobe: pst - positi ofesi) ine.
- Byambo kechi bikale bya kuchibaule ine.
- Kumpelo ya ino nkalata kunembwe bino:

Napwa amiwa mwane,
akiseпали

ASELI KIPATELA
NRC: 117860/90/1
Phone No. 100569870

Kimwesho: Nkalata ndonda-mizhilo
Kanawije Gulosali,

Keyala yaba Kashimbai,
P.O. Box 130027,
Lwalaba.
18 Nkubo-mukata, 2025.

Kwiba Dailekitala,
Solwezi Kanso,
P/B 564,
Solwezi.

Mushingi mwane,

RE: KWIPUZHAKO NKITO YA BUDALAIWA

Amiwa ne nsongwakazhi wa myaka makumi abiji ne atanu. Kabiji nji na kamutwe kamazha amatamba kabwina Zambia.

Mwane napwishishe kufunda kwami kwa mu Giledi 12 mu mwaka wa 2010. Panyuma ya kufunda kwami, na kafunjile nkito ya budalaiva pa Solwezi Tuledisi. Pano, na tambwile kutupa kya kwendesha myotoka ikatampe.

Nkasekela ne kusanta bingi, inge bwipuzho bwami bake bulangulukepo ne kumpa uno mwingilo wa budalaiva.

Nkapembelela kimye kyenu kimufwainwa mu kunkumbula.

Amiwa wa kishinka,
mamwtels
Mateusa Mwelela
NRC 100365/24/1
Phone: 0977267824

Mwingilo 1

Pusanya nkalata mbula-mizhilo ne nkalata ndonda-mizhilo.

Kipimo kyañingijilo kya ketekelwa kubiwa: Kusolola mpuseno ya nkalata ndonda-mizhilo ne nkalata mbula-mizhilo.

Mwingilo 2

Bafunda banembe nkalata mbula-mizhilo pa muntu pa muntu mukubula balunda nabo pa bisho bya Kikaonde.

Kipimo kyañingijilo ya ketekelwa kubiwa: Nkalata mbula-mizhilo ya nembewa bulongo.

Mepuzho:

Mukino kibaaba, twisamba bulongo pa mitundu ibiji ya makalata. Ano ke Nkalata ndonda-mizhilo ne nkalata mbula-mizhilo. Kununga pa bino, twashilañena ne mwapusena ano makalata abiji.

KIBESE D: MULAKAZHILO

MUTWE1: Tuchibawilo

Mutwe- kache 1: Tuchibawilo

Mwingilo: Kuchibaula bipela na tuchibawilo twafikilamo.

Ndonda yalufunjisho:

Mufunjishi abuule bafunda amba basa kwisamba pa bino:

- Kasambakeno (;)
- Katanchikilo (:)
- Kabazhimukilo (!)
- Kapemeno (,)
- Kapezho (.)
- Kapuzho (?)
- Kisopelo-kata (Upper)
- Kisopelo-kache (Lower case)

Mwingilo

Mfunjishi alumbulwile bafunda mwingilo wa tuchibawilo mu jino jishinda:

1. Kapemeno:

- Kano kachibawilo, kamwasha pafwainwa utanga kukokoloka.

Kimwesho: Byo nafikile ku bwipi, namwene muloolo ufitu.

- Kamwasha mutanchi wa bintu nobe bino:

Kimwesho: Subeta wapotele bishu, matemate, sapola ne mukele pakisankanyi.

2. Kapezho:

- Kano kamweshwa mppelo ya kipelu nobe bino:

Ba Mingiliya ne ba kyakusali betemwa bingi.

- Kumpelo ya byambo bipi nobe bino:

Kimwesho: <https://byjus.com>

3. Kepuzho:

- Ke kachibawilo kamweshwa jipuzho, kengijisha kayukilo ka (?).

Kimwesho: Jizhina jobe wi ñanyi?

4. Kabazhimuko:

- Kano kachibawilo bekengijisha mukuubazhimuna ñumvwino ne milanguluko ya muntu, nangwa kuzakula muchima nobe bino:

Kimwesho: Wafwa! Muloolo o!

- Mukumweshwa lusekelo nangwa bulanda bwa baisha, nobe bino:

Kimwesho: (i) Aha! Napuluka muibila.

(ii) “Mwika! Mwika! Pelawizha iya kuno!” Byo byaichile bainanji.

5. Katanchikilo:

- Kano kengijishiwa muntachikilo ya bipelu nangwa bintu nobe bino;

Kimwesho: (i) Usalepo kimo pa kino kimye: Kunyema nangwa kulwa.

(ii) Bano bo baaya nkuwa: ba Matavu, ba Kiboko ne ba Mumena.

6. Kasambakeno:

- Kunungankanya myanzo ya byambo mu bipelu, nobe bino:

Kimwesho: (i) Naikele ku Lwamadamba, Kasempa; Kyalalankuuba, Solwezi; ne kipemba Kalumbila.

- Kunungankanya myanzo ya bipelu byaila mumo kwakubula kwingijisha kanungilo, nobe bino:

Kimwesho: (i) Tuji na minsambo; isakutatula mute uno.

- Kwabanya byambo byaikela jimo na tupemeno, nobe bino:

Kimwesho: (i) Pa kije pajinga Shayuka Kabole, mu bya bunjimi; ne Shayuka Nyungumeya, wa kunungankanya bikupa; ne Shayuka Tengabuya, mu bya meso.

9. Bisopelo-kata:

- Kingijishiwa kuntendekelo ya kipelu nobe bino:

Kimwesho: Nzolo uji na mayona.

- Kingijishiwa kimye kya kutendeka kipelu na kasuñami nobe bino:

Kimwesho: Aye watemwa kwibapa mali.

- Mazhina abantu ne mapunzha

Kimwesho: (i) Mukola Wa Zambezi

(ii) Jizhina janji, Mulota.

- Mutwe ya mabuuku, bifulo, ne bikwabotu,nobe bino:

Kimwesho: (i) Mwanamulume Kitonzhi

(ii) Ndama Kyalo

8. Kisopelo- kache

- Kingijishiwa ku bintu-seka ne byambo bya byubilo mukachi kabipelu, nobe bino:

Kimwesho: Mwendesha, wapota nkinga,ngolofwana ne mungwala.

Mwingilo:

Nembulula bino bipelu na tuchibawilo twafwainwa:

1. bamaama bataata ne maliya baaya ku kipwilo

2. Kapitao Semeliya wa Fomu 1A Kapitao Kibachila wa Fomu 1B ne Kapitao Kasongo wa Fomu 1 C balaala mu kibamba kimo.

Kipimo kyañingijilo kyaketekelwa kubiwa: Tuchibawilo twaingijishiwa mu bipelu mwafwainwa.

MUTWE 2: ÑAMBILO YA FYAMIKA

Mutwe-kache: Bishimpi

Kipimo kyañingijilo kyaketekelwa kubiwa: kwingijisha bishimpi mu ñambilo.

Mwingilo

Ndonda ya lufunjishoMufunjishi obe bino mu kukwasha bafunda kulumbulula ñambilo yamu bishimpi.

- Alumbulule bulongo ma mpunzha ne bimye byapusana-pusana mo bebingijishishamo .

- Mufunjishi apana bya kumwenako byafikilamo bulongo.
- Engijile pamo na bafunda mukupalanguzha ndumbulwilo bishimpi bimo.
- Mufunjishi atundaika bafunda kwingila mu bipanyi ne bunke-bunke kukumbula mepuzha alamata bishimpi.

Kununga pa bino, mufunjishi abuuze bafunda kimye ne byo bilumbulula bishimpi, nobe bino:

1. Mukupana maana:

(i) **Kishimpi:** Meso abiji maya

(a) **Kimye:** Apa muntu po elangulukila mwine amba wakonsha kwi ubila bintu mu maana anji.

(b) Lufunjisho: Kyawama kufunda ne ku maana abantu bakwenu

(ii) **Kishimpi:** lujimi kechi uji na bikupa ne, bino uji na bulume.

(a) kimye: Inge muntu walengululwa na byo amweka.

(b) lufunjisho: Wakonsha kunekena mujishinda jimo, bino mu jikwabo wakosa.

2. Mukupana bukwasho:

Kishimpi: Mukwenda mukunanda, malubilukilo ku musanza.

(a) Kimye: Inge muntu wafumineko kala ku muzhi wanji.

(b) Lufunjisho: kechi kyawama kulubako ku pempula ko wafumine ine.

3. Mu kufunjisha bwikalo bwa wama

Kishimpi: Kujila kwa jiso kulengela moona kubela kifine.

(a) Kimye: Inge mu mpunzha muji umo uji na lukatazho.

(b) Lufunjisho: kumanama kwa muntu umo, kwa konsha kulengela kisemi ne balunda nanji kumanaminamo.

4. Mukutekenesha:

Kishimpi: Bunga bwa enda bo bwanoka

(a) Kimye: Inge waenda kuya mwabene.

(b) Lufunjisho: Kyawama kufunda kuzhindama inge wafika mu mpunzha ya bene.

5. Mukukosamika

Kishimpi: Munyi wabutolo lukelo uka bwezhapo.

(a) Inge muntu watamisha, bino kuswa kyatama kyo auba ine.

(b) Lufunjisho: Awa ukana kutamisha kwanji, juuba jimo, baka mutaana, kika mulenga bumvu.

6. Kulengulula

Kishimpi: Meema akaba, kechi alubeko amba patanshi ajinga amunyango.

(a) kimye: Inge muntu walubako byo ajinga kala saka akyangye kunonka.

(b) Lufunjisho: Kechi kyawama kuluba byo wajinga kala ine.

7. Mukutota

Kishimpi: Kizhiba kalambwe, ye balambula kuubafunda ba mikola.

(a) Kimye: Kimye kya kutakaika mfumu wa ndondo.

(b) Lufunjisho: Mfumu-kata, utambula bya bupe ne milambu yavula kubo atangijila

8. Kutundaika kwingijila pamo

Kishimpi: Munwe umo kechi utola lukuso ine.

(a) Kimye: Inge bantu kechi babena kwi kwashane.

(b) Lufunjisho: Kwingijila pamo, kuleta bukomo.

Mwingilo

Ndonda ya lufunjisho Mufunjishi abuule bafunda kulumbulula kupwisha bishimpi byo esalulwila aye mwine pamo ne bino biji kunshi:

Pwisha bino bishimpi:

1. (a) Kaja mukulu(pwisha)

(b) Lumbulula mokyaila.

2. Kabwa waiba, washila Bafunda mfika.

(a) Tongala kimye kyo bengijisha kino kishimpi.

(b) Lumbulula mo kyaila.

Kipimo kyañingijilo kyakeketelwa kubiwa: Kwingijisha bishimpi mu mashinda ne bimye byafwainwa byaubiwatu bulongo.

KIBESE E:NTUNTULWILO

Mutwe-kata: Mashinda akutuntulwilamo

Buyuke: Kwingijisha mashinda apusana-pusana akutuntulwilamo kufuma mu kikaonde kutwala mu Kizungu; nangwa kufumya mu Kizungu kutwala mu Kikaonde.

Ntendekelo:

Mu luno lufunjisho, kusakwikala kwisamba pa kilumbuluzhi kya ntuntulwilo, misango ya ntuntulwilo ne bikwabotu byalamata ku ntuntulwilo.

MWINGILO WAKUUBA**Ndonda ya lufunjisho:**

Mufunjishi obe bino mu kukwasha bafunda kuyuka mwa kutuntulwila:

- Patanshi afunjishe mwa kutuntulwila kufuma mu Kizungu kutwala mu Kikaonde.
- Mufunjishi afunjishe misango ya ntuntulwilo.
- Akwashe bafunda kupichila mu byakumwenako, kwingijisha mashinda afikilamo bulongo.

Biñambañamba: Bikaachi paji byambo, myanzo ya byambo ne bipelu mu mulaka wa Kikaonde ne kizungu.

Kulumbulula kyambo kya tuntulwilamo

Kutuntulula ke jishinda ja kutuntulwilamo byaambiwa ne byanembwa kufuma mu mulaka umo ne kutwala mu mulaka mukwabo.

Mashinda akutuntulwilamo**1. Ntuntulwilo ya kupingishapo byambo:**

Kupingishapo kwa byambo mu uno mutundu wa ntuntulwilo wikalako inge kya katazha kulama ndodnda ya byambo mukipelu nangwa mu mukuku wa byambo. Kino kilengela kubika byambo mundonda yapusanako, bino ndumbulwilo ya kipelu kasa yalamwa bulongo.

Kimwesho:

Mulaka mutanshi	Mulaka wabubiji
Another goat. (English)	Mbuzhi mukwabo. (Kikaonde)
Do not despise the finger that feeds. (English)	Kechi usule munwe ukujisha ine.

Inge twalondela pakyambo pakyambo, kikatazha kulama bulongo ndulmbulwilo ya kipelu.

Mwingilo

Mufunjishi abuule bafunda batuntulwile bino bipelu kufuma mu kizungu kutwala mu Kikaonde:

1. Do not transfer your anger to the innocent children.
2. My son drove his car the whole week.

2. Ntuntulwilo ya kulumbulula kyambo

Mu ino ntuntulwilo, kyambo kimo kiji mu mulaka mutanshi, kilumbululwa mu mulaka wabubiji na byambo byavulako pakuuba amba ntuntulwilo yumvanyike bulongo.

Kimwesho

Mulaka mutanshi	Mulaka wbubiji
President (English)	Ndamakyalo (Kikaonde) The leader of the nation (English)
orphanage (English)	Nzubo ya Bafunda bakishale. (Kikaonde) 'A home of orphans' (Trans. English)

Mwingilo:

Mufunjishi abuule bafunda kulangulukapo byambo bimo mu Kizungu ne kwibituntulwila mu Kikaonde bikebewa kulumbululako pakuuba amba ntuntulwilo ilumbuluke nobe bino:

1. Dentist
2. Linguist

Mepuzho

Mu kino kibese kya butanu, twisamba pa ntuntulwilo ne mashinda afwainwa kulondela awa utuntulula kufumya mu mulaka umo, kutwala mu mulaka mukwabo.

KISHINA 5: MAZHIKAKANWA

Bijimo byonse

Mukino kishina tusa kutala pa mazhika-kanwa kulondela bino:

- Kuteleka ne kwamba
- Kutanga
- ngipipishilo
- Kunemba
- Mulaka-zhilo
- Ntuntulwilo

■ Mepuzho

Byonse byaketekelwa: kuyuka misango yonse ya mazhika-kanwa ne mwa kwiakainya.

Kalobo: Juuba jimo Lumima walajile kilola kya bainanji. Nkasanji, Dolika wamumwene ne kumukalukila amba, “Walajilaka kilola kya bamaama?” “Shii!” wamuzhile nkasanji pakanwa ne kumwambila amba, “Kwambane. Nsakukupotela bishiketu wamukaka”.

Labijila: Mufunjishi epuzhe mepuzho kasa asolola butami bwa mazhika-kanwa, ku bafunda.

Byambo byanema:

1. Mazhika-kanwa: Ke mashinda akupaana mali nangawa bintu ku muntu mukwabo pakuuba amba akufyeko ku bintu bikwabo
2. Busulu: kupota ne kupotolweshwa kwa bintu mu kumwenamo nsubo.
3. Lunkanankana: kukanjikizha muntu mukwabo pakuuba amba, amubile byo akeba mulupata
4. Mukika: Makinga nangwa bintu bikanya ngya-lutwe ya muntu.

KIBESE A : KUTELEKA NE KWAMBA

Mutwe-kache : Mwinsambo

Ntendekelo:

Mu mwisambo, kusakwikala kushilañena mepuzho amwatamina mazhika-kanwa.

Byaketekelwa kubiwa: kwisamba pa mwatamina mazhika-kanwa.

Ndonda ya lufunjisho:

- Mufunjishi atangijile bafunda mu minsambo yamo kyatamina kwingijisha mazhika-kanwa mu tubipanyi tucheche.
- Apane mepuzho anengezhiwa pa kipanyi pa kipanyi.
- Bafunda besambe monka mwila mepuzho apewa.

- Mufunjishi ete banembeshi ba mubipanyi mu kupaana byo besambapo.

Mwingilo wakuuba

Bafunda besambe pa ano mepuzho mu tubipanyi twabo:

1. Ñanyi bantu baatemwa mazhika-kanwa?
2. Kika kilengela mazhika kanwa kuya palutwe?
3. Nanchi twafwainwa kupwisha byepi mazhika-kanwa mu kyalo kyetu kya Zambia ne ntanda yonse yapanshi?

Biñambañamba: Bikope, kipabi, makachi a mepuzho, Buuku wa Mufunjishi Fomu 1

Mwingilo wa mufunjishi: Kupaana makachi amepuzho ku bafunda ne kumwesha bikope paji bantu babena kwingijisha mazhi-kanwa.

Kipimo kyañingijilo kya ketekelwa kubiwa: Byambo ne minsambo pa mazhika-kanwa byaubiwa bulongotu.

Mwingilo wakuuba:

Bafunda balumbulule tuyukilo twa mazhika-kanwa mu manyaunda aabo nemo bakonshesha kushinda ano mazhika-kanwa.

Mepuzho

Mufunjishi epuzhe bafunda byo bafunda pa mazhika-kanwa nemo bakakwashisha kwi ashinda. Apa ngipipishilo ya bintu byo bafunda.

Kino kibaaba kyafunjisha pa makatazho amazhika-kanwa ne mashinda mwakwi apwishishamo.

KIBESE B: KUTANGA

MUTWE: BYAMBO

Mutwe-cache: kulumbulula mwatala byambo

- (i) Mazhika-kanwa
- (ii) Buyanji
- (iii) Kubula bukishinka
- (iv) Kisuse kya bintu

(v) Kukepelwa kwa makito mu kyaalo

Mwingila wakuuba

Lenga bipelu bya byambo kwingijisha byambo byo watanga.

Kipimo kyañingijilo kyaketekelwa kubiwa: Kunemba bipelu kwingijisha byambo byatangiwa byaubiwa bulongo.

Kimwesho:

1. Kukepelwa kwa makito mu kyalo kwalengela **mazhika-kanwa** kuubailako.

2. Mazhika-kanwa ... (pwisha)

Labijila: Kipelu kitanshi, mufunjishi ekilenge aye mwine. Kyabubiji, ekilenge pamo ne bafunda.

Bipelu bikwabo, bene bafunda belengele.

MUTWE2: NTANGILO YAZHIKA

MUTWE-Kache: KUTANGA NE KUMVWISHA

Buyuke: Bafunda **batange bibaababya bya pusana-pusana bya nembwa na ba nembu bapusana-pusana.**

Ntendekelo: Mukino kibese mufunjishi ne bafunda basa kwisanba pa kutanga ne kumvwisha, kulumbulula byambo, ne kukumbula mepuzho apusana-pusana

Ndonda yalufunjisho:

Mufunjishi abuule bafunda mwakutangila bibaaba byapusana-pusana.

Mufunjishi kabiji atangijile bafunda muntangilo yazhika.

Bafunda bibaba kulondela mikambizho yakutanga ne kumvwisha.

Apa bino bakumbule mepuzho afuma mukibaaba kyatangiwa.

Biñambañamba:

Kipabi, tuBikaachi twa byambo, mabuuku akufundamo, buuku wamufunjishi.

Mwingilo wakuuba:

Byakuuba mufunjishi: Abuule bafunda kutanga byambo byanembewa patuBikaachi. Apa kabiji kulenga bipelu bya byambo.

Bafunda bobbe mingilo yoba kambzhiwa kuuba

Mazhika-kanwa

Tanga jishimikila ne kukumbula mepuzho alondelapo.

Mu kyalo ne kyalo muji bantu bapusana-pusana. Bamo bepi bakwabo balepa, bafita ne batoka, bafunda ne babula kufunda. Bano bonse bekala mu mapunzha alekana-lekana ne kwingila mingilo ya pusana-pusana. Monka mwayila bino ne mingilo yo bengila yaenda kupusana, bakwabo bengila mingilo ya kufola mali kukafulumende, bakwabo booba busulu, bakwabo nabo batambula mali alunkana-nkana ku bantu bakwabo ne kuuba mazhika-kanwa.

Mazhika-kanwa kejishinda ja kupa muntu mali nangwa bintu pakuuba amba akufye ku mambo nangwa aswe kuuba kyo ukeba. Kabiji ano mazhika kanwa alengela bamo bantu kushukilwamo ne bakwabo kushaminwamo.

Bantu boba mazhika kanwa kechi beobatu ine/ Kuji ne bintu bilengela, kimo kilengela ke buyanji. Buyanji ne mazhika kanwa byendela pamo. Kabiji mazhika kanwa yo nsulo ya buyanji mu kyalo ne mu mapunzha avula. Mazhika-kanwa ayikala ke mukika wa kupwisha buyanji, ne buyanji naabo byonkabyo.

Kya mweshiwa patoka kuuba amba, bantu bayanji bapelelwa mu mashuko a bukwasho bwa mu byo bakajilwa mu bwikalo bwabo. Kipelako ke kwitumpa mu mazhika-kanwa. Bantu bayanji bafwa mukakose ka buyanji kabiji bamona amba, kyakonsha kwibakwashatu ke kukakachila ku mazhika-kanwa ne kupana byabula kuswishiwa pakuuba amba bamone byafwainwa mu bwikalo bwabo bwa pajuuba-pajuuba.

Na mambo abuyanji, byalo byonse bikikoma byo biji peulu mu byubilo byamazhika-kanwa. Bino abya byalo byakoma mu bumamya, biji peulu mu byubilo bya bukishinka.

Mazhika-kanwa javujisha atanyiwa ne kubiwa pakachi ka bantu babiji nangwa bipanyi bibiji, byalo bibiji, mu kafulumende ne mu maofeshi akatampe. Bantu bakwabo betumpa mu mazhika-

kanwa pakuuba amba batambule kyo babena kusaka bukiji. Bimwesho ne misango ya mazhika-kanwa ke bino:

Pa kutwela nkito; inge muntu waikala myaka yavula kwakubula kutwela nkito, wesekesha mashinda onse mwakongwela yewa ubena kutwezha nkito ne kumupa mali nangwa bintu bikwabo. Kabiji aba bobapa mwingilo wa kutwezha bantu makito naabo bakambizha boba bakeba nkito kwiba mali nangwa bintu bikwabo.

Kikwabo, mazhika-kanwa obiwa inge muntu uji na mambo akatampe mu kije kya mambo. Pakuuba amba abuule kufwa nao, ke kupana mazhika-kanwa ku banzhachishi ne oa mambo azhimañana.

Ba mu bipanyi bya bumulwila ntanda naabo boba mazhika-kanwa pakuuba amba bongole michima ya bantu bavula bebvotele. Kechi kyonkakyotu ine bengijisha ne mali a kyalo mu mashinda abula kufwainwa. Abino byonse ne byabula kutongolwa kala byalengela byalo ne mapunzha avula kubula bukomo ne bumanya bwalondoloka mambo buyanji bubena kuyilakotu palutwe.

Na mambo a kusaka kulekesha uno musongo wa mazhika-kanwa, kafulumende wabikako kabungwe katala pa kukankanya kino kisonso ko batela amba, Anti-Kolapush lwa kusopa ñingijilo ya bantu mu kyalo kabiji aba batanyiwa na kisonso kya mazhika-kanwa bakwaoni Komishoni. Kano kabungwe ko kapewa luusa lwa kwibatotolwesho. Inge bafwa nao bebataya pakazhima, ne kwibangata bipe byo banonkele mu byubilo bya mazhika-kanwa.

Mwingilo wakuuba

Nembulula kibaba kya taangiwa mu byambo makumi atanu ne asatu pa bintu bilengela mazhika-kanwa

Kipimo kya ñingijilo kyaketekelwa kubiwa:

Kibaba kya taangiwa kwikinembulula bulongo mu kwikipipisha.

Mwingilo wakuuba:

1. Kwisamba byalumbulula byambo

Kipimo kya ñingijilo kyaketekelwa kubiwa:Byambo byalumbululwa bulongo.

Byambo byanema:

- Kisoonso kipizha kya kuuba bintu
- Kabungwe kajibumba ja bantu bayila mumo
- Buyanji Kubujilwa kwa bintu mu bwikalo
- Kisuse Bono bwa kuuba bintu
- Pa kazhima Kutaiwa mu kaleya

MUTWE-KATA 3: KUTAANGA NA JIWI JAPEULU

Mutwe-kache: kutanga mashimikila akipimo kyabo kufuma mu mabuuku abaneembi apusana-pusana kya kupelawizha.

Buyuke: kutanga mabuuku apusana-pusana bulongo.

Mwingilo wakuuba:

- **Ndonda ya lufunjisho**Mufunjishi atange kyepelo na manono, kasa alondela tuchibawilo bulongo.
- Abuule bafunda kutanga bibaaba mu mabuuku abo akutangamo na manono.
- Esekanye ntangilo ya pa ufunda umo-umo kulondela mizhilo ya ntangilo.

Mwingilo wa bafunda

Bafunda bataange tumabuuku twapusana-pusana twaneembewa naba neembi ba pusana-pusana ne kwiwowa pa kutanga.

Kipimo kyañingijilo kyaketekelwa kubiwa: kutanga na jiwi ja peulu bulongo

Mepuzho

Mufunjishi epuzhe bafunda byo bafunda pa kutanga kwa jiwi ja peulu na manono. Apa bino, apane ngipipishilo ya munema wa kutanga na jiwi ja peulu na manono.

MUTWE: KUNEMBA

Mutwe-kata: kunemba makalata

Buyuke: Kunemba nkalata apusana-pusana bulongo.

MWINGILO WAKUUBA:

Ndonda ya lufunjisho:

- Mufunjishi abuule bafunda mitundu ya makalata.

- Amweshe makalata mitundu ibiji: Nkalata ndonda-mizhilo ne nkalata mbula-mizhilo.
- Apa bino besambe na bafunda mwapusena ano makalata abiji.
- Mufunjishi abuule bafunda nkalata yo basakunda ne kunemba
- Kwiisamba pa mulakazhilo ne bibese bya nkalata mbula-mizhilo

Kipimo kyañingijilo kya ketekelwa kubiwa: Mulakazhilo ne bibese bya nkalata mbula-mizhilo bisambiwa mwafwainwa.

Mwingilo wakuuba:

Pusanya nkalata mbula-mizhilo ne nkalata ndonda-mizhilo.

Kipimo kyañingijilo kya ketekelwa kubiwa: Kusolola mpuseno ya nkalata ndonda-mizhilo ne nkalata mbula-mizhilo.

Kimwesho kya mitundu ya makalata

Makalata aji mu mitundu yapusana-pusana. Ano makalata anembewa mu mashinda apusana-pusana kuila monka mu mambo ene oa nembewa. Muntu wakonsha kunembela kolojanji, mulunda, mulongo nangwa mbayanji nkalata. Kimo kimye wakonsha kunemba makalata kubikamo bya kafulumende, nangwa ku kampanyi. Ano makalata kechi akonsha kwipasha ine. Nkalata ya ku makampanyi nangwa ku bantu bowabula kuyuka nangwa kwipwiluluka nabo iteelwa amba nkalata ndonda-mizhilo aya iya ku balunda netu itelwa amba nkalata mbula-mizhilo. Onse makalata aji na mizhilo. Bino amo aji na ndonda yo babula kuvulañanya.

1. Nkalata ndonda-mizhilo

Nkalata Ndonga mizhilo iji na makeyala abiji, ya kukilujo yo yakwa nemi. Iji kukipiko na munshi yo keyala ko ibeena kuya. Bikwabo bintu bitanyiwa nkalata ndonda-mizhilo ke bino:

- Jizhina nangwa kifulo kya ye wanembela, binembwa munshi ya keyala ku kipiko.
- Kushala kanya ku kipiko kya kipeepala.
- Aino nkalata javula itatula na munema, mambo ukeitambula kechi muyukane kya kine ine. Makalata andonda-mizhilo mu kikaonde, atendeka na “Kwiba.” Panyuma ya keyala ko ibena kuya, palondela mwanzo wa byambo; “Mushingi mwane.”
- Mutwe wa nkalata unembewa munshi ya lwimu lwa mushingi mwane na ku kilojo.

- Kechi unembe muzenze mpuuya ne; nembatu bishinte bine.

Pakupwisha, nembi asaine. Apa bino a nembe jizhina janji bulongo kunshi mu bisopelo-kata.

2. Nkalata mbula-mizhilo

- Keyala inembewe ku kilojo peulu. Munshi ya keyala munembewa juuba janembewa nkalata.
- Javula ano makalata atendeka na “kwi”. Bino nembi wakasuluka kwitatula mujishinda jonse jo atemwa, nobe “Webo”. “Mbai”, nangwatu jizhina ja ukataambula. Kabiji mulaka wingijishiwa mu nkalata-mbula mizhilo naye wakasuluka; ne mulaka wa bulunda.

Kimwesho

1. Aki tanga ino mitundu ya makalata abiji.

Mukinge compound,

P.O. Box 120095,

KASEMPA.

20 Nkubo-mukata,

2025.

Kwiba Manejala,
Sino Maini Mufwashi,
P. O.Box 120130,
Kasempa.

Mushiingi mwane,

RE:KUKÉBA NKITO YA BUMALOONDA

Mbeena kuneemba na kwipuzhako nkito ya bu maloonda pa mukochi weenu. Amiwa ne nsoongwalume wa myaka ya kusemwa makumi abiji, ne mwina Zambia kabiji nji nena kakitupa kamanzhamatamba. Kufunda kwa sukulu wami mwane na pelele mu fomu 2. Mo nalekejile na

maambo kubula ba kunsuunga pa nyuma ya tayikilwa na bansemi boonse babiji. Mwaane nkito ya bumaloonda naki yingilapo kala ku kipamo kya bumi pa myaka isatu. Naketekela kwiingila neenu bingi bulongo.

Nkasanta biingi umvwe ino nkalata yami ya itabizhiwa, kabiji kechi nkakwata ne kulusono kwiya ku nkito ine mwane.

Napwisha mwane.

Amiwa,

kmaplaka

Mapesho kilaka

2. Nkalata mbula-mizhilo

Kyakilika village,
P.o Box 120043,
Kasempa.
15 Nkubo-mukata,2025.

Kwiba maama,

Patanshi mutende mwane. Inge mwakosa kyawama ne amiwa njitu bulongo mwaane. Maama na namba ino nkalata mukusaka kwi muyukishako namba napasa kuya mufomu wanu (1).

Najilemo tukato bitota bitanu na bibiji ne makumi atanu na asatu (780). Atuno tukato twafwainwa kuntwala ku sukulu wa kwikala konka kechi wa kukelela ine. Bino nangwa byonkabyo kechi muchima wami wa kasuluka kuya mu bondingi ine mambo abintu bimo.

Mu bodingi mu kebewa mali avula akulipila, pano anweba kechi mwakoonsha ine. Kikwaabo ke kyakuuba amba, inge mwampotela tukajo kechi ketujanga bunke ine. Mambo aba bakapitao bakasakanga kwibapo inge ine kekukabisha, mute nangwa bufuku kanatu wa kokela. Abino ke byubilo bya mazhika-kanwa. Onkao mambo maama ñuvwai ne kunswisha kuya kusukulu wa kukelela.

Maama nasanta mambo mwañuvwa, kabiji nalaya kwingijisha na ngovu bingi pakuuba amba, nkapase mpeso yami yamu fomu-fo(4) ne kuya kulutwe mu kufunda kwami.

Napwa Amiwa,

Mwanenu,

Kifita.

Mwingilo wakuuba. 1

- **Ndonda ya lufunjisho** Mufunjishi epuzhe bafunda mepuzho a bukiji-bukiji, nobe ano:
 - a. Toongolapo mazhina a ano makalata abiji
 - b. Luumbulula lupusano luji pakacchi ka ano makalata, kabiji epashisha munanyi mashiinda?
- Apane mwingilo ku bafunda wa kunemba nkalata mbula-mizhilo pa muntu bunke-bunke.

Mwingilo wakuuba bafunda

Nemba nkalata mpusa mizhilo kuuba mwisho yobe ne kwiba bula butame buji mu kwitumpa mu kisela kya mazhika-kanwa.

Kipimo kyañingijilo kya ketekelwa kubiwa: Nkalata mbula-mizhilo ya nembewa bulongotu.

KIBESE D: MULAKAZHILO

Bijimo byonse:

Mu kino kibese, mufunjishi usa kwingijila pamo na bafunda pa mitundu ibiji ya bintu. Ino ke 'Kintu-balwa ne Kintu-kabalwe'.

Mutwe-Kata : Bintu

Mutwe-kache: Bintu-balwa ne bintu-kabalwe.

Buyuke: Kwingijisha bintu-balwa ne bintu-kabalwe mwafwainwa.

Mwingingilo

- **Ndonda ya lufunjisho** Mufunjishi alumbulule bino byambo ne kupana bya kumwenako:

1. **Bintu-balwa:** Ke bintu byo twakonsha kuubala.

Bimwesho:

(i) . Mabwe avula; jimo, jibwe..

(ii). Kichi, kimo; Byavula bichi

2. Bintu-kabalwe: Ke biuntu byo twakonsha kubula kuubala.

Bimwesho:

1. Mukele

2. Bunga

- Mufunjishi apane mwingilo wakuuba bafunda bunke-bunke mu kusobola bintu-balwa ne bintu-kabalwe nobe bino:

Mwingilo 1

(a) Sobolamo bintu-balwa mu byambo bya panyiwa.

(i) Lubesha, mwemba, maloba, mema, kinzhilo, lusono, mufunjishi, lukasu.

(b) Sobololamo bintu-kabalwe mu bino bya panyiwa .

(ii) Muuntu, musenga, mukele, bunga, kabanga-banga, mwela, mukaka, bukapondo, buyanji.

Buyuke: kwingijisha bintu balwa ne bintu kabalwe mwafwainwa.

Mwingilo:1

Kwisamba bya lumbulula bintu balwa ne bintu kabalwe

(i) **Bintu balwa** – ke bintu byotubala naangwa kuvuzha, biji bichi bibiji, kichi kimo, mitwe isatu, mutwe umo, jizhiba jimo, mazhiba asatu, munwe umo, minwe itanu.

(ii) **Bintu kabalwe** ke bintu byo tubula kuubala nangwa kuvuzha biji nobe luku, musenga,bunga, fulaulo, shuka,mwela.

Mwingilo:2

Lenga mikuku ya byambo kwingijisha bintu-balwa ne bintu-kabalwe byo mwayuka mu bwikalo bwenu.

Bimwesho:

(a) Mwika watapula mema akowa (mema – kiintu kabalwe)

(b) Ba maama bachimuna nsala ya uma (nsala- kiintu balwa).

Kipimo kya ñingijilo yaketekelwa kubiwa: Bintu- kabalwe ne Bintu- balwa byalumbululwa bulongo.

MUTWE 2: ÑAMBILO YA FYAMIKA

Buyuke: kwingijisha ñambilo ya fyamika.

Mwingilo

Ndonda ya lufunjisho Mufunjishi obe bino mu kukwasha bafunda kupesa-pesa ne kupalanguzha ñambilo ya bifyamiko mwaila mulaka.

- Alumbulule bulongo mwaila byambo bya Mpashañenyo, Ngesakenyo ne Nkinji.
- Mufunjishi apana bya kumwenako byafikilamo bulongo.
- Engijile pamo na bafunda mukupalanguzha ndumbulwilo ya bifyamiko mu bipelu.
- Mufunjishi atundaike bafunda kwingila mu bipanyi ne bunke-bunke kukumbula mepuzha alamata ku ino ñambilo.

(A) Mpashañenyo: Ke ñambilo ya kupashañanya bintu bibiji byapusana kwingijisha kyambo kya nobe.

Bimwesho:

- Kasha waswatu lubilo nobe muketo.
- Kyaliweme, kamusana nobe jitembwe.
- Anosa, jivumo nobe londomekuta.

Mwingilo A: Mpashañenyo

Ndonda ya lufunjisho:

- Mufunjishi, atangijile bafunda kunemba bipelu bunke-bunke, kwingijisha mpashañenyo.
- Mufunjishi abuule bafunda bese kanye byo banemba bene na bene.

Mwingilo:

Mufunjishi, abuule bafunda balenge bipelu bibiji pa muntu pa muntu kwingijisha bipashañenyo.

Kipimo kya ñingijilo kya ketekelwa kubiwa: Kulenga bipelu bya bipashañenyo byafwainwa.

Mwingilo B: Ngesakenyo

Mwingilo:

Ndonda ya lufunjishoMufunjishi obe bino:

- Alumbulule bulongo mwaila kyambo kya Ngesakenyo.
- Mufunjishi apana bya kumwenako byafikilamo bulongo.
- Engijile pamo na bafunda mukupalanguzha ndumbulwilo ya bifyamiko mu bipelu bya ngesakenyo.
- Mufunjishi atundaike bafunda kwingila mu bipanyi ne bunke-bunke kukumbula mepuzha alamata ku ino ñambilo ya ngesakenyo.

(B) Ngesakenyo: Ke ñambilo ya kwesakanya muntu na kintu kyabula bumuntu.

Bimwesho:

- (i) Shibila, bokwe. (Mambo washinta)
- (ii) Awe inetu, muloolo.(Kufutuka muñambilo)

Mwingilo wa bafunda

Bafunda balenge bipelu bya kyabo-kyabo bisatu kwingijisha ngesakenyo .

Kipimo kyañingijilo ya ketekelwa kubiwa: Baingijisha ngesakenyo mo kyafwainwa.

(C) Nkiji:

Mwingilo

Ndonda ya lufunjishoMufunjishi obe bino mu kukwasha bafunda ku nkinji mwafwainwa:

- Alumbulule bulongo mwaila kyambo kya *Nkinji*.
- Mufunjishi apana bya kumwenako byafikilamo bulongo.
- Engijile pamo na bafunda mukupalanguzha ndumbulwilo ya *Nkiji*.
- Mufunjishi atundaike bafunda kwingila mu bipanyi ne bunke-bunke kukumbula mepuzha alamata ku ñambilo ya *Nkiji*.

(D) Nkinji: Ke ñambilo nangwa ndembelo ilumbulula bipusano bya byaketekelwa.

Bimwesho

1. Mwana wafweluka mpeso, bashanji ke kumutota amba, “Mwanami, uji bingi na maana” saka abula maana.
2. “Ushe bunga pangye banzolo baje, nsa kukusanchila.”

Mwingilo

Bafunda balenge bipelu bya nkinji bina,pamuntu-pamuntu.

Kipimo kyañingijilo kyaketekelwa kubiwa: bipelu bya munkiji bya nembewa bulongo.

KIBESE E:NTUNTULWILO

Mutwe-kata: Mashinda akutuntulwilamo

Buyuke: Kwingijisha mashinda apusana-pusana akutuntulwilamo kufuma mu kikaonde kutwala mu Kizungu; nangwa kufumya mu Kizungu kutwala mu Kikaonde.

MWINGILO WAKUUBA

Ndonda ya lufunjisho:

Mufunjishi obe bino mu kukwasha bafunda kuyuka mwa kutuntulwila:

- Patanshi afunjishe mwa kutuntulwila kufuma mu Kizungu kutwala mu Kikaonde.
- Mufunjishi afunjishe misango ya ntuntulwilo.
- Akwashe bafunda kupichila mu byakumwenako, kwingijisha mashinda afikilamo bulongo.

Biñambañamba: Bikaachi paji byambo, myanzo ya byambo ne bipelu mu mulaka wa Kikaonde ne kizungu.

Kulumbulula kyambo kya tuntulwilamo

Kutuntulula ke jishinda ja kutuntulwilamo byaambiwa ne byanembwa kufuma mu mulaka umo ne kutwala mu mulaka mukwabo.

Mashinda akutuntulwilamo

1. Ntuntulwilo ya pakyambo-pakyambo: kutuntulula mulaka umo mukwabo, pa kyambo pa kyambo kwakubula kunungako byambo bikwabo ine.

Kimwesho: Nji na nzala. (Kikaonde)

I have hunger. (English)

I am with hunger, (English)

Kizunguu kine kyalumbuluka ke: ‘I am hungry’.

2. Ntuntulwilo ya kupingakenyapo kintu pakyambo kyabulapo: Ino ntuntulwilo ingijishiwa apa pabujijila.

Kimwesho: Kwingijisha mutwe, maboko nangwa bintu bikwabo mukupezhaako ndumbulwilo.

Kupopwela mu kumwesha kusanta.

3. Ntuntulwilo ya kusenga byambo mu mulaka mukwabo: Kubujijila kwa byambo mu mulaka umo, kulengela kusenga byambo mu yeo mulaka ne kwibizelula.

Kimwesho:

- i. Shuka (Kikaonde) from Sugar(English)
 - ii. Supunyi (Kikaonde) from Spoon (English)
4. Ntuntulwilo ya kulumbulula byambo: Ino yubiwa mu kulumbula akya kyambo kyaingijishiwa mu mulaka, kabiji kya bujijilwa mu mulaka mukwabo.

Kimwesho:

- i. Malaria (English) kikola kya mashika (Kikaonde)
- ii. Dentist (English) Shayuka wa meno (Kikaonde)

Mwingilo

Mufunjishi apane mwingilo kwesekanya na misango yantuntulwilo yapanwa:

(A) Tunntulula bino bipelu kufuma mu Kizungu kutwala mu Kikaonde pakyambo pakyambo:

1. I feel sick this evening.
2. Corruption destroys the nation
3. I shall never support corruption in my life.

(B) Tuntulula kino kibaaba kwingijisha byambo bya kusenga kufuma mu mulaka wa Kizungu.

Corruption stands out to be the best enemy to human kind. Corruption has equally brought about insufficient supply of commodities such as sugar, and minor things such spoons and forks.

Kipimo kyañingijilo yaketekelwa kubiwa: Mashinda antuntulwilo aingijishiwatu bulongo.

Mepuzho

Mu kino kishina, bafunda bafunda pa kuteleka ne kwamba, kutanga, kunemba,mulaka-zhilo, ñambilo ya fyamika ne ntuntulwilo. Bino ne bikwabotu bya nungapo mufunji mwine, byayuka kunengezha ufunda kuuba bulongo mu mulaka wa Kikaonde.

Keechi nkatundayikapo byubilo bya mazhika-kanwa mu bumi bwami ine.

4. lufu – death
mukola – river
jilaya – shirt
5. Open the door
Stop talking
Respect is good.

Mwingilo wakuuba:

Tuuntula kino kibaaba kicheche kufumya mu mu kizuungu kutwala mu kiikaonde.

A corrupt government is described as one which abuses its authority so as to get people do what it wants. Abusing power in this way started a long time ago. For example, the bible forbids people from engaging in corruption when settling cases. This shows that corruption started a long time ago. But corruption of today comes in many forms. There is stealing of public funds and property, nepotism, bribery etc. Corruption destroys the country. It makes the rich to become richer and the poor to become more poorer.

Swakya wa bafunda

Bafunda bapane mikumbu yabo pabyo ba tuntulula kufuma mu Kizungu kutwala mu Kikaonde. Mufunjishi anungepo pa mikumbu ya bafunda.

KISHINA 6: MASHIMIKILA

BIJIMO

Mu kino kishina kya mashimikila; tusa kwisamba pa kuteleka ne kwamba, kutanga, kunemba, mulaka-zhilo ne ntuntulwilo.

Byonse byaketekelwa: kwingijisha mulaka bulongo mu kwamba, kutanga, kunemba ne kulondela mizhilo ya mulaka mu mashimikila akine ne akusomba.

Kalobo: Juuba jimo, kalolo walangulukile kufwekeshapo mulundanji lunyeu. Kino kyajinga kimye kya mwela mebele. Namba atale bibye, kenkese. Oho! Bamwinsho yanji batazha mutwe panshi mauu mwiulu. Kumvwa Kalolo amba, “Mwinsho, mubena kufwila ka?”

Kyakuuba: Mufunjishi abuule bafunda mafunjisho obaketekela kwisambapo mu kino kibaaba.

Byambo byanema

Kukomoka kukumbwa/kutemweshwa kintu

Kitandala Fomu/Guledi

Kuzunzubika kukatazha bakwenu bantu

KIBESE A: KUTELEKA NE KWAMBA

MUTWE: Kwamba mashimikila

Mutwe-kache: Mashimikila a kiine

BUYUKE:

Bafunda bambe mashimikila akiine mwaila kishina kyapanyiwa.

Ntendetekelo:

Pa uno mutwe, bafunda ne mufunjishi basa kushilañena mashimikila akine apusana-pusana. Amo apa kanwatu ne akwabo amu byanembwa.

Biñambañamba:

- Buuku wakufundamo fomu 1
- Kipabi
- Nyuzi pepa
- Tumabuuku twa mashimikila twapusana-pusana

Mwingilo wakuuba

Kwamba mashimikizho akine.

Ndonda ya lufunjishi:

- Mufunjishi usa kutatwilapo kubuula bafunda jishimikila ja kine kufuma mu byanembwa nobe nyuzi pepa nangwa jishimikilatu ja pa kanwa.
- Mufunjishi ayukishe bafunda amba, jishimikila jo apaana jo ja kine.
- Mufunjishi abike bafunda mu tubipanyi tuche-tuche, besambepo pa mashimikila ne kusalapo ja kijisha mu kuwama ja kushilañena mu kalashi wabo.

Byakuuba mufunjishi

- Mufunjishi apaane ku bafunda mabuuku abena kwamba pa mashimikila apusana-pusana.
- Mufunjishi amone amba bafunda babena kwisamba pa mashimikila kufuma mu tumabuuku twatangiwa nangwa twatangiwepo kala.

Mwingilo wakuuba A.

Bafunda bambe mashimikila akine.

Kipimo kyañingijilo kya ketekelwa kubiwa: mashikizho akine aambiwa bulongotu.

Buyuke: kupesa-pesa mashimikila akine

Mwingilo wakuuba B.

Bafunda batongole misango ya mutundu wa mashimikila akine.

Byakuuba mufunjishi:

Mufunjishi apane kyakumwenako nobe bino:

- Bantu bakine
- Mapunzha akine
- Byamwekele byakine
- Milanguluko yapanwa yakine

Mufunjishi abuule bafunda amba, bino ne bikwabotu byalamata kumashimikila akine byafwainwa kusoloka.

Kipimo kyañingijilo kyaketekelwa kubiwa: Misango ne tubibese tukwabo twalamata ku mashimikila akine twasobololwa bulongo.

Mwingilo wakuuba C

Bafunda bambe lufunjisho lobataamo mu mashimikila akine mwaila bwikalo bwabo bwa pajuuba-pajuuba.

Kipimo kyañingijilo kyaketekelwa kubiwa: mafunjisho amwaila bwikalo bwa bantu atainwemotu bulongo.

KIBESE B: KUTANGA

Mutwe 1: Byambo

Mutwe-kache: Ndumbulwilo ya byambo

Buyuke: Kwingijisha byambo byafikilamo pa kipimo kya ba Fomu 1

Mu kino kibese, bafunda basa kwisambapo pa bilumbuluzhi bya byambo ne kwibingijisha mu bipelu.

- **Ndonda ya lufunjisho** Mufunjishi anembe byambo pa Bikaachi ne pa kipabi.
- Mufunjishi apaane ndumbulwilo ya byambo ku bafunda.
- Mufunjishi abuule bafunda kwingijisha byambo mu bipelu.

Biñambañamba: Bikaachi bya byambo, kipabi ne buuku wa kufundamo

Mwingilo 1

Bafunda balumbulule mwaila bino byambo:

- i. Kukomoka
- ii. Kitandala

- iii. Kuzunzubika
- iv. Nkambi
- v. Bilengwa-Lesa

Mikumbu ya ketekelwa:

Kukomoka	kukumbwa/kutemweshwa kintu
Kitandala	Fomu/Guledi
Kuzunzubika	kukatazha bakwenu bantu
Nkambi	ke mpunzha muji bijiji byavula
Bilengwa-Lesa	Bintu byabula kulengwa ku muntu

Kipimo kyañingijilo ya ketekelwa kubiwa: Ndumbulwilo ya byambo, ya lumbululwa bulongo.

Mwingilo 2

Bafunda balengele bipelu kwingijisha byambo bya lumbululwa peulu.

Kipimo kyañingijilo ya ketekelwa kubiwa: Byambo bya ingijishiwa bulongo mu bipelu.

Mepuzho

Mu kino kibese twisamba pa byambo byanema, ndumbulwilo yabyo, ne kwibingijisha bulongo mu bipelu.

MUTWE B: NTANGILO YAZHIKA

Mutwe-kache: Kutanga ne kumvwisha

Buyuke: Katanga ne kumvwisha bibaaba byapusana-pusana bya kipimo kya lufundo/fomu.

Mu kino kibese, mufunjishi ne bafunda basa kuchikamenamo mu kutanga kibaaba, kwisambapo, ne kutundaika bafunda kukumbula mepuzho alamata pa kibaaba kyapanyiwa.

Mwingilo

Kutanga bibaaba.

Ndonda ya lufunjisho:

- Mufunjishi atange kyepelo na manono, kasa alondela tuchibawilo bulongo.
- Abuule bafunda kutanga bibaaba mu mabuuku abo akutangamo na manono.
- Bomvwiwe bulongo bwanembwamo
- Abuule bafunda kukumbula mepuzho alondelapo.

■ Mufunjishi ne bafunda besambe pa mikumbu.

Biñambañamba: Buuku wa Mufunjishi,kipabi ne makachi a mingilo.

MWINGILO WAKUUBA

Mufunjishi abuule bafunda kutanga mwingilo uji pa pepala wa mwingilo ye bapewa panyuma ya mufunjishi kutanga byepelo bimo mu kibaaba.

Tanga kibaaba kyapanyiwa ne kukumbula mepuzho alondelapo

MPITO YA KWA ADAMSON MUSHALA

Ba Adamson Mushala basemekelwe pa muzhi wa Kasambano mu 1935. Uno muzhi waikajile kwipi na Matushi Pulaimale Kusuulu Bashabo bajinga bena muzhi ba Kasambano Mushala ne bainabo bajinga ba Masheka Lutoba.

Munda mwabo bebasemene jikumi; Kibambabwevu, Mutamba Kyalo, Kananda, Samson, Joseph, Patrick ne Friday. Kabiji banyenga yabo keba Mangaliya, Katoko ne Mutena.

Ba Mushala batendekele sukulu wabo pa Kizela sukulu mu nkambi ya Mufumbwe mu 1948 sa baji na myaka ya kusamwa 12. Bapwishile sabu A ne B, kitandala 1 ne 2 ponka pa Kizela Kusuulu

Ba Adamson Mushala baji bingi na maana mu kusuulu Nanchi bapashile bunketu kuya ku Mukinge Mishonyi sukulu mu 1953 na kukafujilako kitandala 3 ne 4. Pa Mukinge paji musinso wa mafolonga bitota bisatu. Po paendanga ba Mushala panshi kukanamina kusuulu

Mu 1956, bapashile kuya ku sukulu waba katanda wa Mutanda River School. Uno naye waji wa Mishonyi . Popo bakafunjijile kitandala 5, Kitandala 6 wa panshi ne wa peulu.

Nangwa bakwabo bapwishishenga masambijilo apeulu obafikilepo, abo batwelelenga makito akuuba nobe bufunjishi ne bukalaliki mu kafulumende. Ba Adamson Mushala bafunjile nkito ya bushilikale. Kyajishamo, kafulumende wajiko muyoyo myaka, wibapele mwingilo ye babujile kukomoka wabu gemu kachi, nkito yamungye.

Palutwe, baikilepo nepa nkito ya munembeshi wa kibiji watajilenga pa lufundo mu kino kyalo kyonse ku ‘freedom house’. Nangwa byonkabo, kibalajile ku muchima bingi, ke kifulo kya bu kulumpe bwa kipamo kitala pa banyama ne bilengwa na Lesa.

Bebayukile ba Mushala saka ba kyangye kusatuka, bebashimuna amba, muntu wa wamine bingi muchima kabiji wa lusa ne kulangulukila bakwabo. Bano kechi bayukilepo kuzunzubika muntu wibakongwela amba “Leta maali ami ine.”

Ku kumbula mepuzho apusana-pusana

1. Ñanyi nkaizhi-kata uji mu jishimikila ja tangiwa?
2. Mu kyepelo 1, muji ñanyi jashi?
3. Mamboka Mushala Adamson, kyo asatukijile?
4. Ñanyi bintu byo twakonsha ku funda pa jishimikila ja Mushala?

5. Jishimikila ja kwa Mushala ja kine nyi ja bubela ?

Kipimo kyañingijilo yaketekelwa kubiwa: Mepuzho akumbulwa bulongo.

MWINGILO 3:

Kunemba ngipipishilo ya kibaaba kyatangiwa.

Byakuuba mufunjishi:

Mufunjishi abuule bafunda kunemba ngipipishilo ya kibaaba kyo bakutanga kwingijisha jino jipuzho:

Jipuzho:

Lumbulula bulongo mu byambo pakachi kamakumi atanu(50) ne makumi atanu na abiji (70) pa mfunjilo yakwa Adamson Mushala.

Kipimo kyañingijilo yaketekelwa kubiwa: kibaaba kyangipipishilo kyanembewa mwafwainwa.

ÑAMBULWILO NE NDEMBULWILO

Mufunjishi apanepo kimwesho kimo ku bafunda pa ñambulwilo ne ndembulwilo.

Kimwesho:

C. Mushala waingijile mwingilo wa bufunjishi.

D. Tendeka: Bufunjishi

Mukuumbu: Bufunjishi, ye mwingilo waingile Mushala.

Mufunjishi, bula bafunda banembulule bino bipelu kwa kubula kupimpula ndumbulwilo yabyo:

4. A. Munda mwabo, be basemene jikumi.

B. Tendeka: Basemenwe.....

5. A. Mushala wafunjile bushilikale ku byalo bya kubushiya

B. Pezha: bushilikale.

6. A. Mushala kechi wayukilepo kuzunzubika muntu wa mukongwele mali ine.

B. Pwisha:kechi kyajinga ku muchima wakwa Mushala ine.

Kipimo kyañingijilo kyaketekelwa kubiwa: Ñambulwilo ne ndembulwilo byaubiwa mwafwainwa.

Mwingilo 3

Bafunda bapaane ndumbulwilo ya bino byambo:

1. Katanda
2. Gemu kachi
3. Kusatuka

Kipimo kyañingijilo kyaketekelwa kubiwa: Ndumbulwilo ya byambo isambiwa mwafwainwa.

MUTWE C: KUTANGA NSABAILO

Mutwe-kache: Kutanga nsabawilo kufuma mu bibaaba byapusana-pusana bya kipimo kya lufundo/fomu 1.

Buyuke: Kutanga mabuuku anembwa ku banembi bapusana-pusana kwesekana na kipimo kya bafunda.

Mwingilo:

Ndonda ya lufunjishoMfunjishi abuule bafunda mwanemena kutanga nsabailo. Kutanga nsabailo kukwasha

- kupeya mu ntangilo
- kuyuka byambo bipya
- kufikilamo mu kuyuka mulaka
- Ñambilo iwama

Kutanga bibaaba byapusana-pusana

Mufunjishi, atange kibaaba kasa alondela tuchibawilo mo kyafwainwa.

Mufunjishi, atundaike bafunda kutanga nsabawilo na manono pa byalamata ku mashimikila akine kufuma mu mabuuku apusana-pusana.

Kipimo kyañingijilo kyaketekelwa kubiwa: Mabuuku apusana-pusana atangiwa bulongo.

Mwingilo

Bafunda bambe mubwipi byo batanga pa mashimikila akine.

Bafunda bashilañene bene na bene pabyo batanga pa mashimikila akine.

Mpeyo: Bafunda bapeye muntangilo.

Kipimo kyañingijilo kyaketekelwa kubiwa: Kibaaba kyatangiwa ne kwipipishiwa mo kyafwainwa.

NGIPIPIHILO

Mutwe: Ngipipishilo

Mutwe-kache:Ngipipishilo ya kunemba tumitwe twa bishinte

Buyuke: Nemba tumitwe kufuma mu byanembwa

Ntendekelo

Mu uno mutwe wa ngipipishilo, tusa kufunda mashinda mwa kunemba tumitwe twa bishinte kufuma mu byanembwa.

- **Ndonda ya lufunjisho**Mufunjishi abuule bafunda mashinda mwa kusobwela tumitwe twa bishinte kufuma mu byanembwa.
- Mufunjishi abuule bafunda bya kwingijisha ino tuno tumitwe twa bishinte mu lenga kyepelo kimo.
- Mufunjishi abanye bafunda mu tubipanyi twa bantu baesekana mu kwingila uno mwingilo.
- Mufunjishi, abuule bafunda kwesekanya tumitwe twa bishinte kufuma kufuma ku kipanyi kimo ne kuya ku kikwabo.

Biñambañamba: Buuku wa Mufunjishi fomu 1, bikadi bya mashimikila, ne bikwabotu.

MWINGILO wakuuba 1

Isambaipo pa musango wa ngipipishilo ya kusalamo tumitwe kufuma mu bibaaba.

Kipimo kyañingijilo ya ketekelwa kubiwa: Misango ya muntundu wa ngipipishilo ya tumitwe twa tuheche isambiwa bulongo.

Byakuuba mufunjisho:

Mufunjishi abuule bafunda bikebewa munembelo ya ngipipishilo ya tumitwe twa tuheche, nobe bino:

- Ikala na ndembelo ipi, nobe Lk(Lusaka), Kik (Kikaonde)
- Kusobolola bishinte byanema mu kibaaba
- Kunembatu biji mu kibaaba
- Kunembewa mu byambo byobe obe mwine.
- Isolola ndumbuluzhi ya kibaaba mu bwipi.

Mwingilo

KUNEMBA BISHINTE KUFUMA MU BYANEMBWA

Mpaji ke masongola a kusongola bana bakazhi babiji nangwa bavula kabiji kyaikala kisho kya ku lunyuma mu bu Kaonde ne mitundu ikwabo mwaya Zambia.

Mpaji yanemene bingi ku bashakulu mambo yanunganga munema (mushingi) ku bifulo nangwa bwikalo bwabo. Kyaji kiyukilo kya buukulumpe ne butangi bwa kitemwa biji bena muzhi, bitumba mfumu ne mafumu. Okao mambo kechi kyasekele ku taana nsongwalume wapajika ine. Bakwabo bapajikanga ke bañanga ba lubuko ne bibinda bikatampe. Mino bamo bantu ba amba mpaji yawama kubula kubujijilwa bya kuja, mambo umu wamukazhi umvwe wabula kajo mukwabo uji naako ukonsha kunengezha.

Bapajika bamba amba, bana bakazhi babiji kechi bakoka na mingilo ya mukachi ne pangye ya nzubo ine, mambo mingilo ikala ya kutembakena. Batwajijila amba, mwana mulume wa mpaji kechi uyanda ine mambo umvwe mukazhi umu wafumapo, wakolwa nangwa wafwa, mukwabo washalapo utwawajijila na kwingijila mwata wanji. Banungapo amba mwana mulume wa mpaji wakosha kusema bana bavula kukila ujina mwanamukazhi umu mambo kechi upembelela amba mwana akikome ine.

Byakuuba bafunda

Pano nembapo mitwe itanu(5) kufuma mu jishimikila ilengela bantu kusongola mpaji.

Mikumbu yaketekelwa

- Kunungako munema
- Kabuukulumpe ne luusa
- Kupezha mingilo panzubo ku banabakazhi
- Kusema Bafunda bavula
- Kukepeshako kupapala kwa mwanamulume

Kipimo kyañingijilo kyaketekelwa kubiwa: Bishinte bya tumitwe twa tuचेचे byasololwa ne kunembewa bulongo.

Mepuzho

Mukino kibese kya mutundu wa ngipipishilo wa tumitwe twa tuचेचे, twashilañena musango wayo ne kukumbula mepuzho apa kibaba, panyuma ya kwisamba bulongotu.

KIBESE D: MULAKAZHILO

Mutwe: Bintu

Mutwe-kache: Kintu-zhina ne Kintu-seka

Buyuke: Kwingijisha Bintu-zhina ne Bintu-seka

Ntendekelo:

Pa uno mutwe tusa kwisamba pa ndumbulwilo ya bintu-zhina ne bintu-seka. Kununga pa bino, kusa kwikala ne sobolamo mu bipelu bintu-zhina ne bintu-seka.

Biñambañamba: Kipabi (bbodi), Bikaachi bya byambo ne bipelu, Buuku wa Mufunjishi.

Mwingilo wakuuba1

Isambai pa ndumbulwilo ya bintu-zhina ne bintu-seka.

Byakuuba mufunjishi

Mufunjishi akwashe bafunda mwaila ino mitundu ya bintu ne kupanapo bya kumwenako nobe bino:

1. **Kintu-zhina:** Ke mazhina abintu bishinkamika muntu, mpunzha, kintu nangwa kabungwe, kabiji bitatula na bisopelo-kata.

Kimwesho: Mukola Wa Zambezi, Mutumba Kamusongolwa, Mufumbwe, Kalumbila.

Kyapatoka waya ku Solwezi. (Bintu-zhina: Kyapatoka ne Solwezi)

2. **Kintu-seka:** Bintu bya seeka, bibalwa, bibula kuubalwa, bimweka ne bibula kumweka. Bino kechi bishinkamika pa kintu kimo ne.

Kimwesho: Bichi, banyama, bantu, ne bikwabotu.

Bichi	Banyama	Bantu
kapwi	Kasha	muchainizi
mubaanga	nkumba	mwenye
musafwa	bookwe	bafiita
mutobo	kisumpa	batooka

Mwingilo 2

Sobola bintu-zhina ne bintu-seka mu bino bipelu:

Mufunjishi anembe bipelu pa kipabi nangwa apaane Bikaachi paji bipelu.

Bafunda bakumbule ano mepuzho:

(a) Sobola bintu-zhina ne bintu-seka mu bino bipelu:

1. Mwashu watema kichi.

2. Mukola wa Zambezi wabaya bingi.

(b) Lenga bipelu bibiji kwingijisha kintu-zhina ne kintu-seka.

(1) -----

(2) -----

Mikumbu ya ketekelwa

- (a) 1. Mwashiki Kintu-zhina; Kichi Kintu-seka
2. Mukola Kintu-seka; Zambezi Kintu-zhina

(b) Mufunjishi mwine amone mikumbu ya fikilamo.

Kipimo kyañingijilo yaketekelwa kubiwa: Bipelu bya nembewa bulongo kwingijisha bintu-zhina ne bintu-seka.

Masawakya

Bafunda bapaane ma sawakya pa mingilo yo bauba. Mufunjishi anungepo pa milanguluko ya bafunda.

Mepuzho:

Mufunjishi apituluke mu mitwe ikatampe pa lufunjisho lwa bintu-zhina ne bintu-seka ne kutundaika bafunda kwingijisha bino bintu mu bwikalo bwabo moba onse.

MUTWE 2: ÑAMBILO YA FYAMIKA

Mutwe-kache: Bishimpi

Buyuke: Kwingijisha bishimpi

Ntendekelo

Mu kino kibaaba, muji kufunda mwa kuyukila ñambilo ya bishimpi ne mwa kwibingijisha bulongo kwesekana na mpunzha ne kimye.

Biñambañamba: Kipabi, mabuuku a bishimpi, mabuuku akufundamo, Bikaachi bya byambo.

Mwingilo 1:

Tongolapo bishimpi bimo byakonsha kwingijishiwa mu bimye bimo ne mu mapunzha apusana-pusana.

Byakuuba mufunjishi:

- Mufunjishi ne bafunda besambepo pa mitundu ya bishimpi mukikaonde.
- Mufunjishi apane mwingilo kuubafunda balumbulule ne kupwisha bishimpi bya kipelezha.
- Mufunjishi apane mwingilo kuubafunda wakwingila bunke-bunke.

Byakuuba bafunda:

Lumbulula bino bishimpi ne kutongola mu bimye mo bebingijishisha:

1. Munda mukyabu
2. Walaala mujito kechi umvwa ncholokone
3. Makoko alembalele oapyana

Mikumbu ya ketekelwa:

1. Munda mukyabu
 - (a) Kimye: kupusana kwa byubilo kwa Bafunda basemwa jivumo jimo.
 - (b) Kilumbuluzhi: munda mufuma Bafunda baji na byubilo byapusana.
2. Walaala mujito kechi umvwa ncholoko ine.
 - (a) Kimye: Pakufunda muntu ubena kutwela mubuntangi.
 - (b) Kilumbuluzhi: Muntu umvwe watwela mubuntangi kechi kyawama kuta muchima kubyamba babula mubuntangi ine.
3. Makoko alembalele opyana.
 - (a) Kimye: kyakulengulula muntu na mambo amwekelo yanji.
 - (b) Kilumbuluzhi: kechi kyawama kulengulula muntu na mambo amwekelo yanji ine mambo wakonsha kwingila nangwa kumwesa byakukumya.

Kipimo kyañingijilo kyaketekelwa kubiwa: Bishimpi byaingijishiwa bulongo kwesekana na mpunzha mo ebifwainwa.

Mwingilo 2

Byakuuba mufunjishi

Mufunjishi abuule bafunda amba usa kwibapa kya kumwenako, apa bino ebape bishimpi byo basa kutongolatu kimye kyo be bingijisha pa muntu pa muntu.

Byakuuba bafunda

Bafunda batongole kimye nangwa mashinda mo bengijishisha bino bishimpi:

1. Bichi biji pamo byo bishenkana
2. Kalanda komi pakufwa kaji na bene.

3. Ufwila pabengi bamwalawila.

Mikumbu ya ketekelwa:

1. Inge bantu bekala pamo babena kutoboka nangwa kulwa.
2. Inge muntu walengululwa wabela nangwa kufwa; kyo kimye kimweka baloongo.
3. Inge muntu wafikilwa na makatazho paji bantu bavula, baji na bulume bwa kukwasha.

Kipimo kyañingijilo kyaketekelwa kubiwa: Mashinda mwa kuyukila bimye bya kwingijishishamo bishimpi, aingijishiwa bulongo.

Mepuzho

Uno mutwe wakutalanga pakuyuka kimye kya kwingijishishamo bishimpi ne mwa kwibilumbulwila bulongo.

KIBESE E:NTUNTULWILO

Mutwe: Ntuntulwilo

Mutwe-kache: Mashinda akutuntulwilamo

Buyuke: Kwingijisha mashinda apusana-pusana akutuntulwilamo kufuma mu kikaonde kutwala mu Kizungu; nangwa kufumya mu Kizungu kutwala mu Kikaonde.

Ntendekelo

Mukino kibese, mufunjishi ne bafunda basakwisambapo pa mashinda apusana-pusana antuntulwilo.

MWINGILO WAKUUBA

Ndonda ya lufunjisho:

Mufunjishi obe bino mu kukwasha bafunda kuyuka mwa kutuntulwila:

- Patanshi afunjishe mwa kutuntulwila kufuma mu Kizungu kutwala mu Kikaonde.
- Mufunjishi afunjishe misango ya ntuntulwilo.
- Akwashe bafunda kupichila mu byakumwenako, kwingijisha mashinda afikilamo bulongo.

Biñambañamba: Bikaachi paji byambo, myanzo ya byambo ne bipelu mu mulaka wa Kikaonde ne kizungu.

Kulumbulula kyambo kya tuntulwilamo

Kutuntulula ke jishinda ja kutuntulwilamo byaambiwa ne byanembwa kufuma mu mulaka umo ne kutwala mu mulaka mukwabo.

Mashinda akutuntulwilamo

3. Ntuntulwilo ya pa kyambo pa kyambo:

Kuno ke kutuntulula kwa pakyambo pakyambo, kwa kubula kutaya ndumbulwilo.

Kimwesho:

- (i) English: God is good
Kikaonde: Lesa wawama.
- (ii) English: go
Kikaonde yanga
English: Go to the market
Kikaonde **Yanga ku kisankanyi.**

Inge twalondela pakyambo pakyambo, kikatazha kulama bulongo ndulmbulwilo ya kipelu.

Mwingilo1

Mufunjishi abuule bafunda batuntulwile bino bipelu kufuma mu kizungu kutwala mu Kikaonde:

3. Sit down.
4. Sit on the mat.

4. Ntuntulwilo ya kwingijisha byambo byaseeka

Mu ino ntuntulwilo, mukebewa kwingijisha byambo byaseeka mu yeo mulaka.

Kimwesho

English	Kikaonde
1. He came in a land cruiser.	Waishile na motoka.
2. Jet fighter	Ndeke

Mwingilo 2:

Mufunjishi abuule bafunda kulangulukapo byambo bimo mu Kizungu ne kwibituntulwila mu Kikaonde byaseeka nobe bino:

3. Lotion/Vaseline

Bafunda bapane masawakya pa byo besambapo. Mufunjishi anunge pa masawakya abafunda mwaila milanguluko yanji.

Mepuzho

Mu kino kibese kya butanu, twisamba pa ntuntulwilo ne mashinda afwainwa kulondela awa utuntulula kufumya mu mulaka umo, kutwala mu mulaka mukwabo.

KISHINA 7 : LUPIMPU LWA LUBESHA

Bijimo: Kino kishina, kisakutala pa lupimpu lwa lubesha. Bino bisakubiwa kupichila mu Kuteleka ne kwamba, Kwingijisha bulongo mulaka mwi kwisamba pa lubesha, Kutaanga, Kunemba, Mulaka-zhilo apa bino ne Ntuntulwilo.

Kongola: Mwaka waabanwa mu bipungu bibiji, kisalo ne mayoo. Mu mayoo muji bañondo batanu na umo ne kisalo nakyo kiji na bañondo ba tanu na umo. Pano ino myaka, bintu bya pimpulwa na mambo aku pimpulwa kwa lubesha ako kwaiya na mambo aku tema-tema bichi. Kubula mvula mu kimye kyafwainwa kwaleta bunji ne byubilo byabula kulumbuluka mu bantu.

BYAMBO BYANEMA

- Mazhika kanwa
- Buyanji
- Miyulo
- Makito
- Bukelakela
- Byashi
- Bikola
- Twishi
- Lunkunzha

KIBESE A: KUTELEKA NE KWAMBA

Mutwe: Mwinsambo

Mutwe-kache: Bintu bitulamata

Buyuke: kwingijisha mulaka wafwainwa mu kwisamba pa lupimpu walubesha.

NTENDEKELO

Mu kino kibese bafunda basa kwisamba pa kuteleka ne kwamba. Bimye byavula basa kusakiwa kwingijisha mulaka bulongo.

Kibese A: KUTELEKA NE KWAMBA

2. Mutwe: Kuteleka ne kwamba

Mutwe: Mwinsambo

Mutwe-kache: Bitulamata (Lupimpu walubesha)

Buyuke : Kwingisha mulaka bulongo mu kwisamba pa bintu bitulamata

Mwingilo wakuuba: Isambai pa bishimikizho ne lwitabilo pa bisho byenu.

Ntendekelo:

Uno mutwe wa pakuteleka ne kwamba, muji minsambo yalamata pa munema wa bisho ne mepuzhotu akwabo amwa wamina ne mwatamina bisho.

Biñambañamba: Bipikicha, Kipabi, Makadi aminsambo, ne bikwabotu

- **Ndonda ya lufunjishi**Mufunjishi atangijile bafunda mu minsambo ya lupimpu lwa lubesha mu tubipanyi tucheche.
- Apaane mepuzho anengezhiwa pa kipanyi pa kipanyi.
- Bafunda besambe monka mwaila mepuzho apewa.
- Mufunjishi ete banembeshi ba mubipanyi mu kupaana byo besambapo.

Mwingilo 1:

Bafunda besambe pa bishilamo mulupimpu lwa lubesha.

Byakuuba mufunjishi

Mufunjishi abuule bafunda bino:

- Kwikala mu tubipanyi tucheche twa minsambo.
- Abulañane mutwe wa minsambo bulongo.
- Apaane makadi a minsambo.

Kipimo kyañingijilo kyaketekelwa kubiwa: Bishinka byasololwa bulongo mundonda

Byakuuba bafunda:

Bafunda basa kupalanguzha ne ku kebakeba bishinka bishila mulupimpu lwa lubesha.

Mikumbu ya ketekelwa:

- Kyashi
- Muyulo
- Kipowe
- Bikola
- Kukepelwa kajo mu mapunzha avula.

- Nzala ne buyanji bilengela bantu kwitumpa mu byubilo byatama , nobe bwivu, bupite ne bumbanzhi.

Mwingilo wakuuba 2

(a) Bafunda:

Bafunda bapaane masawakya kufuma mu minsambo yabo.

(b) Mufunjishi: Mufunjishi asmbakanye milanguluko yafuma mu minsambo ya bafunda.

Kipimo kyañingijilo kyaketekelwa kubiwa: Masawakya apanyiwa bulongo pa mwinsambo wapa lupimpu lwa lubesha.

Mepuzho:

Mukino kibese, bafunda ne mufunjishi besamba pabino: Makatazho eshila mu lumpimpu lwa Lubesha mubintu bitulamata mubwikalo.

KIBESE B: KUTANGA

Mutwe1: Byambo

Mutwe-kache: Ndumbbulwilo ya byambo

Buyuke: kwingijisha byambo kwesekana na kipimo kya fomu kijimo bafunda.

Ntendekelo

Uno mutwe usa kutala pa byambo byanema ne mo twafwainwa kwibingijisha bulongo.

- **Ndonda ya lufunjisho** Mufunjishi alenge kipelu kwingijisha byambo byafunjishiwa kala.

Kimwesho: *Mikola yauma mambo akyashi..*

- Mufunjishi ambile bafunda kwingijisha byambo byafundwa mu bipelu.

Biñambañamba: Buuku wa mufunjishi, Bikaachi bya mingilo, kipabi, ne bikwabotu byafikilamo.

MWINGILO wakuuba 1

Byakuuba mufunjishi

Mufunjishi anembe bino byambo pa kipabi (bbodi):

- Bumbanzhi
- Bupite
- Muyulo
- Lunkunzha

■ Lubesha

Byakuuba mufunjishi

Mufunjishi apaane ndumbulwilo ya byambo, apa bino abuule bafunda kwingijisha bino byambo mubipelu.

1. Bupite
2. Bumbanzhi
3. Lubesha

Mikumbu ya ketekelwa

1. Bupite: Ke byubilo byatama bya kulaala-laala na Bafundabalume.

Kipelu: Mitelo waalukatu ke pite ano moba. (Swai ne mikumbu ikwabo yaoloka)

2. Bumbanzhi: Ke muchima wakwipayañana kwa kubula lusa.

Kipelu: Mbazhi wiba. Konuna ne kwipayañana.

3. Lubesha:Ke mwela upupa, wa mvula nangwa wa kubula mvula.

Kipelu: Lubesha upupa na mvula, onauna kajo ne kuleta kipowe.

Kipimo kyañingijilo kyaketekelwa kubiwa: ndumbulwilo ya byambo isambiwa mwafwainwa.

Mwingilo 2

Kupaana ndumbulwilo ya byambo ne kwibingisha mu bipelu.

Byakuuba mufunjishi

Mufunjishi usa kupaana ndumbulwilo ya byambo ne kwingijishapo kimo mu kipelu nobe bino:
Lunkunzha:ke kikola kishila kupichila mukusambakana kwa umo wabela kwakubula bukikizhi.

Kipelu: Bantu bavula batambula kikola kya lunkunzha kupichila mubyubilo bya bupite na mambo abuyanji.

Byakuuba bafunda:

Bafunda balumbulule bino byambo ne kwibingijisha mu kulenga bipelu kwesakana nabyo besambapo.

Kipimo kyañingijilo kyaketela kubiwa: Ndumbwilo ya byambo yaingijishiwa bulongo mubipelu.

Mepuzho

Mu kino kibaaba twisamba pa byambo ne ndumbulwilo yabyo. Apa bino ne kulenga bipelu kwingijisha byambo bisambiwapo.

MUTWE 2: NTANGILO YAZHIKA

Mutwe 2: Ntangilo yazhika

Mutwe-kache: Kutanga ne kumvwisha

Buyuke: Katanga ne kumvwisha bibaaba byapusana-pusana bya kipimo kya lufundo/fomu

Ntendekelo

Mukino kibaaba, tusakwikala na ntangilo yazhikako. Ayo isa kusakiwa kuchikamenamo muntangilo.

Ndonda ya lufunjishi:

- Mufunjishi atange kyepelo na manono, kasa alondela tuchibawilo bulongo.
- Abuule bafunda kutanga bibaaba mu mabuuku abo akutangamo na manono.
- Bomvwishe bulongo bwanembwamo
- Abuule bafunda kukumbula mepuzho alondelapo.
- Mufunjishi ne bafunda besambe pa mikumbu.

Biñambañamba: Buuku wa mufunjishi, makadi abyambo ne mepuzho, bbodi.

Byakuuba mufunjishi:

Mufunjishi atange byapelo bibiji na jwi ja peulu ne kwipuzhapo mepuzho panyuma ya kutanga.

Byakuuba bafunda

Kutanga byepelo byashalako ne kukumbula mepuzho bunke-bunke.

Mwingilo 1: Kutanga kibaaba

Byukuuba mufunjishi

- Mufunjishi abuule bafunda kutoola kibaaba paji jjishimikila ja Lupimpu Lwa Lubesha.
- Abuule bafunda kuteleka bulongo byo asa kutanga byepelo bibiji bitanshi.
- Epuzhe bafunda mepuzho kufuma pa byobyobyepelo bibiji.

Byakuuba bafunda

Bafunda batange byepelo byashalako ne kukumbula mepuzho alondelapo.

LUPIMPU LWA LUBESHA

Lupimpu lwa lubesha, ke kupimpulwa kwa nkilo mu kimye kyalepa. Lupimpu lwa lubesha ke kintu kimo pa byobyobyantu bitulamata. Abino ke bintu bituzhokoloka ne makatazho otupitamo

aji nobe nzala, mazhika kanwa, kukepa makito nangwa kubula makito. Kutema bichi byavula, kukowesha mwela ne mema, kutwa kyuya, mwela wa mvula wa kinkukwila, miyulo, kutama kwabumanya bwa kyaalo, twishi twakafukula ne lunkunzha, ne bikwabotu.

Mapunzha apakachi ka kyalo ne jiulu, kutwa kyuya, kwimita ne kusema bana kwa banyike babakazhi ne bikwaabo bintu, byo byavulamo.

Kupimpula kwa lubesha kwaiya na maaambo akutema bichi byavula mu mapunzha motwikala. Bichi bipana mwela wa kupema bantu, kimfutele, kufumyako mapulanga, kukwata lubesha mu kimye kibeena kunoka mvula mukatampe.

Kikwabo kileta lupimpu lwa lubesha, ke kusoka biswaswa. Kusoka biswaswa kwatama mambo kuleta lukatazho kubilengwa Lesa.

Kutema bichi, kulengela mwela wa nzubo ya mazhamatamba awa uvweta pa kyalo, mukifulo kya kuubaka mwela wakaba, kukaknkakwakuuba bino. Kino kilengela kukaba kwa kyandanshi.

Bwishi bufuma mu minkinyi nabo, buleta bikola bya mumwela ne mumeema abyo bileengela lupimpu lwa lubesha. Kikwabo ke mapunzha kobataya biswaswa ne ndochi. Mapunzha abyonkabyo, alupula mwela wapusana-pusana awo ulengela lupimpu lwa nkilo. Bilengwa-lesa biji nobe miyulo ne mvula ya kinkukwila, bileta lupimpu lwa nkilo.

Namambotu alupimpimpu lwa lubesha, ko biji bintu bifumamo bji nobe kyashi, banyama bamungye kufwa, bijimwa byuma, meema akepa mumikola ne tuluunga twa meema.

Kutema bichi kulengela mwela yetupema kukepa ne ku sendwa kwa mushiji wapeulu kumvula nangwa amba (soilo ilozhini). Mukyalo inge mwaikala buyanji ne nzala, kilengela bantu kutwela mu byubilo byatama biji nobe bwivi, kwipayañana ne bupite ku banabakazhi. Banabakazhi nabo bayanda umvwe baleka masukulu ne kutwela mukwekele wa kwimita ne kusema Bafunda saka bakiji bacheche.

Mu kwikala mu kisonso kya bupite, kulengela bamo kubela kikola kyatwishi twakafukula ne lunkunzha abyo bileta lukatazho kubebasunga, mambo bamo baleka mingilo ne kulama bakolwa, bakwabo nabo baleka mingilo mambo akukolwa. Onko mambo, bisemi byabo biyanjilamo.

Kikwabo, kifuma mu lupimpu lwa lubesha ke mazhika kanwa. Mazhika kanwa ke kupwisha lukatazho luji na muntu mu mashinda atama ne mpelo ya bino yakonsha kutwala muntu pakazhima inge wazha na nsenzhi mukwapa.

Kupimpula kwa lubesha, kuleta miyulu mumikola ne mutulunga twa mema. Ku byalo bimo, mvula ubeena kuleta bono bwa kukundaula mazubo ne bishimikwatu bikwabotu, byabu apa bino ne konauna kajo. Abino ke bintu bimo bitulamata nangwa bituzhokoloka ne makatazho afuminamo.

MWINGILO WAKUUBA1

Pano kumbula ano mepuzho alondelapo.

1. kyambo kya lupimpu walubesha kyalumbulula ka?

- A Kusama kwa ñondo
- B Mute wazonga
- C Kupimpula kwa nkilo mu kimye kyalepa
- D Kukingya kwa mwaka

2. Kika kyakonsheka kumweka inge kwaikala kyashi kya baya?

- A Bantu basangalala
- B Bijimwa ne banyama bafwa
- C Makito avula
- D Mivumbi ibaya

3. Mwela upema bantu ufuma pi?

- A ku bichi
- B mwiulu
- C mu mitumba
- D mu mema

4. Mashinda ka mwishila kikola kyakapokota?
5. Mu milanguluko yobe, ñanyi kintu kyakonsha kumweka inge makito akepa mu kyalo?

Mikumbu yaketekelwa

1. C
2. B
3. A
4. Kutoma mema atama nangwa kuja kajo ka kowela.
5. Buyanji, bumbazhi ne bupite bubailako.

B Nemba inge kine nangwa bubela:

- i. Muyulo wiya na mambo amazhika kanwa.
- ii. Bumanya bwa kyalo bubwela panshi inge kyashi kyabaya.
- iii. Kutema bichi kuleta makatazho atunyama twikala mubichi.
- iv. Buyanji ne nzala bileta bupite.
- v. Kafwapo muntu ukafwa mambo akikola kyakashita ine.

Mukumbu yaketekelwa

- (i) Bubela
- (ii) Kine
- (iii) Kine
- (iv) Kine
- (v) Bubela

Kipimo kyañingijilo kyaketekelwa kubiwa: kibaaba kyatangiwa bulongo ne mepuzho apusana-pusana akumbulwa bulongo kwesakana na kipimo kya bafunda.

Mepuzho

Mu kino kibaaba, mufunjishi ne bafunda besamba bulongo ne kupesapesa mu kibaaba byambo bikebewa ndumbulwilo yafikilamo kwakubula makatazho.

NGIPIPIHILO YA KIBAABA

Ngipipishilo ke jishinda jimo ja kulumbulwilamo byambo byavula kupichila mu byambo bicheche.

Mu kino kibaaba, mufunjishi wafwainwa kukwasha bulongo bafunda pa lupimpu lwa lubesha. **Ndonda ya lufunjisho** Mufunjishi akwashe bafunda bintu byanema bisakiwa mundembelo ya ngipipishilo.

Bimo ke bino:

- Kusala byambo, myanzo nangwa bipelu byanema mu kibaaba.
- Kufumyamo byambo bibena kubula kukebewa.
- Kushinkamika milanguluko pabyo bakusakila kuuba.

Mwingilo1

Nemba mubwipi kufuma mukibaba bintu bitanu bileta lupimpu lwa lubesha.

Byakuuba mufunjishi:

Mufunjishi abuule bafunda mashinda mwa kunembela ngipipishilo kufuma mu kibaaba kyatangiwa.

Byakuuba bafunda

Bafunda banembe ngipipishilo kwesakana na mikambizho yapewa.

Kipimo kyañingijilo kyaketekelwa kubiwa: Kibaaba kyatangiwa ne kwipipishiwa bulongo.

Mwingilo 2: Ndembulwilo

- Kulumbulula kyambo kya 'ndembulwilo'.
- Kubulañana mizhilo ya ndembulwilo.
- Kupanapo bifwanyikizho
- Kuuba mwingilo wa kunembululwa kwa bipelu.

Mwingilo

Ñambulwilo ne ndembulwilo

Mufunjishi apanepo kimwesho kimo ku bafunda pa ñambulwilo ne ndembulwilo ya bipelu.

Kimwesho:

E. Lubesha lo nauna bintu byavula

F. Tendeka: Bintu

Mukuumbu: Bintu byavula byonaunwa ku lubesha.

Byakuuba Mufunjishi: *Mufunjishi, abuule bafunda mizhilo ya kulondela mundembelo ya bipelu kwa kubula kupimpula ndumbulwilo yabyo.*

Mwingilo wa bafunda

7. A. Bapite bavula mu kyalo mambo akipowe.

B. Tendeka: Kipowe.....

8. A. Kapokota keya mambo akutoma mema abiko ne kuja kajo kakowela .

B. Pezha: kapokota.

9. A. Kupimpulwa kwa lubesha kwaleta muyulo mu kyalo.

B. Tendeka: Lupimpu.....

Kipimo kyañingijilo kyaketekelwa kubiwa: Ñambulwilo ne ndembulwilo ya bipelu yaubiwa bulongo.

Mwingilo:

■ Mufunjishi esambe na bafunda pa byambo bya pewa.

■ Kabiji abike bafunda mu bipanyi bitanu muji bafunda bana.

■ Mufunjishi abuule Bafunda kupana sawakya wa bulumbuluzhi wa byambo.

1. Lupimpu lwa lubesha

2. Kyashi

3. Muyulo

Bafunda:

■ Bafunda besambe mu bipanyi kabiji bapane ma sawakya abulumbuluzhi bwa byambo byapanyiwa.

Bulumbuluzhi bwa byambo

(1) Lupimpu lwa lubesha: Ke nkilo ya juuba pa kimye kyalepa.

(2) Kyashi: Kimye kyalepa kya kubula mvula.

(3) Muyulo: Kuvula kwa mema amvula kuleeta bono.

Mutwe 3: Kutanga na jivi ja peulu

Mutwe-kache: Manono

Buyuke: kutanga kibaaba kwesakana na kipimo kya lufundo na manono.

Ntendekelo:

Mukino kibaaba, mufunjishi ne bafunda, kibafwainwa kutanga bulongotu na manono kasa balondela tuchibawilo.

Ndonda ya lufunjisho:

- Mufunjishi usa kupana bipela paji kibaaba kya kutanga.
- Mufunjishi atangemo jisatu mukibaaba mu kumwisha bafunda ntangilo yawama.
- Bafunda betangile bene na bene.
- Mufunjishi etepo bamo batange mumvula-bantu.

Mwingilo: Kutanga na jiji ja peulu, lubilo, bulongo, kabiji nobe ubena kwamba.

Byakuuba bafunda

- Bafunda batange mu tubipanyi twabo kasa bekwasha muntangilo yawama.
- Mukipanyi kyonse, mwikale wayuka.
- Bipanyi bisalemo wa kwibenako kutanga mu mvula-bantu.

Kipimo kyañingijilo ya ketekelwa kubiwa: kibaba kyangiwa bulongo.

BIYA MU MESO BE BITEKENYA

“Olo! Mingisa, wakikalatu kwakubula kwisunsumya. Abe Bafunda ba mumukwakwa basa kuja ka?” Bainanji ba Mangilita babijikile na jiji ja peulu bingi.

Mingisa wazhindaminetu nzoo. Mwanawamukazhi wakankalwa ne kyaso. Watala mwiulu; mute yenka wasokelenga meso anji na mambo akyashi.

Bukijibiji, walangulukile ku kunkulukila lubilo ku mpoka yanji na mulanguluko wakukulako tupanza nangwa tubishi. Kya bulanda, mu kimpelampelatu, bishu bya myungu bya mwekelengatu nobe fwanka wauma . “Huu!” wapumatu mulupi, waaluluka kabwele.

Mingisa waluba bya kutwa,ke kuyatu ku matalaki abena Tanzania. Nobo kukopa kwa jiso, ale! Jikalala mwina Tanzania wa mupyamo. Bukiji bukiji, wa mubombwela mu kibamba kyanji kyabwenyi mu kupwisha nzala yaku maulu.

Byo apwishishe lusako lwanji, uno Mwalimu Muze, wa ku Tanzania, washinkwile jikwachi janji mwayula mali. Mingisa kutalako bibye, amba, “Kine Lesa upa wimazhala.” waambile bino byambo mu muchima.

Mwalimu Muze, washikula K10 000 wamutambika ne kwamba amba, “Nakupaa ano mali akwipotelamo obe mwine mbokoshi ya kukuzhikilamo.” Wakikankukatu. Mwalimu Muze watwajijila kwamba amba, “Amiwa weba, nabeela kikola kyamuya nabo ne kaswende pamo. Nanchi, lufu lobe kechi luji palepeshane. Shalapo naya kwetu ne amiwa bakanzhike kuubalongo

bami.”Mingisa wimaka panshi, wikatemamo ne kajibingo kakujila Bafunda banji boepainepo mubiji wanji ku lufu na mambo a kyashi kya onawine kajo kanji.

“Bamaama kutama muchima, Kine bandetelela!”

Mepuzho

Mu uno mutwe, twisamba pa kutanga na jiwi ja peulu na manono, bukiji bukiji ne nabuyuke.

KIBESE C: KUNEMBA

Mutwe: Nsombelo

Mutwe kache: Mashimikila

Bya kuyuuka: Kunemba mashimikila a kine

Ntendekelo:

Mu kino kibese bafunda basakuyuka misango ya nembelo ya mashimikila a kine ne kusomba.

Ndonda ya lufunjisho:

- Mufunjishi usa kulumbulula misango ya nembelo ya mashimikila a kine ne a kusomba
- Mufunjishi asakupana mwingilo pa nembelo ya mashimikila a kine ne a kusomba

Bya kuuba:

Bafunda besambe pa misango ya nembelo ya mashimikila a kine ne a kusomba

Mufunjishi:

Mufunjishi obe bino:

- Alumbulule misango ya nembelo ya mashimikila a kine ne a kusomba
- Abuule bafunda kutanga mashimikila onse abiji
- Epuzhe bafunda kulumbulula lupusano luji pakachi ka mashimi o batanga

Jishimikila ja Kusomba

Mujilo ne Bokwe

Bokwe wisampile bulunda na Mujilo. Lukelo Bokwe waishile kwi mulunda nanji Mujilo. Bokwe byo abwela kwanji, Mujilo naye amba, nkeya mu Ntundwe amba, saka mwikala patoka mbai. Abo ba Bokwe ne kuya ne mu kiundu ne Bafunda babo. Ne aye Mujilo pa kwiya wibasokele Bafunda bonse pelu! Bonka bainabo bo banyemapotu lubilo. Lelo bulunda bwa bokwe ne Mujilo bwapwa.

Jishimikila ja Kine

Mutumba wa Kamusongolwa

Mutumba wa Kamusongolwa ke mutumba utanyiwa mu nkambi ya Kasempa. Uno wayukanyikwa bingi na mambo a bulwi bwa kashi bwajinga pakachi ka ba Luyi ne Bakaonde. Ba Kaonde bamwesheshe kujimuka ne kukanjila peulu pene ya mutumba wa Kamusongolwa. Pa kuuba, abo ba Luyi bajinga munshi ya mutumba. Akyo kibalengejile kupumpulwa kya kine mambo bakaonde baalumwinenga mabwe nobe paji kaimana. Kino kyalengejile ba Luyi bamo bajimukile kuyema matakoto mpene lubilo, pa kuuba balaajile pa meso bafwijiletu ponkapa byonka byafwile bena Ijipita pa Kalunga Kachila. Kufuma pa kyokya kimye kufika ne buji lelo, bulunda ne bunungwe pakachi ka ba Luyi ne ba Kaonde bwatwajijila.

Bafunda

- Bafunda besambe pa misango ya nembelo ya mashimikila a kine ne a kusomba
- Banembe ne kupusanya mwingilo wa kupusanya musango wanembelo ya mashimikila a kusomba ne a kine

Bipimo byañingijilo byaketekelwa kubiwa:

Bafunda besambe bulongo pa misango ya nembelo ya mashimikila a kine ne a kusomba

Mwingilo wakuuba

Pusanya musango wanembelo ya mashimikila a kusomba ne a kine

Bipimo byañingijilo byaketekelwa kubiwa:

Kupusanya bulongo musango wanembelo ya mashimikila a kusomba ne a kine

Mwingilo wakuuba

1. Bafunda besambe pa misango ya nembelo ya mashimikila a kusomba ne a kine.

2. Pusanya musango wanembelo ya mashimikila a kusomba ne a kine.

Mepuzho:

Mufunjishi epuzhe bafunda kwamba byo bayuka pa mashimikila a kusomba ne a kine.

KIBESE D: MULAKAZHILO

Mutwe: Bintu

Mutwe-kache: Bintu-vula, Bintu-kamweke ne Bintu-mweka

Buyuke: Kwingijisha bulongo Bintu-vula, Bintu-kamweke ne Bintu-mweka mu bipelu

Ndonda ya lufunjisho: Mu kino kibese bafunda basakutalanga pa bintu Bintu-vula, Bintu-kamweke ne Bintu-mweka.

Biñambañamba:

Buuku wa lufunjisho

Kipabi

Choko

Kipachi

Mwingilo wakuuba:

Bafunda balumbulule mitundu ya bintu

Mufunjishi:

Mufunjishi alumbulu mitundu ya bintu

Kintu

Kintu ke kyambo kimenako jizhina ja bintu biji nobe nzubo, nshima , mukola ne mpunzha.

Bintu-vula ke byambo bimenako bintu bipasha biji pamo nobe kizanze, kipukuku, mulumba, kishinte, kikuta.

Bintu-kamweke ke bintu bibula kumweka kukwachiwa nangwa kuubalwa biji nobe butemwe, kilaka, lufu, mukao, butemwe.

Bintu-mweka ke bintu byo tumona na meso kimye kimo ne kwibakwata biji nobe mufunjishi, choko, buuku, kipabi ne bikwabotu.

Bafunda:

Bafunda bobo bino:

- Besambe pa mitundu ya bintu byapanywa
- Basobololo Bintu-vula, Bintu kamweke ne Bintu mweka
- Banembe bipelu kwingijisha bintu

Bipimo byañingijilo yaketekelwa kubiwa: Kwisamba bulongo ndumbulwilo ya Bintu-vula, Bintu-kamweke ne Bintu-mweka.

Mwingilo wakuuba:

Bafunda basobolole Bintu-vula, Bintu-kamweke ne Bintu-mweka.

Lumbika bino bintu mu Bintu-vula, Bintu-kabalwe ne Bintu-mweka.

mukao	mushingi	ñondo
jiyona	kisumpa	kinkunenke
Mupila	majimi	ngonzhi
kizanze	kashiko	mulumba

muvumbo	buyuke	mitelo
`noma	jitaba	jilundu

mwinshi bukomo nakwalakapala

Bipimo byañingijilo yaketekelwa kubiwa:

Bintu-vula, Bintu-kamweke, Bintu-mweka bilumbululwe bulongo

Mwingilo wakuuba:

Lenga bipelo kwingijisha Bintu-vula, Bintu-kamweke ne Bintu-mweka.

Mufunjishi :

- Apane kimwesho kya kipelu kyalengewa na bintu

Bafunda:

Bafunda banembe bipelu kwingijisha Bintu-vula, Bintu-kamweke ne Bintu-mweka.

Bipimo byañingijilo yaketekelwa kubiwa:

Bipelu bilengwe bulongo kwingijisha Bintu-vula, Bintu-kamweke ne Bintu-mweka.

Mepuzho:

Mufunjishi apituluke mu mitundu ya bintu byo afunjisha pamo na bafunda.

Mutwe 2: Ñambilo Yafyamika.

Mutwe-kache: Ñambilo

Buyuke: Kwingijisha ñambilo

Ndonda ya lufunjisho:

Mufunjishi alumbulule mwatala ñambila yazhika

Bafunda bafunde pa nkinji.

Banembe bulongo mwingilo ye basakupewa

Ntendekelo

Mu kino kibese tusakufunda pa ñambilo

Biñambañamba

- Kipabi kya kunembapo
- Choko
- Buuku wa lufunjisho

Mwingilo wakuuba:

Bafunda besambe ndumbulwilo ne bya kwingijisha ñambilo yapusana-pusana

Mufunjishi:

Mufunjishi obe bino:

- Apane jishimikila muji ñambilo yafyamika.
- Abuule bafunda besambe pa ñambilo.
- Panyuma ya kwisamba, mufunjishi epuzhe bafunda pa byo bayukapo pa ñambilo yafyamika.

Ñambilo yafyamika

- (i) **Nkiji:** Ino ke ñambilo ikalako umvwe kintu kyo twaketekela kumwekana kyabula kumwekana.

Kimwesho:

-Ujishe mebele o naanyika, nkutote.

-Mwana wa maana wafwelukile

-Obewa mwana abwo bunga bo naanyika uleke bambuzhi baje, waunvwa nyi?

- (ii) **Ngesakenyo** ke ñambilo yo bengijisha pa kwesakanya kintu kimo na kikwabo.

Kimwesho:

- Kibepesho inge wapepa fwanka mukonye
- Awa muzungu Satana.

Mwingilo wakuuba:

Bayuke ne kwingijisha ñambilo yafwainwa mu bintu byubiwa byapusana-pusana

Bafunda:

- Besambe mitundu ya Ñambilo Yazhika
- Banembe Ñambilo Yazhika yapusana-pusana

Bipimo byañingijilo yaketekelwa kubiwa:

Bayuke ne kwingijisha bulongo ñambilo yafwainwa mu bintu byubiwa byapusana-pusana

Mwingilo wakuuba:

Bafunda bayuke bintu byubiwa byapusana-pusana mo bafwainwa kwingijisha bulongo ñambilo yafyamika

Bipimo byañingijilo yaketekelwa kubiwa:

Bafunda bayuke bulongo bintu byubiwa byapusana-pusana mo bafwainwa kwingijisha bulongo ñambilo yafyamika

Mwingilo wakuuba:

1. Lumbulula mitundu ya Ñambilo Yazhika.
2. Nemba bimwesho bibiji bibiji bya Nkinji ne Ngesakenyo.
3. Pusanya pakachi ka ñambilo ya nkinji ne ngesakenyo.

Mepuzho:

Mufunjishi apituluke mu byo afunjisha bafunda ne kwibasanchila pa kwibikishako kwingila mingilo ya kuuba bulongo.

BIBLIOGRAPHY:

- Chanda VM (2002). **Introduction to the Study of Bantu Languages**. LAL 211 Batch 1. UNZA . Lusaka.
- Colston, H. L. (2015). **Using figurative language**. Cambridge University Press.
- Glucksberg, S. (2001). **Understanding figurative language: From metaphor to idioms**. Oxford University Press.
- Keraf, G. (2009). **Diski dan Gaya Bahasa Jakarta**: PT. Gramedia Pustaka Utana
- Kakonkanya, H. (2016) **Bishimpi bya Kikaonde**, Lusaka, Zambia.
- Ministry of Education, (2023) **Zambia Education Curriculum Framework**, Lusaka, Zambia.
- Ministry of Education (2024). **Zambian Languages Ordinary Level Syllabus**. Curriculum Development Centre, Lusaka.
- Ministry of Education Lusaka (1977). **Zambian Languages Approved Orthography**. Zambia Education Publishing House, Lusaka.
- Ministry of Education, (1997) **Kikaonde Grade 8**, Publishing House, Lusaka, Zambia.
- Ministry of Education, (1997) **Kikaonde Grade 9**, Publishing House, Lusaka, Zambia.
- Rasinski, T., Smith, M. C., & Zutell, J. (2017). **Go figure! Exploring figurative language, levels 2–4**. Shell Educational Publishing.
- Salamba, E. (2014) **Kipanga Nsoko Mpombo Kilubi Keaseke**, Lusaka, Zambia.
- Vulchanova, M., Milburn, E., Vulchanov, V., & Baggio, G. (2019). Boon or burden? **The role of compositional meaning in figurative language processing and acquisition**. *Journal of Logic, Language and Information*, 28, 359–387. doi:10.1007/s10849-019-09282-7
- Yule, G (2010). **The Study of Language**. Cambridge University Press. Cambridge